

足本
蘇東坡全集

大東書局印行

蘇東坡東坡集

卷七 詩八十三首

次韻章傳道喜雨（禱常山而得）

去年夏旱秋不雨，海畔居民飲臙苦。今年春暖欲生蠶，地上戢戢多於土。預憂一旦開兩翅，口吻如風那肯吐；前時渡江入吳越，布陣橫空如項羽。（去歲錢塘見飛蝗自西北來，極可畏。）農夫拱手但垂泣，人力區區固難禦。撲緣環尾困牛馬，啖齧衣服穿房戶。坐觀不救亦何心，秉畀炎火傳自古。荷鋤散掘誰敢後，得米濟飢還小補。常山山神信英烈，搗駕雷公訶電母。應憐郡守老且愚，欲把瘡痍手摩撫。山中歸時風色變，中路已覺商羊舞。夜聽騷騷鬧松竹，朝畦泫泫流膏乳。從來蝗旱必相資，此事吾聞老農語。庶將積潤掃遺孽，收拾豐歲還明主。縣前已窖八千斛，（今春及今得蝗子八千餘斛。）率以一勝完一敵。更看蠶婦過初眠，（蠶一眠則蝗不復生矣。）未用賀客來旁午。先生筆力吾所畏，感踏鮑謝跨徐庾。偶然談笑得佳篇，便恐流傳成樂府。陋邦一雨何足道，吾君盛德九州普。中和樂職幾時作，試向諸生選何武。

謝郡人田賀二生惜花

城裏田員外，城西賀秀才。不愁家四壁，自有錦千堆。珍重尤奇品，艱難最後開。芳心因落日，薄艷戰輕雷。（昨日雷雨。）老守仍多病，壯懷先已灰。慙慙此粲者，（賀獻魏花三朵。）攀折爲誰哉。玉腕擅紅袖，金樽瀉白醅。何當鑷霜鬢，強插滿頭迴。

惜花

吉祥寺中錦千堆，（錢塘花最盛處。）前年賞花真盛哉。道人勸我清明來，腰鼓百面如春雷。打徹涼州花

自開沙河塘上插花同，醉倒不覺吳兒哈，豈知如今雙鬢催？城西古寺沒蒿萊，有僧閉門手自栽，千枝萬葉巧翦裁，就中一叢何所似？馬腦盤成金縷杯，而我食菜方清齋，對花不飲花應猜。夜來雨雹如李梅，紅殘綠暗吁可哀！

和頓教授見寄（用除夜韻）

我笑陶淵明，種秫二頃半，婦言既不用，還有賁子歎；無絃則無琴，何必勞撫玩？我笑劉伯倫，醉髮蓬莖散；二豪苦不納，獨以錘自伴，既死何用埋？此身同夜旦。孰云二子賢？自結兩重按，笑人還自笑，出口談治亂。一生溷塵垢，晚以道自盟，無成空得懶，坐此百事緩。仄聞頓夫子，講道出新貫，豈無一只書？恐不記庸懦。陋邦貧且病，數米銖稱炭，慙愧章先生，十日坐空館。袖中出子詩，貪讀酒屢煖，狂言各須慎，勿使輪薪爨！

和子由四首

韓太祝送遊太山

偶作郊原十日遊，未應回首厭籠囚；但教塵土驅馳足，終把雲山爛漫酬。聞道逢春思濯錦，便須到處覓蒼裘；恨君不上東封頂，夜看金輪出九幽。

送春

夢裏青春可得追，欲將詩句絆餘暉；酒闌病客惟思睡，蜜熟黃蜂亦懶飛，芍藥櫻桃俱掃地，（病過此二物）鬢絲禪榻兩忘機。憑君借取法界觀，一洗人間萬事非！（來書云：「近看此書」余未嘗見也。）

首夏官舍卽事

安石榴花開最遲，絳裙深樹出幽菲，吾廬想見無限好，客子倦遊胡不歸？坐上一樽雖得滿，古來四事巧相違；令人却憶湖邊寺，垂柳陰陰晝掩扉。

送李供備席上和李詩

家聲赫奕蓋井涼，也解微吟錦瑟傍；擘水取魚湖起浪，引杯看劍坐生光。風流別後人人憶，才器歸來種種長；不用更貪窮事業，風騷分付與沉湘。

西齋

西齋深且明，中有六尺牀；病夫朝睡足，危坐覺日長。昏昏既非醉，踽踽亦非狂；寒衣竹風下，穆然中微涼。起行西園中，草木含幽香；榴花開一枝，桑棗沃以光。鳴鳩得美蔭，困立忘飛翔；黃鳥亦自喜，新音變圓吭。杖藜觀物化，亦以觀我生；萬物各得時，我生日皇皇！

小兒

小兒不識愁，起坐牽我衣，我欲嗔小兒，老妻勸兒癡；「兒癡君更甚，不樂愁何爲？」還坐愧此言，洗盞當我前；大勝劉伶婦，區區爲酒錢。

寄劉孝叔

君王有意誅驕虜，推破銅山鑄銅虎，聯翩三十七將軍，走馬西來各開府；南山伐木作車軸，東海取蠶漫戰鼓；汗流奔走誰敢後，恐乏軍興汗資斧，保甲速村團未遍，方田訟牒紛如雨。爾來手實降新書，扶剔根株窮脈縷。詔書惻怛信深厚，吏能淺薄空勞苦，平生學問止流俗，衆裏笙竽誰比數？忽令獨奏鳳將雛，倉卒欲吹那得譜？况復連年苦飢饉，剝藜草木啖泥土。今年雨雪頗應時，又報蝗蟲生翅股；憂來洗盞欲強醉，寂寞虛齋臥空甌。公廚十日不生煙，更望紅裙踏筵舞；故人屢寄山中信，只有「當歸」無別語。方將雀鼠偷太倉，未肯衣冠掛神武。吳興丈人真得道，平日立朝非小補，自從四方冠蓋闌，歸作二浙湖山主。高蹤已自雜漁釣，大隱何曾棄簪組？去年相從殊未足，問道已許談其祖。逝將棄官往卒業，俗緣未盡那得覩！公家只在雲溪上，上有白雲如白羽，應憐進退苦皇皇，更把安心教初祖。

孔長源挽詞二首

少年才氣冠當時，晚節孤風益自奇；君勝宜爲夫子後，林宗不愧蔡邕碑。南荒尙記誅元惡，東越誰能事細兒？耆舊如今幾人在？爲君無憾爲時悲！

小堰門頭柳繫船，吳山堂上月侵筵；潮聲夜半千巖響，詩句明朝萬口傳。（長源自越過杭，夜飲有美堂上，聯句。長源詩云：「天目遠隨雙鳳落，海門遙感兩潮趨。」一坐稱善。）豈意日斜庚子後，忽驚歲在巳辰年；佳城一閉無窮事，南望題詩淚灑牋。

寄呂穆仲寺丞

孤山寺下水侵門，每到先看醉墨痕；楚相未亡談笑是，中郎不見典刑存。（杭有伶人善學呂舉措，酷似別後常令作之以爲笑。）君先去踏塵埃陌，我亦來尋桑棗村；回首西湖真一夢，灰心霜鬢更休論！

余主簿母挽詞

閨庭蘭玉照鄉閭，自昔雖貧樂有餘；豈獨家人在中饋，却因麟趾識關雎。雲耕忽已歸仙府，喬木依然擁舊廬；忍把還鄉千斛淚，一時灑向老萊裾。

送趙寺丞寄陳海州

景疎樓上喚峨眉，君到應先誦此詩；若見孟公投轄飲，莫忘衝雪送君時！

答陳述古二首

漫說山東第二州，棗林桑泊負春遊；城西亦有紅千葉，人老簪花却自羞。
小桃破萼未勝春，羅綺叢中第一人；聞道使君歸去後，舞衫歌扇總生塵。（陳有小妓，述古稱之。）

張安道樂全堂

列子馭風殊不惡，猶被莊生譏數數。步兵飲酒中散琴，於此得全非至樂。樂全居士全於天，維摩丈室空偈然。平生痛飲今不飲，無琴不獨琴無絃。我公天與英雄表，龍章鳳姿照魚鳥。但令端委坐廟堂，北狄西戎談笑了。如今老去苦思歸，小字親書寄我詩。試問樂全全底事，無全何處更求虧。

張文裕挽詞

高才本出朝廷右，能事空推德業餘。每見便聞曹植句，至今傳寶魏華書。濟南名士新凋喪，劍外生祠已絮除。欲寄西風兩行淚，依然喬木鄭公廬。

懷西湖寄晁美叔同年

西湖天下景，遊者無愚賢。深淺隨所得，誰能識其全。嗟我本狂直，早爲世所捐。獨專山水樂，付與寧非天。三百六十寺，幽尋遂窮年。所至得其妙，心知口難傳。至今清夜夢，耳目餘芳鮮。君持使者節，風采燦雲煙。清流與碧嶽，安肯爲君妍。胡不屏騎從，暫借僧榻眠。讀我壁間詩，清涼洗煩煎。策杖無道路，直造意所便。應逢古漁父，葦間自寅緣。問道若有得，買魚勿論錢。

和梅戶曹會獵鐵溝

山西從古說三明，誰信儒冠也捍城。羊上鯨鯢猶未掩，（近鼻數盜。）草中狐兔不須驚。東州趙叟飲無敵，南國梅仙詩有聲。不向如皋閑射雉，歸來何以得卿卿。（是日惟梅趙不射。）

祭常山回小獵

青蓋前頭點皂旗，黃茅岡下出長圍。弄風驕馬跑空立，趁兔蒼鷹掠地飛。回望白雲生翠嶽，歸來紅葉滿征衣。聖朝若用西涼簿，白羽猶能效一揮。

和章七出守湖州二首

方丈仙人出渺茫，高情猶愛水雲鄉。功名誰使連三捷？身世何緣得兩忘！早歲歸休心共在，他年相見話偏長；只應未報君恩重，清夢時時到玉堂。

絳闕雲臺總有名，應須極貴又長生。鼎中龍虎黃金賤，松下龜蛇綠骨輕。（君好爐火，而餌茯苓。）嘗水未渾纓可濯，弁峰初見眼應明。兩卮春酒真堪羨，獨占人間分外榮。

和張子野見寄三絕句

前生我已到杭州，到處長如到舊遊；更欲洞霄爲隱吏，一庵閑地且相留。（過舊遊）
狂吟跌宕無風雅，醉墨淋漓不整齊；應爲詩人一回顧，山僧未忍掃黃泥。（見題壁）
柏堂南畔竹如雲，此閣何人是主人？但遣先生披鶴氅，不須更畫樂天真。（竹閣見憶）

和蔣夔寄茶

我生百事常隨緣，四方水陸無不便；扁舟渡江適吳越，三年飲食窮芳鮮。金盞玉鱠飯炊雪，海螯江柱初脫泉；臨風飽食甘寢罷，一甌花乳浮輕圓。自從捨舟入東武，沃野便到桑麻川。翦毛胡羊大如馬，誰記鹿角腥盤筵。廚中蒸粟埋飯甕，大杓更（平）取酸生涎。柘羅銅碾棄不用，脂麻白土須盆研。故人猶作舊眼看，謂我好尚如當年。沙溪北苑強分別，水脚一線爭誰先。清詩兩幅寄千里，紫金百餅費萬錢。吟哦烹噉兩奇絕，只恐偷乞煩封纏。老妻稚子不知愛，一半已入薑鹽煎。人生所遇無不可，南北嗜好知誰賢？死生禍福久不擇，更論甘苦爭蚩妍。知君窮旅不自擇，因詩寄謝聊相鐫。

答李邦直

美人如春風，著物物未知；羈愁似冰雪，見子先流澌。子從徐方來，吏民舉熙熙。扶病出見之，驚我一何衰！知我久慵倦，起我以新詩。詩詞如醇酒，盎盎薰四支。徑飲不覺醉，欲和先昏疲。西齋有蠶帳，風雨夜紛披。放懷語不

擇，撫掌笑脫頤。別來今幾何？春物已含姿；柳色日夜暗，子來竟何時？徐方雖云樂，東山禁遊嬉；又無狂太守，何以解憂思？聞子有賢婦，華堂詩螽斯；盍不倒囊橐，賣劍買蛾眉？不用教絲竹，唱我新歌詞。

和文與可洋川圍池二十首

湖橋

朱欄畫柱照湖明，白葛烏紗曳履行；橋下龜魚晚無數，識君拄杖過橋聲。

橫湖

貪看翠蓋擁紅粧，不覺湖邊一夜霜；卷却天機雲錦段，從教匹練寫秋光。

書郭

雨昏石硯寒雲色，風動牙籤亂葉聲；庭下已生書帶草，使君疑是鄭康成。

冰池

不嫌冰雪遶池看，誰似詩人巧耐寒；記取羲之洗硯處，碧琉璃下黑蛟蟠。

竹塢

晚節先生道轉孤，歲寒惟有竹相娛；蠹才杜牧真堪笑，喚作軍中十萬夫。

荻浦

雨折霜乾不耐秋，白花黃葉使人愁；月明小艇湖邊宿，便是江南鸚鵡洲。

蓼嶼

秋歸南浦蝓蟻鳴，霜落橫湖沙水清；臥雨幽花無限思，抱叢寒蝶不勝情。

望雲樓

陰晴朝暮幾回新，已向虛空付此身。出本無心歸亦好，白雲還似望雲人。

天漢臺

漾水東流舊見經，銀潢左界上通靈。此臺試向天文覓，閣道中間第幾星？

待月臺

月與高人本有期，挂簷低戶映蛾眉。只從昨夜十分滿，漸觀冰輪出海遲。

二樂榭

此間真趣豈容談，二樂并君已是三。仁智更煩訶妄見，坐令魯叟作瞿曇。（來詩云：「二見因妄生。」）

瀟泉亭

聞道池亭勝兩川，應須爛醉答雲煙。勸君多揀長腰米，消破亭中萬斛泉。

吏隱亭

縱橫憂患滿人間，頗怪先生日日閑。昨夜清風眠北牖，朝來爽氣在西山。

霜筠亭

解擗新篁不自持，嬋娟已有歲寒姿。要看凜凜霜前意，須待秋風粉落時。

無言亭

慙歎稽首維摩詰，敢問如何是法門。彈指未終千偈了，向人還道本無言。

露香亭

亭下佳人錦繡衣，滿身瓔珞綴明璣。晚香消歇無尋處，花已飄零露已晞。

函虛亭

水軒花榭兩爭妍，秋月春風各自偏；惟有此亭無一物，坐觀萬景得天然。

溪光亭

決去湖波尚有情，却隨初日動蒼楹；溪光自古無人畫，憑仗新詩與寫成。

過溪亭

身輕步穩去忘歸，四柱亭前野竹微；忽悟過溪還一笑，水禽驚落翠毛衣。

被錦亭

煙江露綠曉風香，燕舞鶯啼春日長；誰道使君貧且老，繡屏錦帳咽笙簧。

楔亭

曲池流水細鱗鱗，高會傳觴似洛濱；紅粉翠蛾應不要，畫船來往勝於人。

菡萏亭

日日移床趁下風，清香不盡思何窮！若為化作龜千歲，巢向田田亂葉中。

茶蘼洞

長憶故山寒食夜，野茶蘼白暗香來；分無素手簪羅髻，且折霜蕤浸玉醅。（「長憶故山」一作「半晴半

雨」）

貧筮谷

漢川脩竹賤如蓬，斤斧何曾赦籜龍；料得清貧饒太守，渭濱千畝在胸中。

寒蘆港

溶溶晴港漾春暉，蘆筍生時柳絮飛；還有江南風物否，桃花流水鰲魚肥。

野人廬

少年辛苦事犁鋤，剛厭青山遠故居；老覺華堂無意味，却須時到野人廬。

此君庵

寄語庵前抱節君，與君到處合相親；寫真雖是文夫子，我亦真堂作記人。

金橙徑

金橙縱復里人知，不見鱸魚價自低；須是松江煙雨裏，小船燒薤搗香蠶。

南園

不種天桃與綠楊，使君應欲候農桑；春畦雨過羅紈膩，夏壠風來餅餌香。

北園

漢水巴山樂有餘，一麾從此首歸塗；北園草木憑君問，許我他年作主無？

寄題刁景純藏春塢

白首歸來種萬松，待看千尺舞霜風；年拋造物陶甄外，春在先生杖屨中。楊柳長齊低戶暗，櫻桃爛熟滴階

紅；何時却與徐元直，共訪襄陽龐德公？

玉盤盂二首（并序）

東武舊俗，每歲四月大會于南禪資福兩寺，以芍藥供佛。而今歲最盛，凡七千餘朵，皆重榭累萼，繁麗豐碩。中有白花，正圓如覆盂，其下十餘葉稍大，承之如盤，姿格絕異。獨出於七千朵之上。云得之於城北蘇氏園中。周宰相莒公之別業也，而其名俚甚，乃為易之。

雜花狼籍占春餘，芍藥開時掃地無；兩寺粧成寶纓絡，一枝爭看玉盤盂。佳名會作新翻曲，絕品難尋舊畫

圖；從此定知年穀熟，姑山親見雪肌膚。

花不能言意可知，令君痛飲更無疑；但持白酒勸嘉客，直待瓊舟覆玉彝。負郭相君初擇地，看羊屬國首吟詩；吾家豈與花相厚，更問殘芳「有幾枝」。

和涪公超然臺次韻

我公厭富貴，常苦勸業尋；相期赤松子，永望白雲岑。清風出談笑，萬竅爲號吟；吟成超然詩，洗我蓬之心。嗟我本何人，麀鹿強冠襟；身微空志大，交淺屢言深。嗚公如得謝，呼我幸寄音；但恐酒錢盡，煩公揮囊金。

聞喬太博換左藏知欽州以詩招飲

今年果起故將軍，幽夢清詩信有神；馬革裹尸真細事，虎頭食肉更何人。陣雲冷壓黃茆瘴，羽扇斜揮白葛巾；痛飲從今有幾日，西軒月色夜來新。

喬將行烹鷄鹿出刀劍以飲客以詩戲之

破匣哀鳴出素虬，倦看覬覦聽呦呦；明朝只恐兼烹鶴，此去還須却佩牛。便可先呼報恩子，不妨仍帶醉鄉侯；他年萬騎歸應好，奈有移文在故丘。

次韻劉貢父李公擇見寄二首

白髮相望兩故人，眼看時事幾番新；曲無和者應思郢，論少卑之且借秦。歲惡詩人無好語，（公擇來詩，皆遺失中飢苦之狀。）夜長鯨守向誰親。（貢父近喪偶）少思多睡無如我，鼻息雷鳴撼四鄰。

何人勸我此間來，絃管生衣甌有埃；綠蟻濡脣無百斛，蝗蟲撲面已三回。磨刀入谷追窮寇，洒涕循城拾棄孩；爲郡鮮歡君莫歎，猶勝塵土走章臺。

寄黎眉州

膠西高處望西川，應在孤雲落照邊。瓦屋寒堆春後雪，峨眉翠掃雨餘天。治經方笑春秋學，好士今無六一賢。君以春秋受知於歐陽文忠公，公自號六一居士。且待淵明賦歸去，共將詩酒趁流年。

和趙郎中捕蝗見寄次韻

麥穢人許長，穀苗牛可沒。天公獨何意，忍使蝗蟲發。驅攘著令典，農事安可忽。我僕既胼胝，我馬亦款屹。飛騰漸云少，筋力亦已竭。若無百篇詩，何以醒睡兀。初如疏吠淪，漸若決澗激。往來供十吏，腕脫不容歇。平生輕妄庸，熟視笑魏勃。愛君有逸氣，詩壇專斬伐。民病何時休，吏職不可越。慎無及世事，向空書咄咄。

登常山絕頂廣麗亭

西望穆陵關，東望琅琊臺。南望九仙山，北望空飛埃。相將叫虞舜，遂欲歸蓬萊。嗟我二三子，狂飲亦荒哉。紅裙欲仙去，長笛有餘哀。清歌入雲霄，妙舞纖腰回。自從有此山，白石封蒼苔。何嘗有此樂，將去復徘徊。人生如朝露，白髮日夜催。棄置當何言，萬劫終飛灰。

薄薄酒二首（并序）

膠西先生趙明叔，家貧好飲，不擇酒而醉。常云：「薄薄酒，勝茶湯；醜醜婦，勝空房。」其言雖俚，而近乎達。故推而廣之，以補東州之樂府。既又以爲未也，復自和一篇，聊以發覽者之一噱云耳。

薄薄酒，勝茶湯。蠹蠹布，勝無裳。醜妻惡妾，勝空房。五更待漏靴滿霜，不如三伏日，高睡足北窗。涼珠襦玉押，萬人祖送歸北邙。不如懸鶉百結，獨坐負朝陽。生前富貴，死後文章。百年瞬息萬世忙，夷齊盜跖俱亡羊。不如眼前一醉，是非愛樂都兩忘。

薄薄酒，飲兩鍾。蠹蠹布，著兩重。美惡雖異，醉暖同。醜妻惡妾，壽乃公。隱居求志義之從，本不計較東華塵土。北窗風百年，雖長要有終。富死未必輸生窮，但恐珠玉留君容。千載不朽遭樊崇，文章自足欺盲聾。誰使一朝富

貴面發紅？達人自違酒何功，世間是非憂樂本來空！

同年王中甫挽詞

先帝親收十五人，四方爭看擊鵬鯤；如君才業真堪用，願我衰遲不足論！出處陞沉十年後，死生契闊幾人存？他時京口尋遺迹，宿草猶應有淚痕。（仁宗朝，賢良十五人，今惟富鄭公、張宣猷、錢純老及余與舍弟在耳。）

七月五日二首

避謗詩尋醫，畏病酒入務；蕭條北窗下，長日誰與度？今年苦炎熱，草木困薰煮；况我早衰人，幽居氣如縷。秋來有佳興，秫稻已含露；還復此微吟，往和糟床注。

何處覓新秋，蕭然北臺上；秋來未云幾，風日已清亮。雲間聳孤翠，林表浮遠漲；新棗漸堪剝，晚瓜猶可餉。秋風送落日，萬竅舍悵悵；念當急行樂，白髮不汝放。

趙郎中見和二復答之

趙子吟詩如潑水，一揮三百八十字；奈何效我欲尋醫，恰似西施藏白地。趙子飲酒如淋灰，一年十萬八千杯；若不令君早入務，飲竭東海生黃埃。我衰臨政多繆錯，羨君精采如秋鶻；頗哀老子令日飲，爲君坐嘯主畫諾。

次韻周邠寄鴈蕩山圖二首

指點先憑探藥翁，丹青化出大槐宮；眼明小閣浮煙翠，齒冷新詩嚼雪風。二華行觀雄陝右，九仙今已歷京東；（將赴河中，密邇太華九仙在東武，奇秀不減雁蕩也。）此生的有尋山分，已覺溫台落手中。

西湖三載與君同，馬入塵埃鶴入籠；東海獨來看出日，石橋先去踏長虹。遙知別後添華髮，時向樽前說病翁；所恨蜀山君未見，他年攜手醉郵筒。

送碧香酒與趙明叔教授

聞君有婦賢且廉，勸君慎勿爲楚相；不羨紫駝分御食，自遣赤脚沽村釀。嗟君老狂不知愧，更吟醜婦惡嘲謗；諸生聞語定失笑，冬暖號寒臥無帳。碧香近出帝子家，鵝兒破殼酥流盎；不學劉伶獨自飲，一壺往助齊眉餉。

趙旣見和復次韻答之

長安小吏天所放，日夜歌呼和丞相；豈知後世有阿瞞，（曾公自言參之後。）北海樽前捉私釀。先生未出禁酒國，詩語孤高常近謗；幾回無酒欲沽君，却畏有司書簿帳。（近制公使酒過法甚重。）酸寒可笑分一斗，日飲如何足袁盎，更將險語壓衰翁，只恐自是臺無餉。

趙郎中往苦縣逾月而歸復以一壺遺之仍用元韻

東鄰主人遊不歸，悲歌夜夜聞春相；門前人鬧馬嘶急，一家喜氣如春釀。王事何曾怨獨賢，室人豈忍交謫謗；大兒跟蹤越門限，小兒啞啞語繡帳。定教舞袖掣伊涼，更想夜庖鳴鑿盎，題詩送酒君勿誚，免使退之嘲一餉。

蘇潛聖挽詞

妙齡馳譽百夫雄，晚節忘懷大隱中；悃悃無華真漢吏，文章爾雅稱吾宗。趨時肯負平生志，有子還應不死同；惟我閑思十年時，數行老淚寄西風。

卷八 詩七十一首

和晁同年九日見寄

仰看鸞鶴刺天飛，富貴功名老不思；病馬已無千里志，騷人長負一秋悲！古來重九皆如此，別後西湖付與誰？遣子竊愁天有意，吳中山水要清詩。

送喬施州

恨無負郭田二頃，空有載行書五車。江上青山橫絕壁，雲間細路躡飛蛇。雞號黑暗通蠻貨，（胡人謂犀爲黑暗。）蜂鬧黃連採蜜花。共怪河南門下客，不應萬里向長沙。（喬受知於吳丞相，而施州風土大類長沙。）

夜雪獨宿柏仙庵

晚雨纖纖變玉雲，小庵高臥有餘清。夢驚忽有穿窗片，夜靜惟聞瀉竹聲。稍壓冬溫聊得健，未濡秋旱若爲耕。天公用意真難會，又作春風爛漫晴。

和孔郎中荆林馬上見寄

秋禾不滿眼，宿麥種亦稀。永愧此邦人，芒刺在膚肌。平生五千卷，一字不救饑。方將怨無襦，忽復歌緇衣。堂堂孔北海，直氣凜葦兒。朱輪未及郊，清風已先馳。何以累君子，十萬貧與羸。滔滔滿四方，我行竟安之。何時劍關路，春山聞子規。

留別零泉

舉酒屬零泉，白髮日夜新。何時泉中天，復照泉上人。二年飲泉水，魚鳥亦相親。還將弄泉手，遮日向西秦。

留別釋迦院牡丹呈趙倅

春風小院却來時，壁間惟見使君詩。應問使君何處去，憑花說與春風知。年年歲歲何窮已，花似今年人老矣。去年崔護若重來，前度劉郎在千里。

董儲郎中嘗知眉州與先人遊過安丘訪其故居見其子希甫留詩屋壁

白髮耶潛舊使君，至今人道最能文。隻雞敢忘橋公語，下馬來尋董相墳。冬月負薪雖得免，鄰人吹笛不堪聞。死生契闊君休問，灑淚西南向白雲。

劉貢父見余歌詞數首以詩見戲聊次其韻

十載漂然未可期，那堪重作看花詩；門前惡語誰傳去？醉後狂歌自不知！刺舌君今猶未戒，灸眉我亦更何詞？相從痛飲無餘事，正是春容最好時。

除夜大雪留澠州元日早晴遂行中塗雪復作

除夜雪相留，元日晴相送；東風吹宿酒，瘦馬兀殘夢。慈曉光開，放轉餘花弄；下馬成野酌，佳哉誰與共？須臾晚雲合，亂灑無缺空；鵝毛垂馬駿，自怪騎白鳳。三年東方旱，逃戶連歛棟；老農釋耒歎，淚入飢腸痛。春雪雖云晚，春麥猶可種；敢怨行役勞，助爾歌飯甕。

大雪青州道上有懷東武園亭寄交代孔周翰

超然臺上雪，城郭山川兩奇絕；海風吹碎碧琉璃，時見三山白銀闕。蓋公堂前雪，綠窗朱戶相明滅；堂中美人雪爭妍，粲然一笑玉齒頰。就中山堂雪更奇，青松怪石亂瓊絲；惟有使君遊不歸，五更上馬愁斂眉。君不是淮西李侍中，夜入蔡州縛取吳元濟；又不是襄陽孟浩然，長安道上騎驢吟雪詩。何當閉門飲美酒，無人毀譽河東守。

至濟南李公擇以詩相迎次其韻二首

弊裘羸馬古河濱，野闊天低糝玉塵；自笑餐氈典屬國，來看搖酒謫仙人。宦遊到處身如寄，農事何時手自親？剩作新詩與君和，莫因風雨廢鳴晨。

夜擁笙歌響水濱，回頭樂事總成塵；今年送汝作太守，到處逢君是主人。聚散細思都是夢，身名漸覺兩非親；相從繼燭何煩問，蝙蝠飛時日正晨。

和孔君亮郎中見贈

偶對先生盡一樽，醉看萬物凶崩奔；優遊共我聊卒歲，翫髀如君合倚門。只恐掉頭難久住，應須傾蓋便深

論固知嚴勝風流在，又見長身十世孫。（劉字君嚴，戡字君勝，退之志其墓云：「孔子世三十八，吾見其孫白而長身。」今君亮四十八世矣。）

送范景仁遊洛中

小人真閑事，閑退豈公難。道大吾何病，言深聽者寒。憂時雖早白，住世有還丹。得酒相逢樂，無心所遇安。去年行萬里，蜀路走千盤。投老身彌健，登山意未闌。西遊爲櫻筍，東道盡鸚鵡。杖屨攜兒去，園亭借客看。折花斑竹寺，弄水石樓灘。驚馬衰憐白，驚雷怯笑韓。薛書標洞府，歐陽承叔嘗遊嵩山，日莫於絕壁上見苔，薛成文云：「神清之洞。」明日復尋不見。松蓋偃天壇，試與劉夫子，重尋靖長官。（劉凡云：「曾見人嵩山幽絕處，眼光如貓。」意其爲靖長官也。）

次韻景仁留別

公老我亦衰，相見恨不數。臨行一盃酒，此意重山岳。歌詞白紵清，琴弄黃鍾濁。詩新眇難和，飲少僅可學。欲參兵部選，有力誰如舉。且作東諸侯，山城雄鼓角。南遊許過我，不憚千里遠。會當聞公來，倒屣髮一握。

書韓幹牧馬圖

南山之下，汧渭之間，想見開元天寶年，八坊分屯隘秦川。四十萬疋如雲煙，雖駭駟駘驪駮，白魚赤兔騂皇輪，龍顛鳳頸擗且妍。奇姿逸德隱鶩頑，碧眼胡兒手足鮮。歲時翦刷供帝閑，柘袍臨池侍三千。紅粧照日光流淵，樓下玉螭吐清寒。往來感踏生飛滯，衆工舐筆和朱鉛。先生曹霸弟子韓，廐馬多肉尻睢圓。肉中畫骨誇尤難，金羈玉勒繡羅鞍。鞭箠刻烙傷天全，不如此圖近自然。平沙細草荒芊綿，驚鴻脫兔爭後先。王良挾策飛上天，何必俯首服短轡。

送詹元直少卿知衡州

冗士無處著，寄身范公園。桃花忽成陰，薺麥秀已繁。閉門春晝永，惟有黃蜂喧。誰人肯攜酒，共醉榆柳村。髻卿獨何者？一月三到門。我不往拜之，髻來意彌敦。堂堂元老後，豐豐仁人言。憶在錢塘歲，情好均弟昆。時於冰雪中，笑語作春溫。欲飲徑相覓，夜開叢竹軒。搜尋到篋笥，鮓醢無復存。每愧煙火中，玉腕親炮燔。別來今幾何？相對如夢魂。告我當北渡，新詩侑清樽。坡陁太行麓，洵涌黃河翻。仕宦非不遇，王畿西北垣。斯民如魚耳，見網則驚奔。皎皎千丈清，不如尺水渾。刑政雖首務，念當養其源。一聞襦袴音，盜賊安足論。

次韻子由送蔣夔赴代州學官

功利爭先變法初，典刑獨守老成餘。窮人未信詩能爾，倚市懸知繡不如。代北諸生漸狂簡，床頭雜說爲爬梳。歸來問鴈吾何敢，疾世王符解著書。

和李邦直沂山祈雨有應

高田生黃埃，下田生蒼耳。蒼耳亦已無，更問麥有幾？蛟龍睡足亦解慙，二麥枯時雨如洗。不知雨從何處來，但聞昌黎百步聲如雷。試上城南望城北，際天菽粟青成堆。飢火燒腸作牛吼，不知待得秋成否。半年不雨坐龍慵，共怨天公不怨龍。今朝一雨聊自贖，龍神社鬼各言功。無功日盜太倉穀，嗟我與龍同此責。勤農使者不汝容，因君作詩先自劾。

宿州次韻劉涇

我欲歸休瑟漸希，舞雩何日著春衣。多情白髮三千丈，無用蒼皮四十圍。晚覺文章真小技，早知富貴有危機。爲君垂涕君知否，千古華亭鶴自飛。涇之兄休，亦有文死矣。

和孔密州五絕

見邸家園留題

大旆傳聞載酒過，小詩未忍著碑磨。陽關三疊君須秘，除却膠西不解歌。（來詩有渭城之句。）

春步西園見寄

歲歲開園成故事，年年行樂不辜春。今年太守尤難繼，慈愛聰明惠利人。

東欄梨花

梨花淡白柳深青，柳絮飛時花滿城。惆悵東欄二株雪，人生看得幾清明？

和流杯石上草書小詩

蜂腰鶴膝嘲希逸，春蚓秋蛇病子雲。醉裏自書醒自笑，如今二絕更逢君。

堂後白牡丹

城西千葉豈不好，笑舞春風醉臉丹。何似後堂冰玉絮，遊蜂非意不相干。（孔頗有聲伎，而客無見者。）

和趙郎中見戲（趙以徐伎不如東武詩中見戲云：「只有當時燕子樓。」）

燕子人亡三百秋，卷簾那復似揚州。西行未必能勝此，空唱崔徽上白樓。

又

我擊藤床君唱歌，明年六十奈君何。醉顛只要裝風景，莫向人前自洗磨。（趙每醉歌畢，輒曰：「明年六十矣。」）

和子由與顏長道同遊百步洪相地築亭種柳

平明坐衙不暖席，歸來閉閣閑終日。臥聞客至倒屣迎，兩眼蒙籠餘睡色。城東泗水步可到，路轉河洪翻雪白。安得青絲絡駿馬，感踏飛波柳陰下。奮身三丈兩蹄間，振鬣長鳴身自乾。少年狂興久已謝，但憶嘉陵遠劍關。劍關大道車方軌，君自不去歸何難。山中故人應大笑，築室種柳何時還？

次韻李邦直感舊

騶騎傳呼出跨坊，簿書填委入充堂；誰教案部如何武？只許清樽對孟光。婉婉有時來入夢，溫柔何日聽還鄉？酸寒病守尤堪笑，千步空餘僕射場。

與梁先舒煥泛舟得臨釀字一首

彭城古戰國，孤客倦登臨；汗洒交流處，清潭百丈深。故人輕千里，足繭來相尋；何以娛佳客，潭水洗君心。老守厭簿書，先生罷函丈；風流魏晉間，談笑義皇上。河洪忽已過，水色淥可釀；君毋輕此樂，此樂清且放！

次韻答邦直子由四首

簿書顛倒夢魂間，知我疎慵肯見原；閑作閉門僧舍冷，病聞吹枕海濤喧。忘懷杯酒逢人共，引睡文書信手翻；欲吐狂言咏三尺，怕君瞋我却須吞。（邦直屢以此見戒。）

城南短李好文遊，箕踞狂歌總自由；尊主庇民君有道，樂天知命我無憂。醉呼妙舞留連夜，閑作清詩斷送秋；蕭灑使君殊不俗，罇前容我攬須不？

老弟東來殊寂寞，故人留飲慰酸寒；草荒城角開新徑，雨入河洪失舊灘。車馬追陪迹未掃，唱酬往復字應優；此詩更欲憑君改，待與江南子布看。

君雖爲我此遲留，別後淒涼我已憂；不見便同千里遠，退歸終作十年遊。恨無楊子一區宅，懶臥元龍百尺樓；聞道鷓鴣滿臺閣，網羅應不到沙鷗。

司馬君實獨樂園

青山在屋上，流水在屋下，中有五畝園，花竹秀而野。花香襲杖屨，竹色侵盞罍；樽酒樂餘春，碁局消長夏。洛陽古多士，風俗猶爾雅；先生臥不出，冠蓋傾洛社。雖云與衆樂，中有獨樂者；才全德不形，所貴知我寡。先生獨何

事四海望陶冶，兒童誦君實。走卒知司馬，持此欲安歸。造物不我捨，名聲逐吾輩。此病天所赅，撫掌笑先生。年來效瘖啞。

送顏復兼寄王鞏

彭城官居冷如水，誰從我遊顏氏子。我衰且病君亦窮，衰窮相守正其理。胡爲一朝捨我去，輕衫觸熱行千里。君問君無乃求之歟，答我不然聊爾耳。京師萬事日日新，故人如故今有幾。君知牛牛行相君宅，扣門但覓王居士。清詩草聖俱入妙，別後寄我書連紙。苦恨相思不相見，約我重陽嗅霜蕊。君歸可喚與俱來，未應指目妨進擬。太一老仙閑不出，（張安道爲太一宮使）踵門問道今時矣。因行過我路幾何，願君推挽加鞭箠。吾儕一醉豈易得，買羊釀酒從今始。

蠶虎

黃雞啄蠶如啄黍，宵間守宮稱蠶虎。闌中繳尾伺飛蟲，巧捷功夫在腰膂。跂跂脈脈善緣壁，陋質從來誰比數。今年歲旱號蜥蜴，狂走兒童鬧歌舞。能銜渠水作冰雹，便向蛟龍覓雲雨。守宮努力搏蒼蠅，明年歲旱當求汝。蠶幼從子瞻，兄讀書未嘗一日相舍。旣壯將遊宦四方，讀韋蘇州詩有云：「那知風雨夜復此對床眠。」惻然感之，乃相約早退爲閑居之樂。故子瞻始爲鳳翔幕官，留詩與蠶曰：「一夜雨何時聽蕭瑟。」其後子瞻通守餘杭，復移守膠西，而蠶滯留於淮陽。濟南不見者七年。熙寧十年二月始復會於澶濮之間，相從彭城，留百餘日時，宿於逍遙堂。追感前約，作二小詩。

逍遙堂後千尋木，長送中宵風雨聲。悞喜對床尋舊約，不知漂泊在彭城。秋來東閣涼如水，客去山公醉似泥。困臥北窗呼不醒，風吹松竹雨淒淒。

子由將赴南都，與余會宿於道遙堂，作兩絕句讀之，殆不可爲懷。因和其詩以自解。余觀子由自少曠達，天資近道，又得至人養生長年之訣，而余亦竊聞其一二以爲今者宦遊相別之日淺，而異時退休相從之日長，旣以自解，且以慰子由云。

留題石經院二首

慈菴門前路，行穿翠密中。却來堂上看，巖谷意無窮。
天矯庭中檜，枯枝鵲踏滑。瘦皮纏鶴骨，高頂轉龍腰。
窈窕山頭井，潛通伏澗清。欲知深幾許，聽放輓轡聲。

過雲龍山人張天驥

郊原雨初足，風日清且好。病守亦欣然，肩輿白門道。荒田咽蛩蚓，村巷懸梨棗。下有幽人居，閉門空雀噪。西風高正厲，落葉紛可掃。孤僮臥斜日，病馬放秋草。墟里通有無，垣牆任摧倒。君家本冠蓋，絲竹闌隣保。脫身聲利中，道德自濯澡。躬耕抱羸疾，奉養百歲老。詩書膏吻頰，菽水媚翁媪。飢寒天隨子，杞菊自擷萚。慈孝董邵南，雞狗相乳抱。吾生如寄耳，歸計失不早。故山豈敢忘，但恐迫華皓。從君學種秫，斗酒時相勞。

贈王仲素寺丞（名景純）

養氣如養兒，棄官如棄泥。人皆笑子拙，事定竟誰迷？歸耕獨患貧，問子何所齋。只宅足自庇，寸田有餘畦。明珠照短褐，陋室生虹霓。雖無孔方兄，顧有法喜妻。彈琴一長嘯，不答阮與嵇。曹南劉夫子，名與子政齊。家有鴻寶

書不鑄金囊蹄；促膝問道要，遂蒙分刀圭。不忍獨不死，尺書肯見梯；我生本強鄙，少以氣自擠。孤舟倒江河，赤手攬象犀。年來稍自笑，留氣下暖臍。苦恨聞道晚，意象颯已淒。空見孫思邈，區區賦病梨。

陽關詞二首

受降城下紫髯郎，戲馬臺南古戰場。恨君不取契丹首，金甲牙旗歸故鄉！

（右贈張繼原）

濟南春好雪初晴，行到龍山馬足輕。使君莫忘零溪女，時作陽關腸斷聲。

（右答李公擇）

暮雲收盡溢清寒，銀漢無聲轉玉盤。此生此夜不長好，明月明年何處看？

（右中秋月）

和孔周翰二絕

再觀邸園留題

小園香霧曉蒙籠，醉手狂詞未必工。魯叟錄詩應有取，曲收彤管邨風。

觀淨觀堂效韋蘇州詩

弱羽巢林在一枝，幽人蝸舍兩相宜。樂天長短三千首，却愛韋郎五字詩。

京師哭任遵聖

十年不還鄉，兒女日夜長。豈惟催老大，漸復成凋喪。每聞耆舊亡，涕泣聲輒放。老任况奇逸，先子推輩行。文章小得舉，詩語尤清壯。吏能復所長，談笑萬夫上。自喜作劇縣，偏工破豪黨。奮髯走猾吏，嚼齒對姦將。哀哉命不偶，每以才得謗。竟使落窮山，青衫就黃壤。宦遊久不樂，江海永相望。退耕本就君，時節相勞餉。此懷今不遂，歸見

繫纆葬；望哭國西門，落日銜千嶂。平生惟一子，抱負珠在掌；見之齟齬中，已有食牛量。他年如入洛，生死一相訪；惟有王濬冲，心知中散狀。

答任師中家漢公

先君昔未仕，杜門皇祐初。道德無貧賤，風采照鄉閭。何嘗疎小人，小人自闊疎。出門無所詣，老史在郊墟。門前萬竿竹，堂上四庫書。高樹紅梢梨，小池白芙蕖。常呼赤脚婢，雨中擲園蔬。矯矯任夫子，罷官還舊廬。是時里中兒，始識長者車。烹雞酌白酒，相對歡有餘。有如龐德公，往還葛與徐。妻子走堂下，主人竟誰歟。我時年尚幼，作賦慕相如。侍立看君談，精悍實起予。歲月曾幾何，耆老逝不居。史侯最先沒，孤墳拱桑樗。我亦涉萬里，清淚滿襟祛。漂流二十年，始悟萬緣虛。獨喜任夫子，老佩刺史魚。威行爲白纒，解辦請冠裾。方當入奏事，清廟陳璠璣。胡爲厭軒冕，歸意不少紓。上蔡有良田，黃沙走清渠。罷亞百頃稻，雍容十年儲。閑隨李丞相，搏射鹿與猪。蒼鷹十斤重，猛犬如黃驢。豈比陶淵明，窮苦自把鋤。我今四十二，衰髮不滿梳。彭城古名郡，乏人偶見除。頭顱已可知，幾何不樵漁。會當相從去，芒鞋老舊畬。念子瘴江邊，懷抱向誰攜。賴我同年友，相歡出同輿。冰盤薦文鮪，（鮪，鮓也，戎獮常有。）玉斝傾浮蛆。醉中忽思我，清詩綴瓊琚。知我少所諧，教我時卷舒。世事日反覆，翩如風中旗。雀羅弔廷尉，秋扇悲婕妤。升沉一何速，喜怒紛衆狙。作詩謝二子，我師甯與違。

初別子由

我少知子由，天資和而清。好學老益堅，表裏漸融明。豈獨爲吾弟，要是賢友生。不見六七年，微言誰與廣。常恐坦率性，放縱不自程。會合亦何事，無言對空枰。使入之意消，不善無由萌。森然有六女，包裹布與荆。無憂賴賢婦，藜藿等大烹。使子得行意，青衫陋公卿。明日無晨炊，倒床作雷鳴。秋眠我東閣，夜聽風雨聲。懸知不久別，妙理重細評。昨日忽出門，孤舟轉西城。歸來北堂上，古屋空崢嶸。退食悞相從，入門中自驚。南都信繁會，人事水火爭。

念當閑坐，頽然寄聲。妻子亦細事，文章固虛名。會須掃白髮，不復用黃精。

次韻呂梁仲屯田

雨葉風花日夜稀，一杯相屬竟何時？空虛豈敢酬瓊玉，枯朽猶能出菌芝。門外呂梁從迅急，胸中雲夢自逶迤。待君筆力追靈運，莫負南臺九日期。

章質夫寄惠崔徽真

玉釵半脫雲垂耳，亭亭芙蓉在秋水。當時薄命一酸辛，千古華堂奉君子。水邊何處無麗人，近前試看丞相嘆。不如丹青不解語，世間言語元非真。知君被惱更愁絕，卷贈老夫驚老拙。爲君援筆賦梅花，未害廣平心似鐵。王鞏屢約重九見，訪旣而不至。以詩送將官梁交，且見寄次韻答之交，頗文雅。不類武人家有侍者甚惠麗。

知君月下見傾城，破恨懸知酒有兵。老守無何惟日飲，將軍競病自詩鳴。花枝不共秋欹帽，筆陣空來夜斫營。愛惜微官將底用，他年只好寫銘旌。

臺頭寺雨中送李邦直赴史館分韻得憶字人字兼寄孫巨源二首

霜林日夜西風急，老送君歸百憂集。清歌窈眇入行雲，雲爲不行天爲泣。紅葉黃花秋正亂，白魚紫蟹君須憶。憑君說向聳將軍，衰鬢相逢應不識。

珥筆西歸近紫宸，太平典冊不緣麟。付君此事寧論晉，載我當時舊過秦。門外想無千斛米，墓中知有百年人。看君兩眼明如鏡，休把春秋坐素臣。

代書答梁先

此身與世真悠悠，蒼顏華髮誰留。強名太守古徐州，忘歸不如楚沐猴。魯人豈獨不知丘，藉麟夫子無罪。

尤；異哉梁子清而脩，不遠千里從我游。瞭然正色懸雙眸，世之所馳子獨不。一經通明傳節侯，小楷精絕規摹歐。
（梁生學歐陽公書）我衰廢學懶且媮，長見問事賈長頭。別來紅葉黃花秋，夜夢見之起坐愁。遺我駭石盆與甌，黑質白章聲琳球。謂言山石生澗溝，追琢尚可王公羞。感子佳意能無酬，反將木瓜報珍投。學如富賈在博收，仰取俯拾無遺籌。道大如天不可求，脩其可見致其幽。願子篤實慎勿浮，發憤忘食樂忘憂。

九日懣仲屯田爲大水所隔以詩見寄次其韻

無復龍山對孟嘉，西來河伯意雄夸。霜風可使吹黃帽，舟入黃帽土勝水也。尊酒那能泛浪花。漫遣鯉魚傳尺素，却將燕石報瓊華。何時得見悲秋老，醉裏題詩字半斜。

河復（并敘）

熙寧十年秋，河決澶淵，注鉅野，入淮泗。自檀魏以北，皆絕流，而齊楚大被其害。彭門城下水二丈八尺，七十餘日不退。吏民疲於守禦。十月十三日，澶州大風終日，既止而河流一枝已復故道。聞之喜甚，庶幾可塞乎？乃作河復詩，歌之道路，以致民願，而迎神休，蓋守土者之志也。

君不見西漢元光元封間，河決瓠子二十年。鉅野東傾淮泗滿，楚人恣食黃河鱸。萬里沙回封禪罷，初遣越巫沉白馬。河公未許人力窮，薪芻萬計隨流下。吾君仁聖如帝堯，百神受職河神驕。帝遣風師下約東，北流夜起澶州橋。東風吹凍收微潦，神功不用淇園竹。楚人種麥滿河淤，仰看浮槎棲古木。

韓幹馬十四疋

二馬並驅攢八蹄，二馬宛頸駿尾齊。一馬任前雙舉後，一馬却避長鳴嘶。老聳奚官騎且顧，前身作馬通馬語。後有八匹飲且行，微流赴吻若有聲。前者既濟出林鶴，後者欲涉鶴隄啄。最後一匹馬中龍，不嘶不動尾搖風。韓生畫馬真是馬，蘇子作詩如見畫。世無伯樂亦無韓，此詩此畫誰當看？

有言郡東北荆山下可以構畎積水因與吳正字王戶曹同往相視以地多亂石不果還遊聖女山山有石室如墓而無棺槨或云宋司馬桓魋墓二子有詩次其韻二首

側手區區未易遮，奔流一瞬卷千家；共疑智伯初圍趙，猶有張湯欲漕斜。已坐迂疎來此地，分將勞苦送生涯；使君下策真堪笑，隱隱驚雷響踏車。

茫茫清泗遠孤岑，歸路相將得暫臨；試著芒鞋穿犖磽，更然松炬照幽深。縱令司馬能饒石，奈有中郎解摸金；強寫蒼崖留歲月，他年誰識此時心？

贈寫御容妙善師

憶昔射策干先皇，珠簾翠幄分兩廂；紫衣中使下傳詔，跪捧再拜聞天香。仰觀眩晃目生暈，但見曉色開扶桑；迎陽晚出步就坐，絳紗玉斧光照廊。野人不識日月角，髣髴尙記重瞳光；三年歸來真一夢，橋山松檜淒風霜。天容玉色誰敢畫？老師古寺畫閉房；夢中神授心有得，覺來信手筆已忘。幅巾常服儼不動，孤臣入門涕自滂；元老俯坐須眉古，虎臣立侍冠劍長。平生慣寫龍鳳質，肯顧草間猿與麀；都人踏破鐵門限，黃金白璧空堆牀。爾來摹寫亦到我，謂是先帝白髮耶；不須覽鏡坐自了，明年乞身歸故鄉。

哭刁景純

讀書想前輩，每恨生不早；紛紛少年場，猶得見此老。此老如松柏，不受霜雪槁；直從毫末中，自養到合抱。宏材乏近用，千歲自枯倒；文章餘正始，風節貫華皓。平生爲人耳，自爲薄如縞；是非雖難齊，反覆看愈好。前年旅吳越，把酒慶壽考；扣門無晨夜，百過迹未掃。但知從德公，未省厭丘嫂；別時公八十，後會知難保。昨日故人書，連年喪公媿（景純妻先亡）；傷心范橋水，漾漾舞寒藻。華堂不見人，瘦馬空戀阜；我欲江東去，匏樽酌行潦。鏡湖無

賀監慟哭稽山道，忍見萬松岡，荒池沒秋草！

答呂梁仲屯田

亂山合沓圍彭門，官居獨在懸水村。（呂梁地名。）居民蕭條雜麋鹿，小市冷落無雞豚。黃河西來初不覺，但訝清泗流奔渾。夜聞沙岸鳴鑿盞，曉看雪浪浮鵬鯤。呂梁自古喉吻地，萬頃一抹何由吞。坐觀入市卷閭井，吏民走盡餘王尊。計窮路斷欲安適，吟詩破屋愁鴛鴦。歲寒霜重水歸壑，但見屋瓦留沙痕。入城相對如夢寐，我亦僅免爲魚蠶。旋呼歌舞雜諷笑，不惜飲釀空鋌盆。念君官舍冰雪冷，新詩美酒聊相溫。人生如寄何不樂，任使絳蠅燒黃昏。宣房未築淮泗滿，故道堙滅瘡痍存。明年勞苦應更甚，我當畚鍤先鯨鬣。付君萬指伐頑石，千鎚雷動蒼山根。高城如鐵洪口快，談笑却掃看崩奔。農夫掉臂免狼顧，秋穀布野如雲屯。還須更置軟脚酒，爲君擊鼓行金樽。

張寺丞益齋

張子作齋舍，而以益爲名。吾聞之夫子，求益非速成。譬如遠遊客，日夜事征行。今年適燕薊，明年走蠻荆。東觀盡滄海，西涉涇與涇。歸來閉戶坐，八方在軒庭。又如學醫人，識病由飽更。風雨晦明淫，跛躄瘖聾盲。虛實在其脈，靜躁在其情。榮枯在其色，壽夭在其形。苟能閱千人，望見知死生。爲學務日益，此言當自程。爲道貴日損，此理在既盈。願君書此詩，以爲益齋銘。

答孔周翰求書與詩

身閑曷不長閉口，天寒正好深藏手。吟詩寫字有底忙，未脫多生宿塵垢。不蒙譏訶子厚疾，反更刻畫無鹽醜。征西自有家雞肥，太白應驚飯山瘦。與君相從知幾日，東風待得花開否。撥棄萬事勿復談，百觚之後那詞酒。

送李公恕赴闕

君才有如切玉刀，見之凜凜寒生毛。願隨壯士斬蛟蜃，不願腰間纏錦條。用違其才志不展，坐與胥史同疲勞。忽然眉上有黃氣，吾君漸欲收英髦。立談左右俱動色，一語徑破千言牢。我頃分符在東武，脫略萬事惟嬉遨。盡壞屏障通內外，仍呼騎曹爲馬曹。君爲使者見不問，反更對飲持雙螯。酒酣箕坐語驚衆，雜以嘲諷窮詩騷。世上小兒多忌諱，獨能容我真賢豪。爲我買田臨汶水，逝將歸去誅蓬蒿。安能終老塵土下，俯仰隨人如桔槔。

卷九 詩六十八首

春菜

蔓菁宿根已生葉，韭牙戴土拳如蕨。爛烝香菘白魚肥，碎點青蒿涼餅滑。宿酒初消春睡起，細履幽畦掇芳蔬。苗陳甘菊不負渠，繪纒堆盤織手抹。北方苦寒今未已，雪底坡稜如鐵甲。豈如吾蜀富冬蔬，霜葉露牙寒更茁。久拋菘菹猶細事，苦筍江豚那忍說。明年投劫徑須歸，莫待齒搖并髮脫。

送鄭戶曹

游遍錢塘湖上山，歸來文字帶芳鮮。羸僮瘦馬從吾飲，陋巷何人似子賢。公業有田常乏食，廣文好客竟無氈。東歸不趁花時節，開盡春風誰與妍。

庚州入境圖八首

坐看奔湍遶石樓，使君高會百無憂。三犀竊鄙秦太守，八詠聊同沈隱侯。灣頭寂寞打城還，章贛臺前莫靄寒。勸客登臨無限思，孤雲落日長安。白鵲樓前翠作堆，縈雲嶺路若爲開。故人應在千山外，不寄梅花遠信來。朱樓深處日微明，皂蓋歸時酒半醒。薄莫漁樵人去盡，碧溪青嶂遠螺亭。

使君那暇日參禪，一望叢林一悵然！成佛莫教靈運後，着鞭從使祖生先。
却從塵外涇塵中，無限樓臺煙雨濛。山水照人迷向背，只尋孤塔認西東。
煙雲縹渺鬱孤臺，積翠浮空雨半開。想見之罘觀海市，絳宮明滅是蓬萊。
同峰亂嶂鬱參差，雲外高人世得知。誰向空山弄明月，山中木客解吟詩。

讀孟郊詩一首

夜讀孟郊詩，細字如牛毛。寒燈照昏花，佳處時一遭。孤芳擢荒穢，苦語餘詩騷。
水清石鑿鑿，湍激不受篙。初如食小魚，所得不償勞。又似煮彭蠡，竟日嚼空螯。要當鬪僧清，未足當韓豪。
人生如朝露，日夜火銷膏。何苦將兩耳，聽此寒蟲號。不如且置之，飲我玉色醪。我憎孟郊詩，復作孟郊語。
飢腸自鳴喚，空壁轉飢鼠。詩從肺腑出，出輒愁肺腑。有如黃河魚，出膏以自煮。尙愛銅斗歌，鄙俚頗近古。
桃今射鴨罷，獨速短蓑舞。不憂踏船翻，踏浪不踏土。吳姬霜雪白，赤脚浣白紵。嫁與踏浪兒，不識離別苦。歌君江湖曲，感我長羈旅。

訪張山人得山中字一首

魚龍隨水落，猿鶴喜君還。舊隱丘墟外，新堂紫翠間。野麋馴杖屨，幽桂出榛菅。
洒掃門前路，山公亦愛山。（張故居爲大水所壞，新卜此室，故居之東。）

萬木鎖雲龍（山名）天留與戴公路，迷山向背，人在壤西東。薺麥餘春雪，櫻桃落晚風。
入城都不記，歸路醉眠中。

送孔郎中赴陝郊

驚風擊面黃沙走，西出崦函脫塵垢。使君來自古徐州，聲震河潼殷關右。
十里長亭聞鼓角，一川秀色明花柳。北臨飛檻卷黃流，南望青山如峴首。
東風吹開錦繡谷，淥水翻動蒲萄酒。訟庭生草數開樽，過客如雲牢閉口。

與梁左藏會飲傅國博家

將軍破賊自草檄，論詩說劍俱第一；彭城老守本虛名，識字劣能欺項籍。風流別駕貴公子，欲把笙歌暖鋒鏑；紅旆朝開猛士噪，翠帷暮卷佳人出。東堂醉臥呼不起，啼鳥落花春寂寂；試教長笛傍耳根，一聲吹裂堦前石。

寒食日答公擇三絕次韻

從來蘇李得名雙，只恐全齊笑陋邦；詩似懸河供不辦，故欺張籍隴頭龍。

簿書鞅鼓不知春，佳句相呼賴故人；寒食德公方上冢，歸來誰主復誰賓？

巡城已困塵埃眯，執朴仍遭蟻蝨緣；欲脫布衫攜素手，試開病眼點黃蓮。（來詩謂僕布衫督役）

約公擇飲是日大風

先生生長匡廬山，山中讀書三十年；舊聞飲水師顏淵，不知治劇乃所便。偷兒夜探赤白丸，奮髯忽逢朱子元；半年羣盜誅七百，誰信家書藏九千？春風無事秋月閑，紅粧執樂豪且妍；紫衫玉帶兩部全，琵琶一抹四十絃。客來留飲不計錢，齊人愛公如子產；兒啼臥路呼不還，我慙山郡空留連。牙兵部吏笑我寒，邀公飲酒公無難；約東官奴買花鈿，薰衣理鬢夜不眠。曉來顛風塵暗天，我思其由豈坐慳；作詩愧謝公笑謹，歸來瑟縮愈不安。要當啜公八百里，豪氣一洗儒生酸。

坐上賦戴花得天字

清明初過酒闌珊，折得奇葩晚更妍；春色豈關吾輩事？老狂聊作坐中先。醉吟不耐欹紗帽，起舞從教落酒船；結習漸消留不住，却須還與散花天。

夜飲次韻畢推官

簿書叢裏過春風，酒聖時時且復中；紅燭照庭庭嘶屢，黃雞催曉曉唱玲瓏。老來漸減金釵興，醉後空驚玉筍

工（畢善篆）月未上時應早散，免教壑谷問吾公。

續麗人行（井引）

李仲謀家有周昉畫背面欠伸，內人極精，戲作此詩。

深宮無人春日長，沉香亭北百花香。美人睡起薄梳洗，燕舞鶯啼空斷腸。畫工欲畫無窮意，背立東風初破睡；若教回首却嫣然，陽城下蔡俱風靡。杜陵飢客眠長寒，寒驢破帽隨金鞍。隔花臨水時一見，只許腰支背後看。心醉歸來茅屋底，方信人間有西子。君不見孟光舉案與眉齊，何曾背面傷春啼？

聞李公擇飲傅國博家大醉二首

兒童拍手鬧黃昏，應笑山公醉習園。縱使先生能一石，主人未肯獨留髡。

不肯惺惺騎馬迴，玉山知爲玉人頽。紫雲有語君知否？莫喚分司御史來。

起伏龍行（井敘）

徐州城東二十里有石潭。父老云：「與泗水通。增損清濁，相應不差，時有河魚出焉。」元豐元年春旱，或云：「置虎頭潭中，可以致雷雨。」用其說，作起伏龍行一首。

何年白竹千鈞弩，射殺南山雪毛虎。至今顛骨帶霜牙，尙作四海毛蟲祖。東方久旱千里赤，三月行人口生土；碧潭近在古城東，神物所蟠誰敢侮？上畝蒼石擁巖竇，下應清河通水府。眼光作電走金虵，鼻息爲雲擢煙縷。當年負圖傳帝命，左右羲軒詔神禹。爾來懷寶但貪眠，滿腹雷霆瘖不吐。赤龍白虎戰明日，（是月丙辰，明日庚寅）倒卷黃河作飛雨。嗟吾豈樂鬪兩雄？有事徑須煩一怒。

聞公擇過雲龍張山人輒往從之公擇有詩戲用其韻

我生固多憂，肉食常苦墨。軒然就一笑，猶得好飲力。聞君過雲龍，對酒兩靜默。急攜清歌女，出郭及未具。一

歡難力致，邂逅有勝持；喧蜂集晚花，亂雀啣叢棘。山人樂此耳，寂寞誰時側？何當求好人，聊使治要襪。使君自孤憤，此理誰相直？不如學養生，一氣服千息。

送李公擇

嗟余寡兄弟，四海一子由；故人雖云多，出處不我謀。弓車無停招，逝去勢莫留；僅存今幾人，各在天一陬。有如長庚月，到曉爛不收；宜我與夫子，相好手足侔。比年兩見之，賓主更獻酬；樂哉十日飲，衍衍和不流。論事到深夜，僂仆鈴與騶；頗嘗見使君，有客如此不？欲別不忍言，慘慘集百憂；念我野夫兄，知名三十秋。已得其為人，不待風馬牛；他年林下見，傾蓋如白頭。

送荀芍藥與公擇二首

久客厭虜鱗，蜀人謂東北人虜子。楞然思南烹，故人知我意。千里寄竹萌，駢頭玉嬰兒。一一脫錦襦，庖入應未識。旅人眼先明，我家拙廚膳，彘肉葦蕪菁，送與江南客。燒窠配香粳。

今日忽不樂，折盡園中花。園中亦有芍藥，裊殘葩。久旱復遭雨，紛披亂泥沙。不折亦安用，折去還可嗟。棄擲亮未能，送與謫仙家。還將一枝春，插向兩鬢丫。

和孫莘老次韻

去國光陰春雪消，還家蹤迹野雲飄。功名正自妨行樂，迎送纔堪博早朝。雖去友朋親吏卒，却辭讒謗得風謠。今年我亦江東去，不問繁雄與寂寥。

游張山人園

壁間一軸煙蘿子，盒裏千枝錦被堆。慣與先生爲酒伴，不嫌刺史亦顏開。纖纖入麥黃花亂，颯颯催詩白雨來。聞道君家好井水，歸軒乞得滿瓶回。

杜介熙熙堂

崎嶇世路最先同，窈窕華堂手自開。咄咄何曾書怪事，熙熙長覺似春臺。白砂碧玉味方永，黃紙紅旗心已灰。遙想閉門投轄飲，鷓鴣絃鐵撥響如雷。

次韻答劉涇

吟詩莫作秋蟲聲，天公怪汝釣物情。使汝未老華髮生，芝蘭得雨蔚青青。何用自燔以出馨，細書千紙雜真行。新音百變口如鶯，異義蜂起弟子爭。舌翻濤瀾卷齊城，萬卷堆胸兀相撐。以病爲樂子未驚，我有至味非煎烹。是中之樂吁難名，綠槐如山闌廣庭。飛蟲繞耳細而清，敗席展轉臥見經。亦自不嫌翠織成，意行信足無溝坑。不識五郎呼作卿，吏民哀我老不明，相戒毋復煩鞭刑。時臨泗水照星星，微風不起鏡面平。安得一舟如葉輕，臥聞郵籤報水程。尊羹羊酪不須評，一飽且救飢腸鳴。

攜妓樂游張山人園

大杏金黃小麥熟，墮巢乳鵲拳新竹。故將俗物惱幽人，細馬紅粧滿山谷。提壺勸酒意雖重，杜鵑催歸聲更速。酒闌人散却關門，寂歷斜陽挂疎木。

種德亭（并敘）

虞士王復家於錢塘，爲人多技能，而醫尤精。期於活人而已，不志於利。築室候潮門外，治園圃，作亭樹，以與賢士大夫游，惟恐不及。然終無所求，人徒知其接花藝果之勤，而不知其所種者德也。乃以名其亭，而作詩以遺之。

小圃旁城郭，閉門芝朮香。名隨市人隱，德與佳木長。元化善養性，倉公多禁方。所活不可數，相逢旋相忘。但喜賓客來，置酒花滿堂。我欲東南去，再觀雙檜蒼。山茶想出屋，湖橋應過牆。木老德亦熟，吾言豈荒唐。

文與可^{有詩見寄云}「待將一段鷓鴣溪，絹掃取寒梢萬尺長。」次韻答之。
爲愛鷓鴣溪白蠶光，掃殘雞距紫毫銛；世間那有千尋竹，月落庭空影許長。

聞辯才法師復歸上天竺以詩戲問

道人出山去，山色如死灰；白雲不解笑，青松有餘哀。忽聞道人歸，鳥語山容開；神光出寶髻，法雨洗浮埃。想見南北山，花發前後臺；寄聲問道人，「借禪以爲談，何所聞而去，何所見而回？」道人笑不答，此意安在哉。昔年本不住，今者亦無來；此語竟非是，且食白楊梅。

和子由送將官梁左藏仲通

雨足誰言春麥短，城堅不怕秋濤卷；日長惟有睡相宜，半脫紗巾落紈扇。芳草不鋤當戶長，珍禽獨下無人見；覺來身世都是夢，坐久枕痕猶著面。城西忽報故人來，急掃風軒炊麥飯。（徐州所出）伏波論兵初鑿鏤，中散談仙更清遠。南都從事亦學道，不卹腸空誇腸滿。問羊他日到金華，應許相將遊闔苑。（黃初平之兄，尋其弟於金華山。）

次韻秦觀秀才見贈秦與孫莘老李公擇甚熟將入京應舉

夜光明月非所投，逢年遇合百無憂；將軍百戰竟不侯，伯耶一斗得涼州。魏關負重君無力，十年不入汾華域；故人坐上見君文，謂是古人吁莫測。新詩說盡萬物情，硬黃小字臨黃庭；故人已去君未到，空吟河畔草青青。誰謂他鄉各異縣，天遣君來破吾願；一聞君語識君心，短李髯孫眼中見。江湖放浪久全真，忽然一鳴驚倒人；從橫所值無不可，知君不怕新書新。千金弊帚那堪換，我亦淹留豈長筭。山中既未決同歸，我聊爾耳君其漫！

僕曩於長安陳漢卿家見吳道子畫佛碎爛可惜其後十餘年復見之於鮮于

子駿家則已裝背完好子駿以見遺作詩謝之

貴人金多身復閑，爭買書畫不計錢。已將鐵石充逸少，（殷鐵石，梁武帝時人。今法帖大王書中有鐵石字。）更補朱繇爲道玄。（世所收吳畫多朱繇筆也。）煙熏屋漏裝玉軸，鹿皮蒼壁知誰賢。吳生畫佛本神授，夢中化作飛空僊。覺來落筆不經意，神妙獨到秋毫顛。我昔長安見此畫，歎惜至寶空潛然。素絲斷續不忍看，已作胡蝶飛聯翩。君能收拾爲補綴，體質散落嗟神全。志公髣髴見刀尺，脩羅天女猶雄妍。如觀老杜飛鳥句，脫字欲補知無緣。問君乞得良有意，欲將俗眼爲洗滌。貴人一見定羞忤，錦囊千紙何足捐。不須更用博麻縷，付與一炬隨飛煙。

雨中過舒教授

疎疎簾外竹，瀏瀏竹間雨。窗扉靜無塵，几硯寒生霧。美人樂幽獨，有得緣無慕。坐依蒲褐禪，起聽風甌語。客來淡無有，灑掃涼冠屨。濃茗洗積昏，妙香淨浮慮。歸來北堂閣，一一微螢度。此生憂患中，一餉安閑處。飛鷺悔前笑，黃犬悲晚悟。自非陶靜節，誰識此間趣？

次韻舒教授寄李公擇

草書妙絕吾所兄，真書小低猶抗行。論文作詩俱不敵，看君談笑收降旌。去年逾月方出畫，（予去年留齊月餘。）爲君劇飲幾濡首。今年過我雖少留，寂寞陶潛方止酒。（此行公擇病酒多不飲。）別時流涕攬君須，懸知此歡墮空虛。松下從橫餘展齒，門前驅馳想君車。怪君一身都是德，近之清潤淪肌骨。細思還有可恨時，不許藍橋見傾國。（公擇有婢名雲英，屢欲出不果。）

送鄭戶曹

水邊彭祖樓，山圍戲馬臺。古來豪傑地，千歲有餘哀。隆準飛上天，重瞳亦成灰。白門下呂布，大星隕臨淮。尙想劉玄德，置酒此徘徊。爾來苦寂寞，廢圃多蒼苔。河從百步響，山到九里回。山水自相激，夜聲轉風雷。蕩蕩清河

壚黃樓我所開；秋月墮城角，春風搖酒杯。遲君爲坐客，新詩出瓊瑰。樓成君已去，人事固多乖！他年君倦游，白首賦歸來。登樓一長嘯，使君安在哉！

次韻黃魯直見贈古風二首

佳穀臥風雨，萑莠登我場。陳前漫方丈，玉食慘無光。大哉天宇間，美惡更臭香。君看五六月，飛蚊殷回廊。茲時不少假，俛仰霜葉黃。期君蟠桃枝，千歲終一嘗。顧我如苦李，全生依路傍。紛紛不足愠，悄悄徒自傷。

空山學仙子，妄意笙簫聲。千金得奇藥，開視皆鴆荼。不知市人中，自有安期生。今君已度世，坐閱霜中蒂。摩挲古銅人，歲月不可計。聞風安在哉，要君相指似。

次韻答舒教授觀余所藏墨

異時長笑王會稽，野鷺膾腥汚刀几。莫年却得庚安西，自厭家雞題六紙。二子風流冠當代，願與兒童爭慍喜。秦王十八已龍飛，嗜好晚將蚯蚓比。我生百事不挂眼，時人繆說云工此。世間有癖念誰無，傾身障簾尤堪鄙。一生當著幾兩屐，定心肯爲微物起。此墨足支三十年，但恐風霜侵髮齒。非人磨墨墨磨人，蚬應未罄墨先取。逝將振衣歸故國，數畝荒園自鋤理。作書寄君君莫笑，但覓來禽與青李。一螺點漆便有餘，萬竈燒松何處使。君不見永寧第中擣龍麝，列屋閑居清且美。倒量連眉秀嶺浮，雙鴉畫髮香雲委。時聞五斛賜蛾絲，不惜千金求獮髓。聞君此詩當大笑，寒窗冷硯冰生水。

送鄭戶曹賦席上果得榧子

彼美玉山果，粲爲金盤實。瘴霧脫蠻溪，清樽奉佳客。客行何以贈，一語當加璧。祝君如此果，德膏以自澤。驅攘三彭仇，已我心腹疾。願君如此木，凜凜傲霜雪。斲爲君倚几，滑淨不容削。物微興不淺，此贈毋輕擲。

送胡掾

亂葉和淒雨，投空如散絲；流年一如此，游子去何之？
節義古所重，艱危方自茲！他時著清德，仍復畏人知。

答仲屯田次韻

秋來不見漢陂岑，千里詩盟忽重尋；大木百圍生遠籟，朱絃三嘆有遺音。
清風卷地收殘暑，素月流天掃積陰；欲遣何人賡絕唱，滿階桐葉候蟲吟。

密州宋國博以詩見紀在郡雜詠次韻答之

吾觀二宋文字，字字照縑素，淵源皆有考，奇嶮或難句。後來邈無繼，嗣子其殆庶。
胡為尚流落，用舍真有數！當時苟悅可，慎勿笑杖。斲窗誰赴救，袖手良優裕。山城辱吾繼，缺短煩遮護。
昔年繆陳詩，無人聊瓦注。子今賡絕唱，外重中已懼。何當附家集，擊壤追咸饗。

答范祖禹

吾州下邑生劉季，誰數區區張與李？（來詩有張僕射李臨淮之句。）
重瞳遺迹已塵埃，惟有黃樓臨泗水。（郡有廳事，俗謂之霸王廳，相傳不可坐，僕拆之以蓋黃樓。）
而今太守老且寒，俠氣不洗儒生酸。猶勝白門窮呂布，欲將鞍馬事曹瞞。

次韻答王定國

每得君詩如得書，宣心寫妙書不如；眼前百種無不有，知君一以詩驅除。
傳聞都下十日雨，青泥沒馬街生魚；舊雨來人今不來，油然獨酌臥清虛。（堂名）我雖作郡古云樂，山川信美非吾廬。
願君不廢重九約，念此衰冷勤呵噓。

芙蓉城（并敘）

世傳王迥字子高，與仙人周瑤英游芙蓉城。元豐元年三月，余始識子高，問之信然。乃作此詩，極其情而

歸之正，亦變風止乎禮義之意也。

芙蓉城中花冥冥，誰其主者石與丁。珠簾玉案翡翠屏，雲舒霞卷千傳停。中有一人長眉青，炯如微雲淡疎星；往來三世空練形，竟坐誤讀黃庭經。天門夜開飛爽靈，無復白日乘雲耕。俗緣千劫磨不盡，翠被冷落淒餘馨。因過繚山朝帝廷，夜聞笙簧弭節聽。飄然而來誰使令，皎如明月入牕櫺。忽然而去不可執，寒衾虛幌風泠泠。仙宮洞房本不扃，夢中同躡鳳凰翎。徑渡萬里如奔霆，玉樓浮空聳亭亭。天書雲篆誰所銘，遶樓飛步高玲瓏。仙風鏘然韻流鈴，蘊蘊形開如酒醒。芳卿寄謝空丁寧，一朝覆水不返甃。羅巾別淚空熒熒，春風花開秋葉零。世間羅綺紛膾脛，此生流浪隨滄溟。偶然相值兩浮萍，願君收視觀三庭。勿與嘉穀生蝗螟，從渠一念三千齡。下作人間尹與邢。

和鮮于子駿鄆州新堂月夜二首（前次韻後不次）

去歲游新堂，春風雪消後。池中半篙水，池上千里柳。佳人如桃李，胡蝶入衫袖。山川今何許，疆野已分宿。歲月不可思，駛若船放溜。繁華真一夢，寂寞兩榮朽。惟有當時月，依然照杯酒。應憐船上人，坐穩不知漏。明月入華池，反照池上堂。堂中隱几人，心與水月涼。風螢已無迹，露草時有光。起觀河漢流，步履響長廊。名都信繁會，千指調絲簧。先生病不飲，童子為燒香。獨作五字詩，清絕如韋郎。詩成月漸側，皎皎兩相望。

送將官梁左藏赴冀州

燕南垂，趙北際，其間不合大如礪。至今父老哀公孫，烝土為城鐵作門。城中積穀三百萬，猛士如雲驕不戰。一朝鼓角鳴地中，帳下美人空掩面。豈如千騎平時來，笑談聲效生風雷。葛巾羽扇紅塵靜，投壺雅歌清燕開。東方健兒虜虎樣，泣涕懷思廉恥將。彭城老守亦淒然，不見君家雪兒唱。

次韻子由送趙峴歸觀錢塘遂赴永嘉

歸舟轉河曲，稍見楚山蒼。候吏來迎客，吳音已帶鄉。言從謝康樂，先獻魯靈光。已擊三千里，何須四十強。風流半刺史，清絕校書郎。到郡詩成集，尋溪水澣裳。芒鞋隨採藥，蠶紙記流觴。海靜蛟龍出，山空草木長。宦游無遠近，民事要更嘗。願子傳家法，他年請尚方。

中秋月三首

殷勤去年月，澹灑古城東。憔悴去年人，臥病破窗中。徘徊巧相覓，窈窕穿房櫳。月豈知我病，但見歌樓空。撫枕三歎息，扶杖起相從。天風不相哀，吹我落瓊宮。白露入肝肺，夜吟如秋蟲。坐令太白豪，化爲東野窮。餘年知幾何？佳月豈屢逢？寒魚亦不睡，竟夕相唼喙。

六年逢此月，五年照離別。中秋有月，凡六年矣。惟去歲與子由會於此。歌君別時曲，滿坐爲淒咽。留都信繁麗，此會豈輕擲。鎔銀百頃湖，桂鏡千尋闕。三更歌吹罷，人影亂清樾。歸來北堂下，寒光翻露葉。喚酒與婦飲，念我向兒說。豈知衰病後，空盞對梨栗。但見古河東，蘼麥如鋪雪。欲和去年曲，復恐心斷絕。

舒子在汶上，閉門相對清。舒煥試舉人鄆州。鄭子向河朔，鄭僅赴北京戶曹。孤舟連夜行，頓子雖咫尺，兀如在牢扃。頓起來徐試舉人。趙子寄書來，水調有餘聲。今日得趙某卿書，猶記余在東武中秋所作水調歌頭。悠哉四子心，共此千里明。明月不解老，良辰難合并。回顧坐上人，聚散如流萍。嘗聞此宵月，萬里同陰晴。故人文生爲余言：嘗見海賈云：『中秋有月，則是歲珠多而圓，賈人常以此候之。雖相去萬里，他日會合相問，陰晴無不同者。』天公自著意，此會那可輕。明年各相望，俯仰今古情。

中秋見月寄子瞻兄子由

西風吹暑天益高，明月耿耿分秋毫。彭城閉門青嶂合，坐聽百步鳴飛濤。史君攜客登燕子，月色著人如著水；筵前不設鼓與鐘，處處笛聲相應起。浮雲卷盡流金丸，戲馬臺西山鬱蟠。杯中淥酒一時盡，衣上白露三更寒。

扁舟明日浮古汴；回首逡巡陵谷變。河吞巨野入長淮，城沒黃流只三板。明年築城似山，伐木爲堤堤更堅；黃樓未成河已退，空有遺迹令人看。城頭看月應更好，河流深處今生草。子孫免被魚鼈食，歌舞聊寬史君老。南都從事老更貧，羞見青天月照人。飛鶴投籠不能出，曾是彭城坐中客。

和

明月未出羣山高，瑞光千丈生白毫。一杯未盡銀闕涌，亂雲脫壞如崩濤。誰爲天公洗眸子，應費明河千斛水。遂令冷看世間人，照我湛然心不起。西南火星如彈丸，角尾弈弈蒼龍蟠。今宵注眼看不見，更許螢火爭清寒。何人纔舟臨古汴，千燈夜竹魚龍變。曲折無心逐浪花，低昂赴節隨歌板。是夜賈客舟中放水燈，青燐滅沒轉前山。浪颺風迴豈復堅，明月易低人易散。歸來呼酒更重看，堂前月色愈清好。啜咽寒齏鳴露草，卷簾推戶寂無人。窗下咿啞惟楚老，（近有一孫名楚老）南都從事莫羞貧，對月題詩有幾人。明朝人事隨日出，恍然一夢瑤臺客。

答王鞏鞏將見過有詩自謂惡客戲之

汴泗遶吾城，城堅如削鐵。中有幸臨淮，號令肝膽裂。古來彭城守，未省怕惡客；惡客云是誰？祥符相公孫。是家豪逸生有種，千金一擲頗黎盆；連車載酒來，不飲外酒嫌其村。子有千餅酒，我有萬株菊；任子滿頭插，團團見花不見目。醉中插花歸，花重壓折軸。問客何所須，客言我愛山。青山自遶郭，不要買山錢。此外有黃樓，樓下一河水。美哉洋洋乎，可以療飢并洗耳。彭城之遊樂復樂，客惡何如主人惡。

次韻王定國馬上見寄

昨夜霜風入袂衣，曉來病骨更支離。疎狂似我人誰顧，坎軻憐君志未移。但恨不攜挑葉女，尙能來趁菊花時。南臺二謝無人繼，直恐君詩勝義熙。（二謝從宋武帝九日燕戲馬臺）

與頓起孫勉泛舟探韻得未字

窗前堆梧桐，牀下鳴絡緯。佳人尺書到，客子中夜喟。朝來一樽酒，晤語聊自慰。秋蠅已無聲，霜蟹初有味。當爲壯士飲，皆裂須磔蝟。勿作兒女懷，坐念鱗蚱畏。山城亦何有一笑瀉肝胃，泛舟以娛君。魚鼈多可餽，縱爲十日飲，未遽主人費。吾儕俱老矣，耿耿知自貴。寧能傍門戶，啼笑雜猩猩。要將百篇詩，一吐千丈氣。蕭條歲行莫，迨此霜雪未。明朝出城南，遺迹觀楚魏。西風迫吹帽，金菊亂如沸。願君勿言歸，輕別吾所謹。

次韻答頓起二首

挽袖推腰踏破紳，舊聞攜手上天門。相逢應覺聲容似，欲話先驚歲月奔。新學已皆從許子，諸生猶自畏何蕃。殿廡直宿真如夢，猶記憂時策萬言。（頓君及第時，余爲殿後編排官，見其答策語頗直，其後與子由試舉人，西京旣罷，同登嵩山絕頂，嘗見其唱酬詩十餘首，頓詩中及之。）

十二東秦比漢京，去年古寺共題名。（去歲見之於青州。）早衰怪我遽如許，苦學憐君大瘦生。茆屋擬歸田二頃，金丹終掃雪千莖。何人更似蘇司業，和遍新詩滿洛城。

卷十 詩七十七首

九日黃樓作

去年重陽不可說，南城夜半千漚發。水穿城下作雷鳴，泥滿城頭飛雨滑。黃花白酒無人問，日暮歸來洗韜。豈知還復有今年，把酒對花容一呷。莫嫌酒薄紅粉陋，終勝泥中千柄鍤。黃樓新成壁未乾，青河已落霜初殺。朝來白露如細雨，南山不見千尋剎。樓前便作海茫茫，樓下空聞櫓鴉軋。薄寒中人老可長，熱酒澆腸氣先壓。煙消日出見漁村，遠水鱗鱗山鬢鬢。詩人猛士雜龍虎，（坐客三十餘人，多知名之士。）楚舞吳歌亂鶉鳴。一杯相

屬君勿詞，此境何殊，泛清書！

太虛以黃樓賦見寄作詩爲謝

我在黃樓上，欲作黃樓詩，忽得故人書，中有黃樓詞。黃樓高十丈，下建五丈旗，楚山以爲城，泗水以爲池。我詩無傑句，萬景驕莫隨。夫子獨何妙，雨雹散雷推。雄詞雜今古，中有屈宋姿。南山多磐石，清滑如流脂。朱蠟爲摹刻，細妙分毫厘。佳處未易識，當有來者知。

九日文韻王鞏

我醉欲眠君罷休，已教從事到青州。鬢霜饒我三千丈，詩律輸君一百籌。聞道郎君閉東閣，且容老子上南樓；相逢不用忙歸去，明日黃花蝶也愁。

送顛起

客路相逢難，爲樂常不足；臨行挽衫袖，更賞折殘菊。佳人亦何念，淒斷陽關曲。酒闌不忍去，共接一寸燭。留君終無窮，歸駕不免促。岱宗已在眼，一往繼前躅。天門四十里，夜看扶桑浴。回頭望彭城，大海浮一粟。故人在其下，塵土相逐蹴。惟有黃樓詩，千古配淇澳。（顛有詩記黃樓本末）

送孫勉

昔年罷東武，曾過北海縣；白河翻雪浪，黃土如蒸麵。桑麻冠東方，一熟天下賤；是時累飢饉，常苦盜賊變。每憐追胥官，野宿風裂面。君爲淮南秀，文采照金殿。（君嘗考中進士第一人）胡爲事奔走，投筆腰羽箭。更被髡將軍，豪篇來督戰。（其兄莘老以詩寄之，皆言戰事）親程三郡士，玉石不能銜。欲知君得人，失者亦稱善。君才無不可，要欲經百鍊；吾詩堪咀嚼，聊送別酒噉。

李思訓畫長江絕島圖

蘇東坡東坡集 卷十

山蒼蒼，江茫茫，大孤小孤江中央；崖崩路絕猿鳥去，惟有喬木攙天長。客舟何處來？棹歌中流聲抑揚。沙平風軟望不到，孤山久與船低昂。峨峨兩煙鬟，曉鏡開新粧。舟中賈客莫漫狂，小孤前年嫁彭郎。

次韻答王鞏

我有方外客，顏如瓊之英；十年塵土窟，一寸冰雪清。竭來從我游，坦率見真情；顧我無足戀，戀此山水清。新詩如彈丸，脫手不暫停；昨日放魚回，衣巾滿浮萍。今日扁舟去，白酒載烏程；山頭見月出，江路聞鼃鳴。莫作孺子歌，滄浪濯吾纓；吾詩自堪唱，相子棹歌聲。

張安道見示近詩

人物一衰謝，微言難重尋；殷勤永嘉末，復聞正始音。清談未足多，感時意殊深！少年有奇志，欲和南風琴。荒林蚶蜆亂，廢沼蛙蠧淫；遂欲掩兩耳，臨文但噫瘖。蕭然王郎子，來自緱山陰；（其壻王鞏攜來）云見浮丘伯，吹簫明月岑。遺聲落淮泗，蛟鼉爲悲吟；願公正王度，祈招繼惜愔。

次韻王鞏顏復同泛舟

沈郎清瘦不勝衣，邊老便便帶十圍；躑躅身輕山上走，謹呼船重醉中歸。舞腰似雪金釵落，談辯如雲玉麈塵；憶在錢塘正如此，回頭四十二年非！

次韻張十七九日贈子由

千戈萬槩擁旄籬，九日清樽豈復持；（是日南都敕使按兵）官事無窮何日了？菊花有信不吾欺。道遠瓊館真堪羨，取次塵纒未可縻；迨此暇時須痛飲，他年長劍挂君頤。

次韻王鞏獨眠

居士身心如槁木，旅館孤眠體生粟；誰能相思琢白玉，服藥千朝償一宿。天寒日短銀燈續，欲往從之車脫

翰何人吹斷參差竹，泗水茫茫鳴頭綠。

次韻王鞏留別

去國已八年，故人今有誰？當時交游內，未數蔡克兒。豈無知我者，好爵半已糜。爭爲東閣吏，不顧北山移。公子表獨立，與世頗異馳。不詞千里遠，成此一段奇。蛾眉亦可憐，無奈思餅師。無人伴客寢，惟有支牀龜。君歸與何人？文字相娛嬉。持此調張子，一笑當脫頤。

登雲龍山

醉中走上黃茆岡，滿岡亂石如羣羊。岡頭醉倒石作牀，仰看白雲天茫茫。歌聲落谷秋風長，路人舉首東南望，拍手大笑使君狂。

次韻僧潛見贈

道人胸中水鏡清，萬象起滅無逃形。獨依古寺種秋菊，要伴騷人冷落英。人間底處有南北，紛紛鴻鴈何曾冥。閉門坐穴一禪榻，頭上歲月空崢嶸。今年偶出爲求法，欲與慧劍加鑿礪。雲衲新磨山水出，霜髭不翦兒童驚。公侯欲識不可得，故知倚市無傾城。秋風吹夢過淮水，想見橘柚垂空庭。故人各在天一角，相望落落如晨星。彭城老守何足顧，棗林桑野相邀迎。千山不憚荒店遠，兩脚欲趁飛旌輕。多生綺語磨不盡，尙有宛轉詩人情。猿吟鶴唳本無意，不知下有行人行。空墻夜雨自清絕，誰使掩抑啼孤惻。我欲仙山掇瑤草，傾筐坐歎何時盈。簿書鞭朴書填委，煮茗燒茶宜宵征。乞取摩尼照濁水，共看落月金盃傾。

次韻潛師放魚

法師說法臨泗水，無數天花隨塵尾。勸將淨業種西方，莫待夢中呼「起起」。一哀哉若魚竟坐口，遠愧知幾穆生醴。况逢孟簡對盧仝，不怕校人欺子產。疲民尙作魚尾赤，數罟未除吾願泚。法師自有衣中珠，不用辛苦少

泥底。

與舒教授張山人參寥師同遊戲馬臺書西軒壁兼簡顏長道二首

古寺長廊院院行，此軒偏慰旅人情。楚山西斷如迎客，汴水南來故繞城。路失玉鈞芳草合，林亡白鶴古泉清。淡游何以娛庠老，坐聽郊原琢磬聲。

竹杖芒鞋取次行，下臨官道見人情。天寒菽粟猶栖畝，日暮牛羊自入城。沽酒獨教陶令醉，題詩誰似皎公清？更尋陋巷顏夫子，乞取微言繼此聲。

滕縣時同年西園

人皆種榆柳，坐待十畝陰；我獨種松柏，守此一寸心。君看閭里間，盛衰日駸駸；種木不種德，聚散如飛禽。老時吾不識，用意一何深！知人得數士，重義忘千金。西園手所開，珍木來千岑；養此霜雪根，遲彼鸞鳳吟。池堙得流澗，龜魚自浮沉；幽桂日夜長，白花亂青衿。豈獨富草木，子孫已成林；拱把不知數，會當出千尋。樊侯種梓漆，壽張富華簪；我作西園詩，以為里人箴。

次韻王廷老和張十七九日見寄

霜葉投空雀啣籬，上樓筋力強扶持；對花把酒未甘老，膏面染須聊自欺。無事亦知君好飲，多才終恐世相糜。請看平日銜杯口，會有金椎為控頤。

次韻參寥師寄秦太虛三絕句時秦君舉進士不得

秦郎文字固超然，漢武憑虛意欲仙。底事秋來不得解，定中試與問諸天。一尾追風抹萬蹄，崑崙玄圃謂朝隤。回看世上無伯樂，却道鹽車勝月題。得喪秋毫久已冥，不須聞此氣崢嶸。何妨却伴參寥子，無數新詩咳唾成。

與參寥師行園中得黃耳蕈

遺化何時取象香法筵齋鉢久淒涼，寒蔬病甲誰能採落葉空畦半已荒。老楮忽生黃耳菌，故人兼致白牙薑。蕭然放筴東南去，又入春山筍蕨鄉。

百步洪二首（并敘）

王定國訪余於彭城，一日棹小舟與顏長道攜盼英、卿三子游泗水，北上聖女山，南下百步洪，吹笛飲酒，乘月而歸。余時以事不得往，夜着羽衣，佇立於黃樓上，相視而笑。以爲李太白死，世間無此樂三百餘年矣。定國既去，逾月復與參寥師放舟洪下，追懷曩游，已爲陳迹。喟然而歎，故作二詩。一以遺參寥，一以寄定國，且示顏長道、舒堯文，邀同賦云。

長洪斗落生跳波，輕舟南下如投梭。水師絕叫鳧雁起，亂石一線爭磋磨。有如兔走鷹隼落，駿馬下注千丈坡。斷絃離柱箭脫手，飛電過隙珠翻荷。四山眩轉風掠耳，但見流沫生千渦。嶮中得樂雖一快，何異水伯夸秋河。我生乘化日夜逝，坐覺一念逾新羅。紛紛爭奪醉夢裏，豈信荆棘埋銅駝。覺來俯仰失千劫，回視此水殊委蛇。君看岸邊蒼石上，古來篙眼如蜂窠。但應此心無所住，造物難欺如余何。回船上馬各歸去，多言曉曉師所呵。

佳人未肯回秋波，幼輿欲語防飛梭。輕舟弄水買一笑，醉中薄嬾肩相磨。不似長安閭里俠，貂裘夜走燕脂坡。獨將詩句擬鮑謝，涉江共採秋江荷。不知詩中道何語，但覺兩頰生微渦。我時羽服黃樓上，坐見織女初斜河。歸來箇聲滿山谷，明月正照金叵羅。奈何捨我入塵土，擾擾毛羣欺臥馳。不念空齋老病叟，退食誰與同委蛇。時來洪上看遺迹，忍見屐齒青苔窠。詩成不覺雙淚下，悲吟相對惟羊何。欲遣佳人寄錦字，夜寒手冷無人呵。

送參寥師

上人學苦空，百念已灰吟。劍頭惟一吷，焦穀無新穎。胡爲逐吾輩，文字爭蔚炳。新詩如玉雪，出語便澆警。退

之論草書萬事未嘗屏憂愁不平氣一寓筆所騁頗怪浮屠人視身如丘井頽然寄淡泊誰與發豪猛細思乃不然真巧非幻影欲令詩語妙無厭空且靜靜故了羣動空故納萬境閱世走人間觀身臥雲嶺醜酸雜衆好中有至味永詩法不相妨此語當更詰

夜過舒堯文戲作

先生堂前霜月苦弟子讀書喧兩廡推門入室書縱橫蠅紙燈籠晃雲母先生骨清少眠臥長夜默坐數更鼓耐寒石硯欲生冰得火銅餅如過雨郎君欲出先自贊坐客斂衽誰敢侮明朝阮籍過阿戎應作義之羨懷祖

十月十五日觀月黃樓席上次韻

中秋天氣未應殊不用紅紗照坐隅山下白雲橫匹素水中明月臥浮圖未成短棹還三峽已約輕舟泛五湖爲問登臨好風景明年還憶使君無

答王定民

開緘弈弈滿銀鈎書尾題詩語更道入法舊聞宗長史五言今復擬蘇州筆蹤好在留臺寺旗隊遙知到石澗欲寄鼠須并蠶紙請君章草賦黃樓

次韻王廷老退居見寄二首

浪蘂浮花不辨春歸來方識歲寒人回頭自笑風波地閉眼聊觀夢幻身北牖已安陶令榻西風還避庾公塵更搔短髮東南望試問今誰裏舊巾

接果移花看補籬腰鎌手斧不妨持上都新事長先到老圃閑談未易欺釀酒閉門開社壻殺牛留客解耕麋何時得見織纖玉右手持盃左捧頤

次韻長道韻送傅倅

雨見黃花掃落英，南山山寺遍題名；宗成不獨依岑范，魯衛終當似弟兄。去歲雲濤浮汴泗，與君泥土滿衣纓；如今別酒休詞醉，該聽雙洪落後聲。

雲龍山觀燒得雲字

丁女真水妃，寒山便火耘。隕霜知已殺，培戶聽初焚。束縵方燭燿，敲石俄氤氳。落點甘泉烽，橫煙楚塞氛。窮虵上喬木，潛蛟躡浮雲。驚飛墮傷雁，狂走迷癡麤。谷蟄起蜩鴛，山妖竄夔犢。野竹爆哀聲，幽桂飄窈芬。悲同秋照蟹，快若夏燎蚊。火牛入燕壘，燧象奔吳軍。崩騰井陘口，萬馬皆朱憤。搖曳驪山陰，諸姨爛紅裙。方隨長風卷，忽值絕澗分。我本山中人，習見匪獨聞。偶從二三子，來訪張隱君。君家亦何有，物象移朝曛。把酒看飛燼，空庭落繡紛。行觀農事起，畦壟如纈紋。細雨發春穎，嚴霜倒秋蕪。始知一炬力，洗盡狐兔羣。

和田國博喜雪

壽背月如晝，曉來雲暗天。玉花飛半夜，翠浪舞明年。瓊鬢無遺種，流亡稍占田。歲豐君不樂，鐘磬幾時編。田有服不樂。

祈雪霧猪泉出坡馬上作贈舒堯文

三年走吳越，踏遍千重山。朝隨白雲去，莫與栖鴉還。翮如得木杭，飛步誰能攀。一爲符竹累，坐老敲榜間。此行亦何事，聊散腰脚頑。浩蕩城西南，亂山如玦環。山下野人家，桑柘雜榛菅。歲晏風日暖，人牛相對閑。薄雪不蓋土，麥苗稀可刪。願君發豪句，嘲詼破天墜。

次韻舒堯文祈雪霧猪泉

長笑虵醫一寸腹，銜冰吐電何時足。蒼鵝無罪亦可憐，斬頸橫盤不敢哭。豈知泉下有猪龍，臥枕雷車踏陰軸。前年太守爲旱請，雨點隨人如撒菽。傳欽之曾禱此泉得雨。太守歸國龍歸泉，至今人詠淇園綠。我今又

復懼此早，凜凜疲民在溝瀆。却尋舊迹叩神泉，坐客仍攜王子淵。（欽之時客，惟舒在矣。）看草中和藥職，頌新聲妙語慰華顛。曉來泉上東風急，須上冰珠老蛟泣。怪詞欲逼龍飛起，嶮韻不量吾所及。行看積雪厚埋牛，誰與春工掀百墊。此時還復借君詩，餘力汰輶仍貫笠。揮毫落紙勿言疲，驚龍再起震失匙。

石炭（井引）

彭城舊無石炭，元豐元年十二月始遣人訪獲於州之西南，白土鎮之北，以治鐵作兵，犀利勝常云。

君不見前年雨雪行人斷，城中居民風裂骨。濕薪半束抱衾裯，日莫敲門無處換。豈料山中有遺寶，磊落如鑿萬車炭。流膏迸液無人知，陣陣腥風自吹散。根苗一發浩無際，萬人鼓舞千人看。投泥潑水愈光明，爍玉流金見精悍。南山栗林漸可息，北山頑鑛何勞鋸。爲君鑄作百煉刀，要斬長鯨爲萬段！

人日獵城南會者十人以一身輕一鳥過槍急萬人呼一爲韻賦得鳥字

兒童笑使君，憂愠長悄悄。誰拈白接羅，令跨金腰褭。東風吹濕雪，手冷怯清曉。忽發兩鳴鶴，相逐飛蟲小。放弓一長嘯，目送孤鴻矯。吟詩忘鞭撻，不語頭自挑。歸來仍脫粟，鹽豉煮芹蓼。何似雷將軍，兩眼霜鶻皎。黑頭已爲將，百戰意未了。馬上倒銀餅，得免不暇燂。少年負奇志，蹭蹬百憂繞。回首英雄人，老死已不少。青春還一夢，餘年真過鳥。莫上呼鷹臺，平生笑劉表。

將官雷勝得過字代作

胡騎入雲中，急烽連夜過。短刀穿虜陣，濺血貂裘洩。一來輦轂下，愁悶惟欲臥。今朝從公獵，稍覺天宇大。一雙鐵絲箭，未發手先唾。射殺雪毛狐，腰間餘一箇。

臺頭寺步月得人字

風吹河漢掃微雲，步履中庭月趁人。溫溫爐香初泛夜，離離花影欲搖春。遙知金闕同清景，想見氍毹車輞暗。

塵；回首舊游真是夢，一簪華髮岸綸巾。

臺頭寺送宋希元

相從傾蓋只今年，送別南臺便黯然；入夜更歌金縷曲，他時莫忘角弓篇。是日與宋君同栽松寺中。三年不顧東鄰女，（取宋玉）二頃方求負郭田。（取季子）我欲歸休君未可，茂先方議斷龍泉。

種松得俸字（其四在懷古堂，其六在石經院）

春風吹榆林，亂英飛作堆；荒園一雨過，戢戢千萬栽。青松種不生，百株望一枚；一枚已有餘，氣壓千畝槐。野人易斗粟，云自魯祖徠；魯人不知貴，萬竈飛青煤。束縛同一車，胡爲乎來哉？泫然解其縛，清衆洗浮埃。枝傷葉尙困，生意未肯回；山僧老無子，養護如嬰孩。坐待走龍蛇，清陰滿南臺。孤根裂山石，直幹排風雷。我今百日客，養此千歲材。（時去替不百日）伏苓無消息，雙鬢日夜摧。古今一倏仰，作詩寄餘哀。

作詩寄王晉卿忽憶前年寒食北城之游走筆爲此詩

北城寒食烟火微，落花胡蝶作團飛；王孫出游樂忘歸，門前驄馬紫金鞿。吹笙帳底煙霏霏，行人舉頭誰敢睜？扣門狂客君不塵，更遺傾城出翠幃。書生老眼省見稀，畫圖但覺周昉肥；別來春物已再非，西望不見紅日圍。何時東山歌采薇，把瓊一聽金縷衣。

往在東武與人往反作繁字韻詩四首今黃魯直亦次韻見寄復和答之

符堅破荆州，止獲一人半；中郎老不遇，但喜識元歎。我今獨何幸，文字厭奇玩；又得天下才，相從百憂散。陰求我輩人，規作林泉伴；寧當待垂老，倉卒收一旦。不見梁伯鸞，空對孟光案；才難不其然，婦女廁周亂。世豈無作者？於我如既盥；獨喜誦君詩，咸韶音節緩。夜光一已多，矧獲纍纍貫；相思君欲瘦，不往我真懦。吾儕眷微祿，寒夜抱寸炭；何時定相過，徑就我乎館。飄然東南去，江水清且暖；相與訪名山，微言師忍粲。

雪齋（杭僧法言作雪山於齋中）

君不見峨眉山西雪千里，北望城都如井底。春風百日吹不消，五月行人如凍蟻。紛紛市人爭奪中，誰信言公似贊公。人間熱惱無處洗，故向西齋作雪峰。我夢扁舟適吳越，長廊靜院燈如月。開門不見人與牛，惟見空庭滿山雪。（言有詩見寄云：「林下閑看水牯牛。」）

以雙刀遺子由，子由有詩次其韻。

寶刀匣不見，但見龍雀銀。何曾斬蛟虵，亦未切瓊玕。胡爲穿窬輩，見之要領寒。吾刀不汝問，有愧在其肝。念此乃自藏，包之虎皮斑。湛然如古井，終歲不復瀾。不憂無所用，憂在用者難。佩之非其人，匣中自長歎。我老衆所易，屢遭非意干。惟有王玄通，堵庭秀芳蘭。知子後必大，故擇刀所便。屠狗非不用，一歲六七剗。欲試百鍊剛，要須更泥蟠。作詩銘其背，以待知者看。

游桓山會者十人以「春水滿四澤，夏雲多奇峯」爲韻得澤字。

東郊欲尋春，未見鶯花迹。春風在流水，鳧鴈先拍拍。孤帆信溶漾，弄此半篙碧。艤舟桓山下，長嘯理輕策。彈琴石室中，幽響清磔磔。弔彼泉下人，野火失枯臘。悟此人間世，何者爲真宅。暮回百步洪，散坐洪上石。愧我非王襄，子淵肯見客。臨流吹洞簫，水月熙連壁。（謂王氏兄弟也。）此歡真不朽，回首歲月隔。想象斜川游，作詩繼彭澤。

戴道士得四字代作

少小家江南，寄迹方外士。偶隨白雲出，賣藥彭城市。雪霜侵鬢髮，塵上汗冠袂。賴此三尺桐，中有山水意。自從夷夏亂，七絲久已棄。心知鹿鳴三，不及胡琴四。使君獨慕古，嗜好與衆異。共弔桓魋宮，一灑孟嘗淚。歸來銷塵匣，獨對斷絃喟。挂名石壁間，寂寞千歲事。

次韻田國博部夫南京見寄一絕

歲月翩翩下坂輪，歸來杏子已生仁。深紅落盡東風惡，柳絮榆錢不當春。
火冷錫稀杏粥稠，青裙縞袂餉田頭。大夫行役家人怨，應羨居鄉馬少游。

月夜與客飲酒杏花下

杏花飛廉散餘春，明月入戶尋幽人。寒衣步月踏花影，炯如流水涵青蘋。
花間置酒清香發，爭挽長條落香雪。山城薄酒不堪飲，勸君且吸盃中月。
洞簫聲斷月明中，惟憂月落酒杯空。明朝卷地春風惡，但見綠葉棲殘紅。

送蜀人張師厚赴殿試二首

忘歸不覺鬢毛斑，好事鄉人尙往還。斷嶺不遮西望眼，送君直過楚王山。
雲龍山下試春衣，放鶴亭前送落暉。一色杏花三十里，新郎君去馬如飛。

再次韻答田國博部夫還二首

西郊黃土沒車輪，滿面風埃笑路人。已放役夫三萬指，從教積雨洗殘春。
枝上稀疎地上稠，忍看紅糝落牆頭。風流別乘多才思，歸趁西園秉燭游。

田國博見示石炭詩有「鑿劍斬佞臣」之句次韻答之

楚山鐵炭皆奇物，知君欲斫姦邪窟。屬鏤無眼不識人，楚國何曾斬無極。
玉川狂直古遺民，救月裁詩語最真。千里妖蠖一寸鐵，地上空愁蠹蝨臣。

答郡中同僚賀雨

水旱行十年，飢疫遍九土。奇窮所向惡，歲歲祈晴雨。雖非爲己求，重請終愧古。
鬼神亦知我，老病入腰膂。何曾拜向人，此意難不許。重雲淒已合，微潤先流礎。
蕭蕭止還作，坐聽及三鼓。天明將吏集，泥土滿靴屨。登城望隴

麥綠浪風掀舞，愧我賢友生。雄篇鬥新語，君看大熟歲。風雨占十五，天地本無功。祈禳何足數，渡河不入境。豈若無蝗虎，而况刑白鵝，下策君勿取！

罷徐州往南京馬上走筆寄子由五首

吏民莫扳援，歌管莫悽咽。吾生如寄耳，寧獨爲此別。別雖隨處有，悲惱緣愛結。而我本無思，此涕誰爲設。紛紛等兒戲，鞭韉遭割截。道邊雙石人，幾見太守發。有知當解笑，撫掌冠纓絕。

父老何自來，花枝鬢長紅。洗殘拜馬前，請壽使君公。前年無使君，魚鼈化兒童。一舉鞭謝父老，正坐使君窮。窮人命分惡，所向招災凶。水來非吾過，去亦非吾功。

古汴從西來，迎我向南京。東流入淮泗，送我東南行。暫別還復見，依然有餘情。春雨漲微波，一夜到彭城。過我黃樓下，朱欄照飛甍。可憐洪上石，誰聽月中聲。

前年過南京，麥老櫻桃熟。今來舊遊處，櫻麥半黃綠。歲月如宿昔，人事幾反覆。青衫老從事，坐穩生髀肉。聯翩聞三守，迎送如轉轂。歸耕何時決，田舍我已卜。

卜田向何許，石佛山南路。下有爾家川，畦種秔稌。山泉宅龍蜃，平地走膏乳。異時畝一金，近欲爲逃戶。逝將解簪紱，賣劍買牛具。故山豈不懷，廢宅生蒿櫓。便恐桐鄉人，長祠仲卿墓。

次韻曹九章見贈

遽瑗知非我所師，流年已似手中著。正平獨肯從文舉，中散何曾斬孝尼。賣劍買牛真欲老，得錢沽酒更無疑。雞豚異日爲同社，應有千篇唱和詩。

書泗州孫景山西軒

落日明孤塔，青山燒病身。知君向西望，不愧塔中人。

過淮三首贈景山兼寄子由

好在長淮水，十年三往來。功名真已矣，歸計亦悠哉。今日風憐客，平時浪作堆。晚來洪澤口，捍索響如雷。過淮水漸好，松檜亦蒼然。藹藹藏孤寺，冷冷出細泉。故人真吏隱，小檻帶巖偏。却望臨淮市，東風語笑傳。回首離陽幕，簿書高沒人。何時桐柏水，一洗庾公塵。此去漸佳境，獨游長慘神。待君詩百首，來寫浙西春。

舟中夜起

微風蕭蕭吹菰蒲，開門看雨月滿湖。舟人水鳥兩同夢，大魚驚竄如奔狐。夜深人物不相管，我獨形影相嬉娛。暗潮生渚弔寒蜩，落月挂柳看懸蛛。此生忽忽憂患裏，清境過眼能須臾。雞鳴鐘動百鳥散，船頭擊鼓還相呼。

余去金山五年而復至次舊詩韻贈寶覺長老

誰能斗酒博西涼，但愛齋廚法豔香。舊事真成一夢過，高談爲洗五年忙。清風偶與山阿曲，明月聊隨屋角方。稽首願師憐久客，直將歸路指茫茫。

遊惠山（并敘）

余昔爲錢塘倅，往來無錫未嘗不至惠山。旣去五年，復爲湖州，與高郵秦太虛、杭僧參寥同至，覽唐處士王武陵竇羣朱宿所賦詩，愛其語清簡，蕭然有出塵之姿，追用其韻，各賦三首。

夢裏五年過，覺來雙鬢蒼。還將塵土足，一步漪瀾堂。俯窺松桂影，仰見鴻鶴翔。炯然肝肺間，已作冰玉光。虛明中有色，清淨自生香。還從世俗去，永與世俗忘。

薄雲不遮山，疎雨不濕人。蕭蕭松徑滑，策策芒鞋新。嘉我二三子，皎然無淄磷。勝游豈殊昔，清句仍絕塵。弔古泣舊史，疾讒歌小旻。哀哉扶風子，難與巢許鄰。（謂竇羣）

敲火發山泉，烹茶避林樾。明牕傾紫瓊，色味兩奇絕。吾生眠食耳，一飽萬想滅。頗笑玉川子，飢弄三百月。豈

如山中人，睡起山花發；一甌誰與共？門外無來轍。

贈惠山僧惠表

行遍天涯意未闌，將心到處遣人安；山中老宿依然在，案上楞嚴已不看。欹枕落花餘幾片，閉門新竹自千竿；客來茶罷空無有，盧橘楊梅尚帶酸。

贈錢道人

書生苦信書，世事仍臆度；不量力所負，輕出千鈞諾。當時一快意，事過有餘恡！不知幾州鐵，鑄此一大錯？我生涉憂患，常恐長罪惡；靜觀殊可喜，脚淺猶容却。而况錢夫子，萬事初不作；相逢更何言，無病亦無藥。

與秦太虛參寥會于松江而開彥長徐安中適至分韻得風字二一首

吳越溪山興未窮，又扶衰病過垂虹；浮天自古東南水，送客今朝西北風。絕境自忘千里遠，勝游難復五人同；舟師不會留連意，擬看斜陽萬頃紅。

三子緣詩老更窮，人間無處吐長虹；平生睡足連江雨，盡日舟橫擘岸風。人笑年來三黜憤，天教我輩一樽同；知君欲寫長相憶，更送銀盤尾鬣紅。

次韻關令送魚

舉網驚呼得巨魚，饒涎不易忍流酥；更煩赤脚長須老，來趁西風十幅蒲。

卷十一 詩七十二首

次韻秦太虛見戲耳聾

君不見詩人借車無可載，留得一錢何足賴？夢年更似社陵翁，右臂雖在耳先聾。人將蟻動作牛鬪，我覺風

雷真一噫！聞塵掃盡根性空，不須更枕清流派。大朴初散失混沌，六鑿相攘更勝敗。眼花亂墜酒生風，口業不停詩有債。君知五蘊皆是賊，人生一病今生差。但恐此心終未了，不見不聞還是礙。今君疑我特佯聾，故作嘲詩窮嶮怪。須防額癢出三耳，莫放筆端風雨快！

端午遍遊諸寺得禪字

肩輿任所適，遇勝輒留連。焚香引幽步，酌茗開淨筵。微雨止還作，小窗幽更妍。盆山不見日，草木自蒼然。忽登最高塔，眼界窮大千。下峰照城郭，震澤浮雲天。深沉既可喜，曠蕩亦所便。幽尋未云畢，墟落生晚煙。歸來記所歷，耿耿清不眠。道人亦未寢，孤燈同夜禪。

送劉寺丞赴餘姚

中和堂後石楠樹，與君對牀聽夜雨。玉笙哀怨不逢人，但見香煙橫碧縷。謳吟思歸出無計，坐想蟋蟀空房語。明朝開鑿放觀潮，豪氣正與潮爭怒。銀山動地君不看，獨愛清香生雪霧。別來聚散如宿昔，城郭空存鶴飛去。我老人間萬事休，君亦洗心從佛祖。手香新寫法界觀，眼淨不覩登伽女。餘姚古縣亦何有，龍井白泉甘勝乳。千金買斷顧渚春，似與越人降日注。

李公擇過高郵見施大夫與孫莘老賞花詩憶與僕去歲會于彭門折花餽荀故事作詩二十四韻見戲依韻奉答亦以一戲公擇云爾

汝陽真人天，絹帽著紅椹。纏頭三百萬，不買一微哂。共誇青山峰，曲盡花不隕。當時謫仙人，逸韻謝封豨。詩成天一笑，萬象解寒窘。驚開小桃杏，不待雷發軫。餘波尚涓滴，乞與居易稊。爾來誰復見，前輩風流盡。寂寞兩詩人，殘紅對櫻筍。飢腸得一醉，妙語傳不泯。君求恨不與，一去更復相牽引。我老心已灰，空煩扇餘燼。天遊照六鑿，虛室掃充物。懸知色竟空，那復嗜鳥吻。蕭然一方丈，居士老龐蘊。散花從滿鉢，不答天女問。故人猶故目，怨句

寫餘恨疑我此心在，遮防費欄楯。應虞已斃虵，折尾時一蠢。仄聞孟光賢，未學處仲忍。開閣放出事，見本傳。寄招應已足，左右侍雲糞。何時花月夜，羊酒謝不敏。此生如幻耳，戲語君勿愠。應同亡是公，一對子虛聽。

王鞏清虛堂

清虛堂裏王居士，閉眼觀身如止水。水中照見萬象空，敢問堂中誰隱几。吳興太守老且病，堆案滿前長渴睡。願君勿笑反自觀，夢幻去來殊未已。長疑安石恐不免，未信犀首終無事。勿將一念住清虛，居士與我蓋同耳。

和孫同年卜山龍洞禱晴

吳興連月雨，釜甑生魚蛙。往問卜山龍，曷不安厥家。糗空上巉絕，俯視驚餘鈇。神井湧雲蓋，陰崖垂薜花。交流百道泉，赴谷走羣虵。不知落何處，隱隱如縲車。我來叩百戶，飛鼠翻白鴉。寄語洞中龍，睡味豈不嘉。兩師少拜節，雷師亦停櫬。積水得反壑，稻苗出泥沙。農夫免菜色，龍亦飽豚豕。看君擁黃紬，高臥放晚衙。

乘舟過買收水閣收不在見其子三首

愛酒陶元亮，能詩張志和。青山來水檻，白雨滿漁蓑。淚垢添丁面，貧低舉案蛾。不知何所樂，竟夕獨酣歌。瀾瀾風蒲亂，猗猗水荇長。小舟浮鴨綠，大杓瀉鵝黃。得意詩酒社，終身魚稻鄉。樂哉無一事，何處不清涼。曳杖青苔岸，繫船枯柳根。德公方上冢，季路獨留言。已占蒲魚港，更開松菊園。從茲來往數，兒女自饜門。

次韻孫秘丞見贈

感慨清哀似變風，老於詩句耳偏聰。迂疎自笑成何事，冷淡誰能用許功。不怕飛蚊如立豹，肯隨白鳥過垂虹。吟哦相對忘三伏，擬泛冰溪入雪宮。潮州多蚊豹，脚有毒垂虹。吳江亭名。

與客遊道場何山得鳥字

清溪到山盡，飛路盤空小。紅亭與白塔，隱見喬木杪。中休得小庵，孤絕寄雲表。洞庭在北戶，雲水天渺渺。庵

僧俗緣盡，淨業洗未了；十年畫鵲竹，益以詩自繞。高堂儼像設，禪室各深窈；奔泉何處來？華屋過溪沼。何山隔幽谷，去路清且悄；長松度翠蔓，絕壁掛啼鳥。我友自杭來，尙歎所歷少；歸塗風雨作，一洗紅日燦。俄驚萬竅號，黑霧卷蓬藪；舟人紛變色，坐羨輕鷗矯。我獨換酒杯，醉死勝流殍；書生例強很，造物空煩擾。更將掀舞勢，把燭畫風篠。美人爲破顏，正似腰支嬈。明朝便陳迹，清景墮空杳；作詩記餘歡，萬古一昏曉。

僕去杭五年，吳中仍歲大飢，疫故人往往逝去，聞湖上僧舍不復往日繁麗，獨淨慈本長老學者益盛，作此詩寄之。

來往三吳一夢間，故人半作冢壘然。獨依舊社傳真法，要與遺民度厄年。趙叟近聞還印綬，竺翁先已返林泉。何時杖策相隨去，任性逍遙不學禪。

船趨風（并引）

吳中梅雨既過，颯然清風彌旬。歲歲如此，湖人謂之船趨風。是時海舶初回，云：此風自海上，與舶俱至。云爾。

三旬已過梅黃雨，萬里初來船趨風。幾處縈回度山曲，一時清駛滿江東。驚飄蔌蔌先秋葉，喚醒昏昏嗜睡翁。欲作蘭臺快哉賦，却嫌分別問雌雄。

丁公默送酒

溪邊石蟹小如錢，喜見輪囷赤玉盤。半殼含黃宜點酒，兩餐斫雪勸加餐。蠻珍海錯聞名久，怪雨腥風入座寒；堪笑吳興饒太守，一詩換得兩尖團。

送孫著作赴考城兼寄錢醇老李邦直二君於孫處有書見及

使君閑如雲，欲出誰肯伴？清風獨無事，一嘯亦可喚。來從白蘋洲，吹我明月觀。門前遠行客，青衫流白汗。問

子何怱怱？王事不可緩；故人錢與李，清廟兩圭瓚。蔚爲萬乘器，尙記溝中斷；子亦東南珍，價重不可算。別情何以慰？酒盡對空案；惟持一榻涼，勸子巾少岸。此風那復有？塵土飛灰炭；欲寄二大夫，發發不可絆。

泛舟城南會者五人分韻賦詩得「人皆苦炎」字四首

城中樓閣似魚鱗，不見清風起白蘋；試選茗溪最深處，仍呼我輩不羈人。窺船野鶴何曾下？見燭飛蟲空自馴；遠郭荷花一千頃，誰知六月下塘春。

苦熱誠知處處皆，何當危坐學心齋；海螵要共詩人把，溪月行遭霧雨霾。鄉國飄零斷書信，弟兄流落隔江淮；便應築室茗溪上，荷葉遮門水浸階。

紫蟹鱸魚賤如土，得錢相付何曾數；碧筩時作象鼻彎，白酒微帶荷心苦。運肘風生看斫脰，隨刀雪落驚飛縷；不將醉語作新詩，飽食應慚腹如鼓。

橋上游人夜未厭，共依水檻立風簷；樓中煮酒初嘗芡，月下新粧半出簾。南郭清游繼顏謝，北窗歸臥等羲炎；人間寒熱無窮事，自笑疎頑不受沾。

次韻李公擇梅花

詩人固長貧，日午飢未動；偶然得一飽，萬象困嘲弄。尋花不論命，愛雪長忍凍；天公非不憐，聽飽卽喧闕。君爲三郡守，所至滿賓從；江湖常在眼，詩酒事豪縱。奉使今折磨，清比於陵仲；永懷茶山下，攜妓脩春貢。更憶檻泉亭，插花雲鬢重；蕭然臥灑麓，愁聽春禽哢。忽見早梅花，不飲但孤諷；詩成獨寄我，字字愈頭痛。嗟君本侍臣，筆橐從上雍；脫鞵吟芍藥，給札賦雲夢。何人慰流落，嘉蔭天爲種；杯傾笛中吟，帽拂果下鞞。感時忘羈旅，此意吾儕共！故山亦何有？桐花集么鳳。君亦憶匡廬，歸掃藏書洞；何當種此花，各抱漢陰甕。

送淵師歸徑山

我昔嘗爲徑山客，至今詩筆餘山色；師住此山三十年，妙語應須得山骨。溪城六月水雲蒸，飛蚊猛捷如花鷹；羨師方丈冰雪冷，蘭膏不動長明燈。山中故人知我至，爭來問訊「今何似」？爲言「百事不如人，兩眼猶能書細字。」（徑山夏無蚊，余舊詩云「問龍乞水歸洗眼，欲看細字消殘年。」）

送表忠觀錢道士歸杭

先王舊德在民心，著令稱忠上意深。墮淚行看會祠下，挂名爭欲刻碑陰。淒涼破屋塵凝座，憔悴雲孫雪滿簪；未信諸豪容郭解，却從他縣施千金。

次韻周開祖長官見寄

俯仰東西閱數州，老於岐路豈伶優。初聞父老推謝令，旋見兒童迎細侯。政拙年年祈水旱，民勞處處避嘲謳；河吞巨野那容塞，盜入蒙山不易搜。仕道固應慙孔孟，扶顛未可責求由。斯謀田舍猶懷祿，未脫風濤且傍洲。罔罔可憐真喪狗，時時相觸是虛舟。竭來震澤都如夢，只有苕溪可倚樓。齋釀酸甜如密水，樂工零落似風甌。遠思顏柳并諸謝，近憶張（子野）陳（令舉）與老劉（孝叔）。風定軒窗飛豹脚，雨餘欄檻上蝸牛。舊遊到處皆蒼蘚，同甲惟君尚黑頭。憶昔湖山共尋勝，相逢杯酒兩忘憂。醉看梅雪清香過，夜棹風船骸汗流。百首共成山上集，三人俱作月中遊。海南未起垂天翼，澗底仍依徑寸麻。已許秋風歸過我，預憂詩筆老難醜。此生歲月行飄忽，晚節功名亦繆悠。犀首正緣無事飲，馮驩應爲有魚留。從今便踏青州麴，薄酒知君笑督郵。

林子中以詩寄文與可及余與可，旣沒追和其韻

斯人所甚厭，投畀每不受。欲其少須臾，奪去惟恐後。云誰尸此職，無乃亦假守。賦才有巨細，無異斛與牛。胡不安其分，但聽物所誘。時來各飛動，意合無妍醜。坐令雞栖車，長載朱伯厚。平生無一旅，旣死咤萬口。自聞與可亡，胸臆生堆阜。懸知臨絕意，要我一執手。相望五百里，安得自其牖。遺文付來哲，後事待諸友。伶俜穉紹孤，老病

孟光偶；世人賤目見，爭笑千金帚。君詩與楚詞，識者當有取；但知愛墨竹，此歎吾已久。故人多厚祿，能復哀君否？不見林與蘇，飢寒自奔走！

與王郎昆仲及兒子邁遊城觀荷花登岷山亭晚入飛英寺分韻得「月明星稀」四首

昨夜雨鳴渠，曉來風襲月；蕭然欲秋意，溪水清可啜。環城三十里，處處皆佳絕；蒲蓮浩如海，時見舟一葉。此間真避世，青蘿低白髮；相逢欲相問，已逐驚鷗沒。

清風定向物，可愛不可名；所至如君子，草木有嘉聲。我行本無事，孤舟任斜橫；中流自偃仰，適與風相迎。舉杯屬浩渺，樂此兩無情；歸來兩溪間，雲水夜自明。

茗水如漢水，鱗鱗鴨頭青；吳興勝襄陽，萬瓦浮青溟。我非羊叔子，愧此岷山亭；悲傷意則同，歲月如流星。從我兩王子，高鴻插脩翎；湛輩何足道，當以德自銘！

吏民憐我懶，鬪訟日已稀；能爲無事飲，可作不夜歸。復尋飛英遊，盡此一寸暉；撞鐘履聲集，顛倒雲山衣。我來無時節，杖屨自推扉；莫作使君看，外似中已非。

城南縣尉水亭得長字

兩尉鬱相望，東南百步場；插旗蒲柳市，伐鼓水雲鄉。已作觀魚檻，仍開射鴨堂；全家依畫舫，極目亂紅粧。嫩波頭細，疎疎雨脚長；我來閑濯足，溪漲欲浮牀。澤國山圍裏，孤城水影傍；欲知歸路處，葦外記風檣。

與胡祠部遊法華山

陂湖欲盡山爲界，始見寒泉落高派；道人未放泉出山，曲折虛堂瀉清快。使君年老尙兒戲，綠棹紅船雜塵滓；一笑翻杯水濺裙，餘懼濯足波生隘。長松攬天龍起立，蒼藤倒谷雲崩壞；仰穿蒙密得清曠，一覽震澤吁可怪。

誰云四萬八千頃，渺渺東盡日所曠。歸塗千里盡風荷，清唱一聲聞露薤。（是日樂工有作此聲者）嗟余少小，菓真隱，白髮青衫天所械，忽逢佳士與名山，何異枯楊便馬疥。君猶鸞鶴偶飄墮，六翮如雲豈長鑿，不將新句紀茲遊，恐負山中清淨債。

又次前韻賈耘老

具區吞滅三州界，浩浩湯湯納千派；從來不著萬斛船，只許漁舟恣奔快。仙壇古洞不可到，空聽餘瀾鳴滌海；今朝偶上法華嶺，縱觀始覺人寰隘。山頭臥碣弔孤冢，下有至人僵不壞；空餘白棘網秋蟲，無復青蓮出幽怪。（事見本院碑）我來徙倚長松下，欲攝伏苓親洗晒；聞道山中富奇藥，往往靈芝雜薤薹。詩人空腹待黃精，三事只看長柄械；（杜子美詩云：「長纜短纜白木柄，我生託子以爲命。」）今年大熟期一飽，食葉微蟲真癖疥。（耘云：「今歲有小蟲食根葉，不甚爲害。」）白花半落紫穠香，攘臂欲助磨鎌鑿；安得山泉變春酒，與子一洗尋常債！

趙閱道高齋

見公奔走謂公勞，聞公隱退云公高；公心底處有高下，夢幻去來隨所遭。不知高齋竟何義，此名之設緣吾曹；公年四十已得道，俗緣未盡餘伊臯。功名富貴俱逆旅，黃金知繫何人袍；超然已了一大事，挂冠而去真秋毫。坐看猿猱落置罔，兩手未肯置所操；乃知賢達與愚陋，豈直相去九牛毛。長松百尺不自覺，企而羨者蓬與蒿；我欲贏糧往問道，未應舉臂詞盧敖。

送俞節推（尚之子尚字退翁）

吳興有君子，淡如朱絲琴，一唱三太息，至今有遺音。嗟余與夫子，相避如辰參；（退翁官于蜀，余在京師，余歸而退翁去，及余官於吳興，則退翁亡矣。）猶喜見諸郎，窈然清且深。異時多良士，末路喪初心！我生不有命，其

肯枉尺尋！

次韻答孫侔

十年身不到朝廷，欲伴騷人賦落英；但得低頭拜東野，不詞中路伺淵明。艤舟若書人安在？卜築江淮計已成；千里論交一言足，與君蓋亦不須傾。

重寄一首

凜然高節照時人，不信微官解洗君；蔣濟謂能來阮籍，薛宣真欲吏朱雲。好詩衝口誰能擇？俗子疑人未遣聞；乞取千篇看俊逸，不將輕比鮑參軍。

次韻和劉貢甫登黃樓見寄并寄子由二首

清派連淮上，黃樓冠海隅；此詩尤偉麗，夫子計魁梧。（劉為人短小）

世俗輕瑚璉，巾箱襲礪砮；坐令乘傳遠，奔走為儲須。邂逅我已失，登臨誰與俱？貧倉倉氏粟，身聽治家撫。會合難前定，歸休試後圖。腴田未可買，窮鬼却須呼。（本欲買田於泗上，近已不遂矣。）二水何年到雙洪，不受臚。至今清夜夢，飛轡策天吳。（此詩寄劉。）

與子皆去國，千年天一隅。數奇逢惡歲，計拙集枯梧。好士餘劉表，窮交憶灌夫；不矜持漢節，猶許攬桓須。倩句金絲合，高樓雪月俱；吟哦出新意，指畫想前樞。（子由初赴南京送之出東門，登城上，覽山川之勝，云：「此地可作樓觀。」於是始有改築之意。）自寫千言賦，新裁六幅圖。（近以絹自寫子由黃樓賦，為六幅圖，甚妙。）傳看一坐聳，勸著尺書呼。莫使騷人怨，東游不到吳。（此詩寄子由。）

陳州與文郎逸民飲別攜手河堤上作此詩

白酒無聲滑瀉油，醉行堤上散吾愁；春風料峭羊角轉，河水渺綿瓜蔓流。君已思歸夢巴峽，我能未到說黃

州；此生聚散何窮已，未忍悲歌學楚囚！

子由自南都來陳三日而別

夫子自逐客，向能哀楚囚；奔馳二百里，徑來寬我憂。相逢知有得，道眼清不流；別來未一年，落盡驕氣浮。嗟我晚聞道，款啓如孫休；至言雖久服，放心不自收。悟彼善知識，妙藥應所投；納之憂患場，磨以百日愁。冥頑雖難化，鐫發亦已周；平時種種心，次第去莫留。但餘無所遺，永與夫子游；此別何足道，大江東西州。畏虺不下榻，睡足吾無求；便爲齊安民，何必歸故丘？

正月十八日蔡州道上遇雪次子由韻二首

蘭菊有生意，微陽回千根；方夢集莫雪，復喜迎朝暉。憶我故居室，浮光動南軒；松竹半傾瀉，未數葵與萱。三徑瑤草合，一瓶井花溫；至今行吟處，向餘屐鳥痕。一朝出從仕，永愧李仲元；晚歲益可羞，犯雪方南奔。山城買廢圃，槁葉手自掀；長使齊安人，指說故侯園。

鉛膏染髭須，旋露霜雪根；不如閉目坐，舟府夜自嗽。誰知憂患中，方寸寓羲軒；大雪從壓屋，我非兒女萱。平生學踵息，坐覺兩鬢溫；下馬作雪詩，滿地鞭箠痕。佇立望原野，悲歌爲黎元；道逢射獵子，遙指狐兔奔。蹤跡尙可尋，窟穴何足掀；寄謝李丞相，吾將反丘園。

過新息留示鄉人任師中（任時知靈州亦坐事對獄）

昔年嘗羨任夫子，卜居新息臨淮水；怪君便爾忘故鄉，稻熟魚肥信清美。竹陂鴈起天爲黑，小竹陂在縣北；桐柏煙橫山半紫，（桐柏廟在縣南）知君坐受兒女困，悔不先歸弄清泚。塵埃我亦夫收身，此行蹭蹬尤可鄙；寄食方將依白足，附書未免煩黃耳。往雖不及來有年，詔恩倘許歸田里；却下關山入蔡州，爲買烏犍三百尾。（黃州出水牛）

過淮

朝離新息縣，初亂一水碧。莫宿淮南村，已渡千山赤。巖巖號古戍，霧雨暗破驛。回頭梁楚郊，永與中原隔。黃州在何許，想像雲夢澤。吾生如寄耳，初不擇所適。但有魚與稻，生理已自畢。獨喜小兒子，少小事安佚。相從艱難中，肝肺如鐵石。便應與晤語，何止寄衰疾。（時家在子由處，獨與兒子邁南來。）

書磨公詩後（并敘）

過加祿鎮，南二十五里，大許店休焉。于逆旅祁宗祥家，見壁上有幅紙，題詩云：「滿院秋光濃欲滴，老僧倚杖青松側。只怪高聲問不響，嗔余踏破蒼苔色。」其後題云：「滢水僧寶磨。」宗祥謂余：「此光黃間狂僧也，年百三十，死於熙寧十年，既死，人有見之者。」宗祥言其異事甚多，作是詩以識之。磨公本名清戒，俗謂之戒和尚云。

磨公昔未化，來往淮山曲。壽逾兩甲子，氣壓諸尊宿。但嗟濁惡世，不受龍象蹴。我來不及見，悵望空遺躡。霜顛隱白毫，鎖骨埋青玉。皆云似達磨，隻履還天竺。壁間餘清詩，字勢頗拔俗。爲吟五字偈，一洗凡眼肉。

游淨居寺（并敘）

寺在光山縣南四十里，大蘇山之南，小蘇山之北。寺僧居仁爲余言：「齊天保中，僧思惠過此，見父老問其姓，曰蘇氏，又得二山名，乃歎曰：『吾師告我，遇三蘇則往。』遂留結庵，而父老竟無有，蓋山神也。其後僧智顛見思於此山，而得法焉。則世所謂思大和尚智者，大師是也。唐神龍中，道岸禪師始建寺於其地。廣明庚子之亂，寺廢於兵火，至乾興中，乃復，而賜名曰梵天。」云。

十載遊名山，自製山中衣。願言畢婚嫁，攜手老翠微。不悟俗緣在，失身蹈危機。刑名非夙學，陷穿損積威。遂恐死生隔，永與雲山違。今日復何日，芒鞋自輕飛。稽首兩足尊，舉頭雙涕揮。靈山會未散，入都猶光輝。願從二聖

往，一洗千劫非；徘徊竹溪月，空翠搖煙霏。鐘聲自送客，出谷猶依依；回首吾家山，歲晚將焉歸？

梅花二首

春來幽谷水潺潺，的皪梅花草棘間；一夜東風吹石裂，半隨飛雪渡關山。
何人把酒慰深幽？開自無聊落更愁；幸有清溪三百曲，不詞相送到黃州。

戲作種松

我昔少年日，種松滿東園；初移一寸根，瑣細如插秧。二年黃茅下，一一攢麥芒；三年出蓬艾，滿山散牛羊。不見十餘年，想作龍蛇長；夜風波浪碎，朝露珠瓊香。我欲食其膏，已伐百本桑。（煮松脂法，用桑柴灰水。）人事多乖迕，神藥竟渺茫！竭來齊安野，夾路須髻蒼；會開龜蛇窟，不惜斤斧瘡。縱未得伏苓，且當拾流肪。釜盎百出入，皎然散飛霜。槁死三彭仇，凜煥五谷腸；青骨凝綠髓，丹田發幽光。白髮何足道，要使雙瞳方；却後五百年，騎鶴還故鄉。

萬松亭（并敘）

麻城縣令張毅植萬松於道，周以莛，行者且以名其亭，去未十年，而松之存者十不及三四。傷來者之不同其意也，故作是詩。

十年栽種百年規，好德無人助我儀；（古語云：「一年之計，樹之以穀。十年之計，樹之以木。百年之計，樹之以德。」）縣令若同倉庾氏，亭松應長子孫枝。天公不救斧斤厄，野火解憐冰雪姿；爲問幾株能合抱，慙慙記取角弓詩。

張先生（并敘）

先生不知其名，黃州故縣人，本姓盧，爲張氏所養，陽狂垢汗，寒暑不能侵。常獨行市中，夜或不知其所止，

往來者欲見之，多不能致。余試使人召之，欣然而來；既至，立而不言，與之言不應，使之坐不可；但俯仰熟視，傳舍堂中久之而去。夫孰非傳舍者，是中竟何有乎？然余以有思，惟心追躡其意，蓋未得也。

熱視空堂竟不言，故應知我未天全。肯來傳舍人皆說，能致先生予亦賢。脫屣不妨眠糞屋，流澌爭看浴冰川。士廉豈識桃椎妙？妄意稱量未必然。

陳季常所畜朱陳村嫁娶圖

何年顧陸丹青手，畫作朱陳嫁娶圖。聞道一村惟兩姓，不將門戶買崔盧。

我是朱陳舊使君，勤耕曾入杏花村。而今風物那堪畫，縣吏催錢夜打門。（朱陳村在徐州蕭縣。）

少年時嘗過一村院，見壁上有詩云：「夜涼疑有雨，院靜似無僧。」不知何人

詩也。宿黃州禪智寺，僧皆不在，夜半雨作，偶記此詩，故作一絕。

佛燈漸暗飢鼠出，山雨忽來脩竹鳴。知是何人舊詩句，已應知我此時情。

初到黃州

自笑平生為口忙，老來事業轉荒唐。長江遶郭知魚美，好竹連山覺筍香。逐客不妨員外置，詩人例作水曹郎；只慙無補絲毫事，尚費官家壓酒囊。（檢校官例折支多得退酒袋）

定惠院寓居月夜偶出

幽人無事不出門，偶逐東風轉夏夜。參差玉宇飛木末，繚繞香煙來月下。江雲有態清自媚，竹露無聲浩如瀆；已驚弱柳萬絲垂，尚有殘梅一枝亞。清詩獨吟還自和，白酒已盡誰能借？不詞青春忽忽過，但恐懽意年年謝。自知醉耳愛松風，會揀霜林結茅舍。浮浮大甑長炊玉，溜溜小槽如壓蔗。飲中真味老更濃，醉裏狂言醒可怕。但當謝客對妻子，倒冠落佩從嘲罵。

次韻前篇

去年花落在徐州，對月酣歌美清夜；（去年徐州花下對月，與張君厚、王子忠兄弟飲酒，作韻字韻詩。）今年黃州見花發，小院閉門風露下。萬事如花不可期，餘年似酒那禁瀉？憶昔還鄉沂巴峽，落帆樊口（在黃州南岸。）高桅亞。長江麥空自流，白髮紛紛寧少借？竟無五畝繼沮溺，空有千篇陵鮑謝。至今歸計負雲山，未免孤衾眠客舍；少年辛苦真食夢，老景清閑如啖蔗！飢寒未至且安居，憂患已空猶夢怕。穿花踏月飲村酒，免使醉歸官長罵。

安國寺浴

老來百事懶，身垢猶念浴；衰髮不到耳，尚煩月一沐。山城足薪炭，煙霧濛湯谷；塵垢能幾何，儵然脫羈梏。披衣坐小閣，散髮臨脩竹；心困萬緣空，身安一牀足。豈惟忘淨穢，兼以洗榮辱；默歸無多談，此理觀要熟！

安國寺尋春

臥聞百舌呼春風，起尋花柳村村同；城南古寺脩竹合，小房曲檻敞深紅。看花歎老憶年少，對酒思家愁老翁；病眼不差雲母亂，鬢絲強理茶煙中。遙知二月王城外，玉仙供福花如海；薄羅勻霧蓋新粧，快馬爭風鳴雜珮。玉川先生真可憐！一生耽酒終無錢；病過春風九十日，獨抱添丁看花發。

寓居定惠院之東雜花滿山有海棠一株土人不知貴也

江城地瘴蕃草木，只有名花苦幽獨；嫣然一笑竹籬間，桃李漫山認麤俗。也知造物有深意，故遣佳人在空谷。自然富貴出天姿，不待金盤薦華屋。朱唇得酒暈生臉，翠袖卷紗紅映肉；林深霧暗曉光遲，日暖風輕春睡足。雨中有淚亦淒愴，月下無人更清淑；先生食飽無一事，散步逍遙自捫腹。不問人家與僧舍，拄杖敲門看脩竹；忽逢絕豔照衰朽，歎息無言措病目！陋邦何處得此花，無乃好事移西蜀？寸根千里不易到，御子飛來定鴻鶴。天涯

流落俱可念，爲歛一樽歌。此曲明朝酒醒還，獨來雪落紛紛那忍觸！

次韻樂著作野步

老來幾不辨西東，秋後霜林且強紅；眼暈見花真是病，耳虛聞蟻定非聰。酒醒不覺春強半，睡起常驚日過中；植杖偶逢爲黍客，披衣閑詠舞雩風。仰看落盡收松粉，俯見新芽摘杞叢。楚雨還昏雲夢澤，吳潮不到武昌宮。（黃州對岸武昌縣有孫權故宮）廢興古郡詩無數，寂寞閑窗易粗通。解組歸來成二老，風流他日與君同。

二月二十六日雨中熟睡至晚強起出門還作此詩意思昏昏也

卯酒困三杯，午餐便一肉；雨聲來不斷，睡味清且熟。昏昏覺還臥，展轉無由足；強起出門行，孤夢猶可續。泥深竹雞語，村暗鳩婦哭；明朝看此詩，睡語應難讀。

雨晴後步至四望亭下魚池上遂自乾明寺前東岡上歸二首

雨過浮萍合，蛙聲滿四隣；海棠真一夢，梅子欲嘗新。拄杖閑挑菜，鞦韆不見人；慙勤木芍藥，獨自殿餘春。高亭廢已久，下有種魚塘；暮色千山入，春風百草香。市橋人寂寂，古寺竹蒼蒼。鶴鶴來何處，號鳴滿夕陽。

雨中看牡丹二首

霧雨不成點，映空疑有無；時於花上見，的皪走明珠。秀色洗紅粉，暗香生雪膚；黃昏更蕭瑟，頭重欲相扶。明日雨當止，晨光在松枝；清寒入花骨，肅肅初自持。午景發樓麗，一笑當及時；依然暮還斂，亦自惜幽姿。幽姿不可惜，後日東風起；酒醒何所見，金粉抱青子。千花與百草，共盡無妍鄙；未忍汗泥沙，牛酥煎落蕊。

次韻樂著作送酒

少年多病怯盃觴，老去方知此味長；萬斛羈愁都似雪，一壺春酒若爲湯。

次韻樂著作天慶觀醮

濁世紛紛肯下臨，夢尋飛步五雲深；無因上到通明殿，只許微聞玉佩音。

王齊萬秀才寓居武昌縣劉郎洑正與伍洲相對伍子胥奔吳所從渡江也

君家稻田冠西蜀，擣玉揚珠三萬斛；寒江流沫起書樓，碧瓦珠欄照山谷。傾家取樂不論命，散盡黃金如轉燭；惟餘舊書一百車，方舟載入荆江曲。江上青山亦何有，伍洲遙望劉郎藪。明朝寒食當過君，請殺耕牛壓私酒。與君飲酒細論文，酒酣訪古江之濱。仲謀公瑾不須弔，一醉波神英烈君。（杭州伍子胥廟封英烈王）

杜沂游武昌以醪釀花菩薩泉見餉二首

醪醪不爭春，寂寞開最晚；青蛟走玉骨，羽蓋蒙珠纒。不粧豔已絕，無風香自遠；淒涼吳宮闕，紅粉埋故苑。至今微月夜，笙簫來絕巖；餘妍入此花，千載尙清婉。怪君呼不歸，定爲花所挽；昨宵雷雨惡，花盡君應返。

君言西山頂，自古流白泉；上爲千牛乳，下有萬石銚。不愧惠山味，但無陸子賢；願君揚其名，庶託文字傳。寒泉比吉士，清濁在其源；不食我心惻，於泉非所患。嗟我本何有，虛名空自纏；不見子柳子，餘愚汗溪山！

陳季常自岐亭見訪郡中及舊州諸豪爭欲邀致之戲作陳孟公詩一首

孟公好飲甯論斗，醉後關門防客走；不妨閑過左阿君，百論終爲賢太守。老居閭里自浮湛，笑問柏松何若心？忽然載酒從陋巷，爲愛楊雄作酒箴。長安富兒求一過，千金壽君君笑唾；汝家安得客孟公，從來只識陳驚座。

卷十二 詩八十九首

游武昌寒溪西山寺

連山蟠武昌，翠木蔚樊口；我來已百日，欲濟空搔首。坐看鷗鳥沒，夢逐鸞鷖走；今朝橫江來，一葦寄衰朽。高談破巨浪，飛屨輕重阜；去人曾幾何，絕壁寒溪吼。風泉兩部樂，松竹三益友；徐行欣有得，芝朮在蓬莠。西上九曲

亭衆山皆培塿，却看江北路。雲水渺何有，離離見吳宮。莽莽真楚叢，空傳孫郎石。無復陶公柳，爾來風流人。惟有漫浪叟，買田吾已決。乳水况宜酒，所須脩竹林。深處安井臼，相將踏勝絕。更裹三日糗。

武昌銅劍歌（井敘）

供奉官鄭文嘗官於武昌，江岸裂出古銅劍，文得之以遺余，冶鑄精巧，非鍛冶所成者。

雨餘江清風卷沙，雷公躡雲捕黃蛇。蛇行空中如枉矢，電光煜煜燒蛇尾。或投以塊鏗有聲，雷飛上天蛇入水。水上青山如削鐵，神物欲出山自裂。細看兩脅生碧花，猶是西江老蛟血。蘇子得之何所爲，崩絃彈缺詠新詩。君不見凌煙功臣長九尺，腰間玉具高拄頤。

定惠廟師爲余竹下開嘯軒

啼鴉催天明，喧喧相詆讎。暗蛩泣夜永，唧唧自相弔。飲風蟬至潔，長吟不改調。食土蚓無腸，亦自終夕叫。鴛鴦聲最鄙，鵲喜意可料。皆緣不平鳴，慟哭等嬉笑。阮生已粗率，孫子亦未妙。道人開此軒，清坐默自照。衝風振河海，不能號無竅。累盡吾何言，風來竹自嘯。

石芝（井敘）

元豐三年五月十一日癸酉，夜夢游何人家，開堂西門，有小園古井，井上皆蒼石，石上生紫藤如龍蛇，枝葉如赤箭，主人言此石芝也。余率爾折食一枝，衆皆驚笑，其味如雞蘇而甘，明日作此詩。

空堂明月清且新，幽人睡息來初勻。了然非夢亦非覺，有人夜呼祁孔賓。披衣相從到何許，朱欄碧井開瓊戶。忽驚石上堆龍蛇，玉芝紫筍生無數。鏘然敲折青珊瑚，味如蜜藕和雞蘇。主人相顧一撫掌，滿堂坐客皆胡盧。亦知洞府嘲輕脫，終勝嵇康羨王烈。神山一合五百年，風吹石髓堅如鐵。

今年正月十四日與子由別於陳州，五月子由復至齊安，未至以詩迎之。

驚塵急雲滿貂裘，淚洒東風別宛丘；又向邯鄲枕中見，却來雲夢澤南州。睽離動作三年計，牽挽當爲十日留；早晚青山映黃髮，相看萬事一時休。（柳子厚別劉夢得詩云：「聖恩若許歸田去，黃髮相看萬事休。」）

遷居臨臯亭

我生天地間，一蟻寄大磨；區區欲右行，不救風輪左。雖云走仁義，未免違寒餓；劍米有危炊，鉞氈無隱坐。豈無佳山水，借眼風雨過；歸田不待老，勇決凡幾箇。幸茲廢棄餘，疲馬解鞍馱；全家古江驛，絕境天爲破。飢貧相乘除，未見可弔賀；澹然無憂樂，苦語不成些。

曉至巴河口迎子由

去年御史府，舉動觸四壁；幽幽百尺井，仰天無一席。隔牆聞歌呼，自恨計之失；留詩不忍寫，苦淚漬紙筆。餘生復何幸，樂事有今日；江流鏡面靜，煙雨輕羃羃。孤舟如鳥驚，點破千頃碧。聞君在磁湖，欲見隔咫尺；朝來好風色，旗尾西北擲；行當中流見，笑眼青光溢。此邦疑可老，脩竹帶泉石；欲買柯氏林，茲謀待君必。

與子由同游寒溪西山

散人出入無町畦，朝游湖北暮淮西；高官酒官雖未上，兩脚垂欲穿塵泥。與君聚散若雲雨，共惜此日相提携；千搖萬兀到樊口，一箭放溜先爲驚。層層草木暗西嶺，瀏瀏霜雪鳴寒溪；空山古寺亦何有，歸路萬頃青玻璃。我今漂泊等鴻雁，江南江北無常栖；幅巾不擬過城市，欲踏徑路開新蹊。（路有直入寒溪，不過武昌者。）却憂別後不忍到，見子行迹空餘悽；吾儕流落豈天意，自坐迂闊非人擠。行逢山水輒羞歎，此去未免勲鹽齏；何當一遇幸八百，相哀白髮分刀圭。（幸八百宅在筓門。）

次韻答子由

平生弱羽寄衝風，此去歸飛識所從；好語似珠穿一一，妄心如膜退重重。山僧有味寧知子，龍吏無言只笑

儂；尚有讀書清淨業，未容春睡敵千鐘。

和何長官六言次韻

作邑君真伯厚，去官我豈曼容。一廬願託仁政，六字難廉變風。

五噫已出東洛，三復願比南容。學道未從潘盎（南海謂狂為盎，潘近世得道者也。）草書猶似楊風。（楊擬式也。）

石渠何須反顧，水驛幸足相容。長江大欲見庇，探支八月涼風。

清風初號地，嶺明月自寫天容。貧家何以娛客，但知抹月批風。

青山自是絕色，無人誰與為容。說向市朝公子，何殊馬耳東風。

觀張師正所蓄辰砂

將軍結髮戰蠻溪，篋有殊珍勝象犀。漫說玉牀收箭鏃，何曾金鼎識刀圭。近聞猛士收丹穴，欲助君王鑄龜蹄；多少空巖人不見，自隨初日吐虹霓。

五禽言（并敘）

梅聖俞嘗作四禽言，余謫黃州寓居定惠院，遠舍皆茂林脩竹，荒池蒲葦，春夏之交，鳴鳥百族，土人多以其聲之似者名之，遂用聖俞體作五禽言。

使君向蘄州，更唱蘄州鬼，我不識使君，寧知使君死？人生作鬼會不免，使君已老知何晚！（王元之自黃移蘄州，聞啼鳥，問其名，或對曰：「此名蘄州鬼。」元之大惡之，果卒於蘄。）

南山昨夜雨，西溪不可渡。溪邊布穀兒，勸我脫破袴。不詞脫袴溪水寒，水中照見權租瘢。（土人謂布穀為脫却破袴。）

去年麥不熟，挾彈規我肉；今年麥上場，處處有殘粟。豐年無象何處尋？聽取林間快活吟。（此鳥聲云：「麥飯熟，即快活。」）

力作力作蠶絲一百箔；壠上麥頭昂，林間桑子落。願儂一箔千兩絲，纈絲得蛹飼爾雛。（此鳥聲云：「蠶絲一百箔。」）

姑惡姑惡！姑不惡，妾命薄！君不見東海孝婦死作三年乾，不如廣漢龐姑去却還。（姑惡，水鳥也。俗云：「婦以姑虐死，故其聲云。」）

次韻子由病酒肺疾發

憶子少年時，肺喘疲坐臥，喊呀或終日，勢若風雨過。虛陽作浮漲，客冷仍下墮；妻孥恐悵望，膾炙不登坐。終年禁晚食，半夜發清餓；胃強膈苦滿，肺飲腹輒破。三彭恣啖馨，二豎肯遺播；寸田可治生，誰勸耕黃糲。（新法方田，謂上腴爲黃糲。）探懷得真藥，不待君臣佐；初如雪花積，漸作櫻珠大。隔牆聞三嚙，隱隱如轉磨；自茲失故疾，陽唱陰輒和。神仙多歷試，中路或坎坷；平生不盡器，痛飲知無奈。舊人眼看盡，老伴餘幾箇。殘年一斗粟，待子同春簸。云何不自珍，醉病又一挫；真源結裂棗，世味等糠笮。耕耘當待穫，願子勤自課；相將賦遠遊，仙語不用些。

正月二十日往岐亭郡人潘古郭三人送余於女王城東禪莊院

十日春寒不出門，不知江柳已搖村；稍聞決決流冰谷，盡放青青沒燒痕。數畝荒園留我住，半鉗濁酒待君溫；去年今日關山路，細雨梅花正斷魂。

鐵拄杖（并敘）

柳真齡，字安期，閩人也。家寶一鐵拄杖，如柳栗木，牙節宛轉天成，中空，有簧，行輒微響。柳云：「得之浙中。」相傳王審知以遺錢鏐，鏐以賜一僧，柳偶得之，以遺余，作此詩謝之。

柳公手中黑蛇滑，千年老根生乳節。忽聞鏗然爪甲聲，四坐驚顧知是鐵。含黃腹中細泉語，迸火石上飛星裂。公言此物老有神，自昔閩王餉吳越。不知流落幾人手，坐看變滅如香雪。忽然贈我意安在，兩脚未許甘衰歇。便尋轍迹訪崆峒，徑渡洞庭探禹穴。披榛覓藥採芝菌，刺虎縱蛟搗蛇蝎。會教化作兩錢錙，歸來見公未華髮。問我「鐵君無恙否？」取出摩挲向公說。

與潘三失解後飲酒

千金弊帚人誰買，半額蛾眉世所妍。願我自爲都旼驥，憐君欲鬪小嬋娟。青雲豈易量他日，黃菊猶應似去年。醉裏未知誰得喪，滿江風月不論錢。

東坡八首（并敘）

余至黃二年，日以困匱，故人馬正卿哀予乏食，爲於郡中請故營地數十畝，使得躬耕其中。地既久荒，爲芟棘瓦礫之場，而歲又大旱，墾闢之勞，筋力殆盡。釋耒而歎，乃作是詩，自愍其勤，庶幾來歲之入，以忘其勞焉。

廢壘無人顧，頽垣滿蓬蒿。誰能捐筋力，歲晚不償勞。獨有孤旅人，天窮無所逃。端來拾瓦礫，歲旱土不膏。崎嶇草棘中，欲刮一寸毛。喟焉釋耒歎，我廩何時高？

荒田雖浪莽，高庌各有適。下隰種杭社，東原蒔棗栗。江南有蜀士，桑果已許乞。好竹不難栽，但恐鞭橫逸。仍須卜佳處，規以安我室。家僮燒枯草，走報暗井出。一飽未敢期，瓢飲已可必。

自昔有微泉，來從遠嶺背。穿城過聚落，流惡壯蓬艾。去爲柯氏陂，十畝魚鰕會。歲旱泉亦竭，枯萍粘破塊。昨夜南山雲，雨到一犁外。泫然尋故瀆，知我理荒蒼。泥芹有宿根，一寸嗟獨在。雪芽何時動，春鳩行可膾。（蜀人貴芹芽膾，雜鳩肉作之。）

種稻清明前，樂事我能數；毛空暗春澤，鍼水聞好語。（蜀人以細雨爲雨毛，稻初生時，農夫相語，稻鍼水矣。）分秧及初夏，漸喜風葉舉；月明看露上，一一珠垂縷。秋來霜穗重，顛倒相撐拄；但聞畦壠間，蚱蜢如風雨。（蜀中稻熟時，蚱蜢羣飛田間，如小蝗狀，而不害稻。）新春便入甑，玉粒照筐筥；我久食官倉，紅腐等泥土。行當知此味，口腹吾已許。

夏農惜地力，幸此十年荒；桑柘未及成，一麥庶可望。投種未逾月，覆塊已蒼蒼；農夫告我言：勿使苗葉昌。君欲富，餅餌要須縱；牛羊再拜謝，苦言得飽不敢忘。

種棗期可刺，種松期可斲；事在十年外，吾計亦已慤。十年何足道？二載如風雹；舊聞李衡奴，此策疑可學。我有同舍郎，官居在灤岳。（李公擇也。）遺我三寸柑，照坐光卓犖；百栽儻可致，當及春冰渥。想見竹籬間，青黃垂屋角。

潘子久不調，沽酒江南村；郭生本將種，賣藥西市垣；古生亦好事，恐是押牙孫；家有十畝竹，無時容叩門。我窮文舊絕，三子獨見存；從我於東坡，勞餉同一飧。可憐杜拾遺，事與朱阮論；吾師卜子夏，四海皆弟昆。馬生本窮士，從我二十年；日夜望我貴，求分買山錢。我今反累生，借耕輟茲田；刮毛龜背上，何時得成氈？可憐馬生癡，至今誇我賢；衆笑終不悔，施一當獲千。

題織錦圖上回文三首

春晚落花餘碧草，夜涼低月半枯桐；入隨遠鴈邊城莫，雨映疎簾繡閣空。
紅手素絲千字錦，故人新曲九回腸；風吹絮雪愁縈骨，淚洒縑書恨見郎。
羞看一首回文錦，錦似文君別恨深；頭白自吟悲賦客，斷腸愁是斷絃琴。

姪安節遠來夜坐三首

南來不覺歲崢嶸，坐撥寒灰聽雨聲；遮眼文書元不讀，伴人燈火亦多情。嗟予潦倒無歸日，今汝蹉跎已半生；免使韓公悲世事，白頭還對短燈檠。

心裏面改瘦崢嶸，相見惟應識舊聲；永夜思家在何處？殘年知汝遠來情。畏人默坐成癡鈍，問舊驚呼半死生；夢斷酒醒山雨絕，笑看飢鼠上燈檠。

落第汝爲中酒味，吟詩我作忍飢聲；便思絕粒真無策，苦說歸田似不情。腰下牛閑方解佩，洲中奴長足爲生；大弔一弛何緣殼，已覺翻飜不受檠。

冬至日贈安節

我生幾冬至，少小如昨日；當時事父兄，上壽拜脫膝。十年閱凋謝，白髮催衰疾；瞻前惟兄三，顧後子由一。近者隔濤江，遠者天一壁；今朝復何幸，見此萬里姦。憶汝搃角時，啼笑爲梨栗；今來能慷慨，志氣堅鐵石。諸孫行復爾，世事何時畢；詩成却超然，老淚不成滴。

岐亭道上見梅花戲贈季常

蕙死蘭枯菊亦摧，返魂香入嶺頭梅；數枝殘綠風吹盡，一點芳心雀啣開。野店初嘗竹葉酒，江雲欲落豆蔻灰；行當更向欽頭見，病起爲雲正作堆。

樂全先生生日以鐵拄杖爲壽二首

先生真是地行仙，住世因循五百年；每向銅人話疇昔，故教鐵杖鬪清堅。入懷冰雪生秋思，倚壁蛟龍護晝眠；遙想人天會方丈，衆中驚倒野狐禪。

二年相伴影隨身，踏遍江湖草木春；擲石舊痕猶作眼，閉門高節欲生鱗。畏塗自衛真無敵，捷徑爭先却累人；遠寄知公不嫌重，筆端猶自幹千鈞。

杭州故人信至齊安

昨夜風月清，夢到西湖上。朝來聞好語，扣戶得吳餉。輕圓白曬荔，脆齏紅螺醬。若將西庵茶，勸我洗江瘴。故人情義重，說我必西向。一年兩僕夫，千里問無恙。相期結書社，（故人相約，贖錢雇僕，未一歲再至黃。）未怕供詩帳。（僕頃以詩得罪，有司移杭，取境內所留詩，杭州供數百首，謂之詩帳。）還將夢魂去，一夜到江漲。（江漲杭州橋名。）

送牛尾狸與徐使君（時大雪中）

風捲飛花自入帷，一樽遙想破愁眉。泥深厭聽雞頭鶻，（蜀人謂泥骨滑為雞頭鶻。）酒淺欣嘗牛尾狸。通印子魚猶帶骨，披綿黃雀漫多脂。慙慙送去煩纖手，為我磨刀削玉肌。

四時詞

春雲陰陰雪欲落，東風和冷驚羅幕。漸看遠水綠生漪，未放小桃紅入萼。佳人瘦盡雪膚肌，眉斂春愁知為誰？深院無人剪刀響，應將白紵作春衣。

垂柳陰陰日初永，蕉漿酪粉金盤冷。簾額低垂紫燕忙，蜜脾已滿黃蜂靜。高樓睡起翠眉顰，枕破斜紅未肯勻；玉腕半揜雲碧袖，樓前知有斷腸人。

新愁舊恨眉生綠，粉汗餘香在蘄竹。象牀素手爨寒衣，爍爍風虎動華屋。夜香燒罷掩重局，香霧空濛月滿庭；抱琴博軸無人見，門外空聞裂帛聲。

霜葉蕭蕭鳴屋角，黃昏斗覺羅衾薄。夜風搖動鎮帷犀，酒醒夢回聞雪落。起來呵手畫雙鴉，醉臉輕勻覩眼霞；真態香生誰畫得？玉奴纖手嗅梅花。

太守徐君猷通守孟亨之皆不飲酒以戲之二云

孟嘉嗜酒桓溫笑，徐邈狂言孟德疑。公獨未知其趣爾，臣今時復一中之。風流自有高人識，通介寧隨薄俗移。二子有靈應撫掌，吾孫還有獨醒時。

雪後到乾明寺遂宿

門外山光馬亦驚，塔前展齒我先行。風花誤入長春苑，雲月長臨不夜城。未許牛羊傷至絮，且看鴉鵲弄新晴。更須攜被留僧榻，待聽摧簷瀉竹聲。

伯父送先人下第歸蜀詩云：「人稀野店休安枕，路入靈關穩跨驢。」安節將去爲誦此句，因以爲韻，作小詩十四首送之。

索漢齊安郡，從來着放臣。如何風雪裏，更送獨歸人。瘦骨寒將斷，衰髯摘更稀。未甘爲死別，猶恐得生歸。日上氣暎江，雪晴光眩野。記取到家時，鋤耰吾正把。月明穿破裘，寒氣澁孤劍。歸來閉戶坐，默數來時店。諸兄無可寄，一語會須酬。晚歲俱黃髮，相看萬事休。故人如念我，爲說瘦癯藥。尙有身爲患，已無心可安。吾兄喜酒人，今汝亦能飲。一杯歸誦此，萬事邯鄲枕。東阡在何許，寒食江頭路。哀哉魏城君，宿草荒新墓。臨分亦泫然，不爲窮途泣。東阡時一到，莫遣牛羊入。我夢隨汝去，東阡松柏青。却入西州門，永愧北山靈。乞糴何足羨，負米可忘艱。莫爲無車馬，含羞入劍關。

我坐名過實，謹謹自招損；汝幸無人知，莫厭家山穩！
竹筍與練裙，隨時畢婚嫁；無事若相思，征鞍還一跨。
萬里却來日，一庵仍獨居；應笑謀生拙，團團如磨驢。

和王鞏六首並次韻

君談陽朔山，不作一錢直；巖藏兩頭虺，瘴落千仞翼。雅宜驪兜放，頗訝虞舜陟；暫來已可畏，覽鏡憂面黑。兀子三年囚，苦霧變飲食；吉人終不死，仰荷天地德。我來黃岡下，欲枕江流碧；江南武昌山，向我如咫尺。春蔬黃土軟，凍筍蒼崖拆；此行我累君，乃反得安宅。遙知舟穴近，爲斲岫螻石。他年分刀圭，名字挂仙籍。（君許惠桂州丹砂。）

少年帶刀劍，但識從軍樂；老大腹鞞鋤，解佩付鎔鑠。雖無獻捷功，會賜力田爵；敲冰春搗紙，刈葦秋織箔。林斬冬炭，竹塢收夏籜；四時俯有取，一飽天所酢。君生紈綺間，欲學非其脚；左右玉襪攜，東薪誰爲縛？勿令聞此語，翠黛頰將惡；笑我一間茆，婦姑紛六鑿。

樓名）
欲結千年實，先摧二月花；故教窮到骨，要使壽無涯！久已逃天網，何須服日華；賓州在何處？爲子上栖霞。（樓名）

隣里有異趣，何妨傾蓋新；殊方君莫厭，數面自成親。默坐無餘事，回光照此身。他年赤墀下，玉立看垂紳。
平生我亦輕餘子，晚歲人誰念此翁？巧語屢曾遭薏苡，庚詞聊復託芎藭；子還可貴同元亮，妻却差賢勝敬通；若問我貧天所賦，不因遷謫始囊空。

君家玉臂貫銅青，下客何時見目成？勤把鈇黃記官樣，莫教絃管作蠻聲。薰衣漸歎衙香少，擁髻遙憐夜語清；記取北歸攜過我，南江風浪雪山傾。（君自南江赴任，不一過我。）

記夢回文二首（井敘）

十二月二十五日，大雪始晴，夢人以雪水烹小團茶，使美人歌以飲余，夢中爲作回文詩，覺而記其一句云：「亂點餘花唾碧衫。」意用飛燕唾花故事也，乃續之爲二絕句云。

醜顏玉盤捧纖纖，亂點餘花唾碧衫；歌咽水雲凝靜院，夢驚松雪落空巖。

空花落盡酒傾缸，日上山融雪漲江；紅焙淺甌新火活，龍團小碾鬪晴窗。

三朵花（井敘）

房州通判許安世，以書遺余，言吾州有異人，常戴三朵花，莫知其姓名。郡人因以三朵花名之，能作詩皆神仙意，又能自寫真人有得之者，許欲以一本見惠，乃爲作此詩。

學道無成鬢已華，不勞千劫漫烝砂；歸來且看一宿覺，未暇遠尋三朵花。兩手欲遮餅裏雀，四條深怕井中蛇；畫圖要識先生面，試問房陵好事家。

次韻陳四雪中賞梅

臘酒詩催熟，寒梅雪鬪新；杜陵休歎老，韋曲已先春。獨秀驚凡目，遺英臥逸民；高歌對三白，遲莫慰安仁。

正月二十日與潘郭二生出郊尋春，忽記去年是日同至女王城，作詩乃和前韻。

東風未肯入東門，走馬還尋去歲村；人似秋鴻來有信，事如春夢了無痕！江城百酒三杯釀，野老蒼顏一笑溫；已約年年爲此會，故人不用賦招魂。

是日偶至野人汪氏之居，有神降於其室，自稱天人李全，字德通，善篆字，用筆奇妙而字不可識，云天篆也，與予言有所會者，復作一篇，仍用前韻。

酒渴思茶漫扣門，那知竹裏是仙村；已開龜策通神語，更看龍蛇落筆痕。色瘁形枯應笑屈，道存目擊豈非溫；歸來獨掃空齋臥，猶恐微言入夢魂。

浚井

古井沒荒萊，不食誰爲憫？餅罌下兩綆，蛙蚓飛百尺。腥風被泥滓，空響聞點滴；上除青青芹，下洗鑿鑿石。沾濡愧童僕，盃酒暖寒栗；白水漸泓渟，青天落寒碧。云何失舊穢，底處來新絮；井在無有中，無來亦無失。

紅梅二首

怕愁貪睡獨開遲，自恐冰容不入時；故作小紅桃杏色，尙餘孤瘦雪霜姿。寒心未肯隨春態，酒量無端上玉肌；詩老不知梅格在，更看綠葉與青枝。（石曼卿紅梅詩云：「認桃無綠葉，辨杏有青枝。」）

雪裏開花却是遲，何如獨占上春時；也知道物含深意，故與施朱發妙姿。細雨邕殘千顆淚，輕寒瘦損一分肌；不應便雜天桃杏，半點微酸已著枝。

幽人自恨探春遲，不見檀心未吐時；丹鼎奪胎那是寶，（朱砂紅銀謂之不奪胎色）玉人契頰更多姿。抱叢暗蕊初含子，落蕊穠香已吐肌；乞與徐熙新畫樣，竹間璀璨出斜枝。

和子由寄題孔平仲草庵次韻

逢人欲覓安心法，到處先爲問道庵；盧子不須從若士，蓋公當自過曹參。羨君美玉經三火，笑我枯桑困八蠶；猶喜大江同一味，故應千里共清甘。

二蟲

君不見水馬兒，步步逆流水；大江東流日千里，此蟲趨趨長在此。君不見鷓鴣，堆決起隨衝風，隨風一去宿何許；逆風還落蓬蒿中。二蟲愚智俱莫測，江邊一笑無人識。

陳季常見過二首

仕宦常畏人，退居還喜客。君來輒館我，未覺雞黍窄。東坡有奇事，已種十畝麥。但得君眼青，不謂奴飯白。送君四十里，只使一帆風。江邊千樹柳，落我酒盃中。此行非遠別，此樂固無窮。但願長如此，來往一生同。聞君開龜軒，東檻俯喬木。人言君畏事，欲作龜頭縮。我知君不然，朝飯仰賜谷。餘光幸分我，不死安可獨？

寒食雨二首

自我來黃州，已過三寒食。年年欲惜春，春去不容惜。今年又苦雨，兩月秋蕭瑟。臥聞海棠花，泥污燕脂雪。暗中偷負去，夜半真有力。何殊病少年，病起頭已白。

春江欲入戶，雨勢來不已。小屋如漁舟，濛濛水雲裏。空庖煮寒菜，破竈燒涇葦。那知是寒食，但見烏銜紙。君門深九重，墳墓在萬里。也擬哭塗窮，死灰吹不起。

徐史君分新火

臨臯亭中一危坐，三見清明改新火。溝中枯木應笑人，鑽斫不然誰似我。黃州使君憐久病，分我五更紅一朵。從來破釜躍江魚，只有清詩嘲飯顆。起攜蠟炬遶空屋，欲事烹煎無一可。爲公分作無盡燈，照破十方昏暗鑠。次韻答元素余舊有贈元素云「天涯同是傷流落」元素以爲今日之先兆。且悲當時六客之存亡，六客蓋張子野劉孝叔陳令舉李公擇及元素與余也。不愁春盡絮隨風，但喜丹砂入頰紅。流落天涯先有識，摩訶金狄會當同。蓬蓬未必都非夢，了了方知不落空。莫把存亡悲六客，已將地獄等天宮。

卷十三 詩八十一首

蜜酒歌（并敘）

西蜀道士楊世昌善作蜜酒，絕醇，余既得其方，作此歌遺之。

真珠爲漿玉爲醴，六月田夫汗流漉，不如春甕自生香，蜂爲耕耘花作米。一日小沸魚吐沫，二日眩轉清光活，三日開馨香滿城，快瀉銀餅不須撥。百錢一斗濃無聲，甘露微濁醍醐清。君不見南園採花蜂以雨，天教釀酒醉先生。先生年來窮到骨，問人乞米何曾得。世間萬事真悠悠，蜜蜂大勝鹽河侯。

又一首答二猶子與王郎見和

脯青苔，炙青蒲，爛蒸鵝鴨，乃瓠壺。煮豆作乳脂爲酥，高燒油燭斟蜜酒。貧家百物初何有，古來白巧出窮人，搜羅假合亂天真。詩書與我爲麴蘖，醞釀老夫成摺紳。質非文是終難久，脫冠還作扶犁叟。不如蜜酒無煖寒，冬不加甜夏不酸。老夫作詩殊少味，愛此三篇如酒美。封胡羯末已可憐，不知更有王郎子。

謝陳季常惠一搭巾

夫子胸中萬斛寬，此巾何事小團圓。半升僅瀝淵明酒，二寸纔容子夏冠。好帶黃金雙得勝，可憐白紵一生酸。臂弓腰箭何時去，直上陰山取可汗。

贈黃山人

面頰照人元自赤，眉毛覆眼見來烏。倦遊不擬談玄牝，示病何妨出白須。絕學已生真定慧，說禪長笑老浮屠。東坡若肯三年往，親與先生看藥爐。

問大冶長老乞桃花茶栽東坡

周詩記苦茶，茗飲出近世。初緣厭梁肉，假此雪昏滯。嗟我五畝園，桑麥苦蒙翳。不令寸地閑，更乞茶子栽。飢寒未知免，已作太飽計。庶將通有無，農末不相戾。春來凍地裂，紫筍森已銳。牛羊煩訶叱，筐筥未敢睨。江南老道

人齒髮日夜逝，他年雪堂品，空記桃花齋。

魚蠻子

江淮水為田，舟楫為室居。魚鰕以為糧，不耕自有餘。異哉魚蠻子，本非左衽徒。連排入江住，竹瓦三尺廬。於焉長子孫，戚施且侏儒。擊水取魴鯉，易如拾諸途。破釜不着鹽，雪鱗芼青蔬。一飽便甘寢，何異獺與狙。人間行路難，踏地出賦租。不如魚蠻子，駕浪浮空虛。空虛未可知，會當筭舟車。蠻子叩頭泣，勿語桑大夫。

弔李臺卿（并敘）

李臺卿字明仲，廬州人，貌陋甚，性介不羣，而博學強記，罕見其比。好左氏，有史學，考正同異，多所發明。知天文律歷，千載之日，可坐數也。軾謫居黃州，臺卿為麻城主簿，始識之。既罷居於廬，而曹光州演甫以書報其亡。臺卿，光州之妻黨也。

我初未識君，人以君為笑。垂頭若病鶴，烟雨羅七竅。弊衣來過我，危坐若持釣。褚裋半面新，鱗莖一語妙。徐徐涉其瀾，極望不得微。却觀元嫵媚，士固難輕料。看書眼如月，罅隙靡不照。我老多遺忘，得君如再少。從橫通雜藝，甚博且知要。所恨言無文，至老幽不耀。其生世莫識，已死誰復弔。作詩遺故人，庶解俗子譙。

曹既見和復次其韻

造物本兒戲，風噫雷電笑。誰令妄驚怪，失匕號萬竅。人人走江湖，一一操網釣。偶然連六鰲，便謂此手妙。空令任公子，三歲躡海徼。長貧固不詞，一死實未料。難將耆草筭，除用佛眼照。何人嗣家學，恨子兒尚少。嗟我與曹公，衰老世不要。空言今無救，奇志後必耀。吟公五字詩，義重千金弔。收藏慎勿出，免使羣兒譙。

次韻孔毅甫集古人句見贈五首

羨君戲集他人詩，指呼市人如使兒。天邊鴻鵠不易得，便令作對隨家雞。退之驚笑子美泣，問君久假何時

歸世間好句世人共，明月自滿千家墀。

紫駝之峰人莫識，雜以雞豚真可惜！今君坐致五侯鯖，盡是猩脣與熊白。路傍拾得半斷槍，何必開爐鑄矛戟？用之如何在我耳，入手當令君喪魄！

天下幾人學杜甫，誰得其皮與其骨？劃如太華當我前，跛牂欲上驚峭崿。名章俊語紛交衡，無人巧會當時情；前生子美只君是，信手拈得俱天成。

詩人雕刻閑草木，搜抉肝腎神應哭；不如默誦千萬首，左抽右取談笑足。夜吟石鼎聲悲秋，可憐好事劉與侯；何當一醉百不問，我欲眠矣君歸休！

膏明蘭臭俱自焚，象牙翠羽戕其身；多言自古爲數窮，微中有時堪解紛。癡人但數羊羔兒，不知何者是左慈；千章萬句卒非我，急走投君應已遲。

六年正月二十日復出東門仍用前韻

亂山環合水侵門，身在淮南盡處村；五畝漸成終老計，九重新掃舊巢痕。豈惟見慣沙鷗熟，已覺來多釣石溫；長與東風約今日，暗香先返玉梅魂。

食柑

一雙羅帕未分珍，林下先嘗愧逐臣；露葉霜枝翦寒碧，金盤玉指破芳辛。清泉蔌蔌先流齒，香霧霏霏欲暎人；坐客慙勤爲收子，千奴一掬奈吾貧！

大寒步至東坡贈巢二

春雨如暗塵，春風吹倒人；東坡數間屋，巢子誰與鄰？空床斂敗絮，破甕鬱生薪；相對不言寒，哀哉知我貧！我有一瓢酒，獨飲良不仁；未能頰我頰，聊復濡子脣。故人千鍾祿，馭吏醉吐茵；那知我與子，坐作寒螿呻。努力莫怨

天，我爾皆天民，行看花柳動，共享無邊春！

元脩菜（并敘）

菜之美者，有吾鄉之巢。故人巢元胤嗜之，余亦嗜之。元脩云：「使孔北海見，當復云『吾家菜邪？』」因謂之元脩菜。余去鄉十有五年，思而不可得。元脩適自蜀來，見余於黃，乃作是詩，使歸致其子而種之東坡之下云。

彼美君家菜，鋪田綠茸茸。豆莢圓且小，槐芽細而豐。種之秋雨餘，擢秀繁霜中。欲花而未萼，一一如青蟲。是時青裙女，採擷何怱怱。烝之復相之，香色蔚其饒。點酒下鹽豉，縷橙葶薑蔥。那知雞與豚，但恐放箸空。春盡苗葉老，耕翻烟雨叢。潤隨甘澤化，暖作青泥融。始終不我負，力與糞壤同。我老忘家舍，楚音變兒童。此物獨嫵媚，終年繫余胸。君歸致其子，囊盛勿函封。張騫移苜蓿，適用如葵菘。馬援載薏苡，羅生等蒿蓬。懸知東坡下，椿鹵化千鍾。長使齊安人，指此說兩翁。

二月二日點燈會客

江上東風浪接天，苦寒無賴破春妍。試開雲夢羔兒酒，快瀉錢塘藥玉船。蠶市光陰非故國，馬行燈火記當年。冷煙濕雪梅花在，留得新春作上元。

上巳日與一二子攜酒出游隨所見輒作數句明日集之爲詩故詞無倫次

薄雲霏霏不成雨，杖藜曉入千花塢。柯丘海棠吾有詩，獨笑深林誰敢侮。三杯卯酒人徑醉，一枕春睡日亭午。竹間老人不讀書，留我閉門誰教汝。汝出蒼藜枳十圍大，寫真素壁千蛟舞。東坡作塘今幾尺，攜酒一勞農工苦。却尋流水出東門，壞垣古堦花無主。臥開桃李爲誰妍，對立鶉鷄相媚嫵。開餅籍草勸行路，不惜春衫汗泥土。塞囊共過春草亭，扣門却入韓家園。轆轤繩斷井深碧，鞦韆索挂人何所。映簾空復小桃枝，乞漿不見鬻門女。南上

古台臨斷岸，雪陣翻空迷仰俯；故人魏我玉葉羹，火冷煙消誰爲資？崎嶇東麓下荒徑，煙蛇隔花聞好語。更隨落景盡餘樽，却傍孤城得僧宇；主人勸我洗足眠，倒床不復聞鍾鼓。明朝門外泥一尺，始悟三更雨如許！平生所向無一遂，茲遊何事天不阻；固知我友不終窮，豈弟君子神所予。

日日出東門

日日出東門，步尋東城遊；城門抱關卒，笑我此何求？我亦無所求，駕言寫我憂；意適忽忘返，路窮乃歸休。懸知百歲後，父老說故侯；古來賢達人，此路誰不由？百年寓華屋，千載歸山丘；何事羊公子，不肯過西州？

南堂五首

江上西山半隱堤，此邦台館一時西；南堂獨自西南向，臥看千帆落淺溪。莫年眼力嗟猶在，多病顛毛却未華；故作明窗書小字，更開幽室養丹砂。他時雨夜困移床，坐厭愁聲點客腸；一聽南堂新瓦響，似聞東塢小荷香。山家爲割千房蜜，稚子新畦五畝蔬；更有南堂堪著客，不憂門外故人車。掃地焚香閉閣眠，簟紋如水帳如烟；客來夢覺知何處，拄起西窗浪接天。

次韻子由種杉竹

吏散空庭雀噪簷，閉門獨宿夜厭厭；似聞梨棗同時種，應與杉篁刻日添。糟麴有神薰不醉，雪霜誇健巧相沾；先生坐待清陰滿，空使人人歎滯淹。

孔毅甫妻挽詞

結襜記初歡，同穴期晚歲；擇夫得溫嶠，生子勝王濟；高風相賓友，古義仍兄弟；從君吏隱中，窮達初不計。云何抱沉疾，俯仰便一世；幽陰棲房櫳，芳澤在巾袂；百年縱得滿，此路行亦逝；那將有限身，長瀉無益涕；君文照今

古，不比山石脆；常觀千字誅，寧用百金瘞。

次韻孔毅甫久旱已而甚雨二首

飢人忽夢飯甑溢，夢中一飽百憂失；只知夢飽本來空，未悟真飢定何物。我生無田食破硯，爾來硯枯磨不出；去年太歲空在酉，傍舍壺漿不容乞。今年旱勢復如此，歲晚何以黔吾突？青天蕩蕩呼不聞，况欲稽首號泥佛。魏中蟴蜥尤可笑，寧馨豚豚何等秩。陰陽有時雨有數，民是天民天自卹；我雖窮苦不如人，要亦自是民之一。形容似喪家狗，未肯弭耳爭投骨，倒冠落幘謝朋友，獨與蚊雷共圭華。故人嗔我不開門，君視我門誰肯屈？可憐明月如潑水，夜半清光翻我室。風從南來非雨候，且爲疲人洗烝鬱；飛裳一和快哉謠，未暇飢寒念明日。

去年東坡拾瓦礫，自種黃桑三百尺；今年刈草蓋雪堂，日炙風吹面如墨。平生懶惰今始悔，老大勤農天所直；沛然例賜三尺雨，造化無心悅難測。四方上下同一雲，甘霖不爲龍所隔。（俗有分龍日）蓬蒿下濕迎曉來，燈火新涼催夜織；老夫作罷得甘寢，臥聽牆東人響屐。奔流未已坑谷平，折葦枯荷恣漂溺；腐儒麤糲支百年，力耕不受衆目憐。破陂漏水不耐旱，人力未至求天全；會當作塘徑千步，橫斷西北遮山泉。四鄰相率助舉杵，人人知我囊無錢。明年共看決渠雨，飢飽在我甯關天？誰能伴我田間飲，醉倒惟有支頭輒。

天公號令不再出，十日愁霖併爲一；君家有田水冒田，我家無田憂入室。不如西州楊道士，萬里隨身惟兩膝；淅流不惡泝亦佳，一葉扁舟任漂突。山芎麥麴都不用，泥行露宿終無疾；夜來飢腸如轉雷，旅愁非酒不可開。楊生自言識音律，洞簫入手清且哀；不須更待秋井墻，見人白骨方銜盃。

初秋寄子由

百川日夜逝，物我相隨去；惟有宿昔心，依然守故處。憶在懷遠驛，閉門秋暑中；藜羹對書史，揮汗與子同。西風忽淒厲，落葉穿戶牖；子起尋袂衣，感歎執我手。朱顏不可恃，此語君勿疑；別離恐不免，功名定難期。當時已懷

斷况此兩哀老，失塗既難追，學道恨不早！買田秋已議，築室春當成。雪堂風雨夜，已作對床聲。

和黃魯直食筍次韻

飽食有殘肉，飢食無餘菜。紛然生喜怒，似被狙公賣。爾來誰獨覺，凜凜白下宰。（太和古白下）一飯在家僧，至樂甘不壞。多生味蠶簡，食筍乃餘債。蕭然映樽俎，未肯誰菘芥。君著霜雪态，童稚已耿介。胡爲遭暴橫，三嗅不忍嘍。朝來忽解擿，勢迫風雷噫。尚可餉三閭，飯筒纏五采。

聞子由爲郡僚所諾恐當去官

少學不爲身，宿志固有在。雖然敢自必，用舍置度外。天初若相我，發迹造宏大。豈敢負所付，捐軀欲投會。甯知事大繆，舉步得狼狽。我已無可言，墜甌難追悔。子雖僅自免，雞肋安足賴。低回畏罪罟，黽俛敢言退。若人疑或使，爲子得微罪。時哉歸去來，共抱東坡來。

次韻王鞏南遷初歸二首

問君謫南賓，洽葛食幾尺。逢人瘴髮黃，入市胡眼碧。三年不易口，口脫倚天壁。歸來貌如故，妙語仍破鑿。那能廢詩酒，亦未妨禪寂。願爲尙書郎，還賜尙方烏。

江家舊池合，脩竹圍一尺。歸來萬事非，惟見秦淮碧。平生痛飲處，遺墨鴉棲壁。西來政父客，金印雜鳴鏑。三槐老更茂，花絮春寂寂。中微未可料，家廟藏赤烏。

孔毅甫以詩戒飲酒問買田且乞墨竹次其韻

酒中真復有何好，孟生雖賢未聞道。醉時萬慮一掃空，醒後紛紛如宿草。十年揩洗見真妄，石女無兒焦穀稿。此身何異貯酒瓶，滿甌子人空自倒。武昌痛飲豈吾意，性不違人遭客惱。君家長松十畝陰，借我一庵聊洗心。我田方寸耕不盡，何用百頃糜千金。枕書熟睡呼不起，好學憐君工雜擬。且將墨竹換新詩，潤色何須待東里。

任師中挽詞

大任剛烈世無有，疾惡如風朱伯厚；小任溫毅老更文，聰明慈愛小馮君。兩任才行不須說，曠昔並友吾先人；相看半作晨星沒，可憐太白與殘月。大任先去冢未乾，小任相繼呼不還；強寄一樽生死別，樽中有淚酒應酸。貴賤賢愚同盡耳，君家不盡緣賢子；人間得喪了無憑，只有天公終可倚。

子由作二頌頌石台長老同公手寫蓮經字如黑蟻且誦萬徧脅不至席二十餘年予亦作二首

眼前擾擾黑虵蟬，口角霏霏白唾珠；要識吾師無礙處，試將燒却看嗔無。眼睛心地兩虛圓，脅不霑床二十年；誰信吾師非不睡，睡虵已死得安眠。

鄧忠臣母周挽詞

微生真草木，無處謝天力。慈顏如春風，不見桃李實。古今把此恨，有志俯仰失。公子豈先知，戰戰常惜日。吾君日月照，委曲到肝膈。哀哉人子心，吾何愛一邑。家庭拜前後，粲然發笑色。豈比黃壤下，扶瘞千金壁。若人道德人，視此亦戲劇。聊償會閔意，遽與仙佛寂。孤纍臥江楮，永望墳墓隔。作詩相楚挽，感慟淚載滴。

徐君猷挽詞

一舸南遊遂不歸，清江赤壁照人悲；請看行路無從涕，盡是當年不忍欺。雪後獨來栽柳處，竹間行復採茶時；山城散盡樽前客，舊恨新愁只自知。

和蔡景繁海州石室

芙蓉仙人（石蔓卿也）舊遊處，蒼藤翠壁初無路；戲將桃核裏黃泥，石間散擲如風雨。坐令空山出錦纈，倚天照海花無數。花間石室可容車，流蘇寶蓋窺靈宇。何年霹靂起神物，玉棺飛出王喬墓。當時醉臥動千日，至

今石縫餘糟醕。仙人一去五十年。花老室空誰作主。手植數松今偃蓋。蒼髯白甲低瓊戶。我來取酒酌先生。後事仍載胡琴女。一聲冰鐵散巖谷。海爲瀾翻松爲舞。爾來心賞復何人。持節中郎醉無伍。獨臨斷岸呼出日。紅波碧嶽相吞吐。徑尋我語覓餘聲。拄杖彭鏗叩銅鼓。長篇小字遠相寄。一唱三歎神淒楚。江風海雨入牙頰。似聽石室胡琴語。我今老病不出門。海山巖洞知何許。門外桃花自開落。床頭酒甕生塵土。前年開閣放柳枝。今年洗心參佛祖。夢中舊事時一笑。坐覺俯仰成今古。願君不用刻此詩。東海桑田真且莫！

和秦太虛梅花

西湖處士骨應槁。只有此詩君壓倒。東坡先生心已灰。爲愛君詩被花惱。多情立馬待黃昏。殘雪消遲月出早。江頭千樹春欲闌。竹外一枝斜更好。孤山山下醉眠處。點綴裙腰紛不掃。萬里春隨逐客來。十年花送佳人老。去年花開我已病。今年對花還草草。不如風雨卷春歸。收拾餘香還畀昊。

再和潛師

化工未議蘇羣槁。先向寒梅一傾倒。江南無雪春瘴生。爲散冰花除熱惱。風清月落無人見。洗粧自趁霜鐘早。惟有飛來雙白鷺。玉羽瓊枝鬪清好。吳山道人心似水。眼淨塵空無可掃。故將妙語寄多情。橫機欲試東坡老。東坡習氣除未盡。時復長篇書小草。且撼長條餐落英。忍飢未擬窮呼昊。

橄欖

紛紛青子落紅鹽。正味森森苦且嚴。待得微甘回齒頰。已輸崖蜜十分甜。

海棠

東風嫋嫋泛崇光。香霧霏霏月轉廊。只恐夜深花睡去。更燒高燭照紅粧。

東坡

雨洗東坡月色清，市人行盡野人行，莫嫌犖確坡頭路，自愛鏗然曳杖聲。

生日王郎以詩見慶次其韻并寄茶二十一一片

折楊新曲萬人趨，獨和先生于菘于，但信橫臆終自售，豈知盃脫本無樵？
竭從冰叟來游宦，肯伴臞仙亦號儒！棠棣並爲天下士，芙蓉曾到海邊邠，不嫌霧谷羅松柏，終恐虹梁荷棟榑，
高論無窮如鋸屑，小詩有味似連珠，感君生日遙稱壽，祝我餘年老不枯，未辦報君青玉案，建溪新餅截雲腴。

別黃州

病瘡老馬不任韉，猶向君王得敝帷，桑下豈無三宿戀，樽前聊與一身歸，
長腰尙載撐腸米，闊領先裁蓋屨衣，投老江湖終不失，來時莫遺故人非。

過江夜行武昌山上聞黃州鼓角

清風弄水月銜山，幽人夜渡吳王峴，黃州鼓角亦多情，送我南來不詞遠，
江南又聞出塞曲，半雜江聲作悲健，誰言萬方聲一概，亂憤龍愁爲余變，我記江邊枯柳樹，未死相逢真識面，
他年一葉泝江來，還吹此曲相迎餞。

自興國往筠宿石田驛南二十五里野人舍

溪上青山三百疊，快馬輕衫來一抹，倚山脩竹有人家，橫道清泉知我渴，
芒鞋竹杖自輕軟，蒲薦松床亦香滑，夜深風露滿中庭，惟見孤螢自開闔。

將至筠先寄遲迓遠三猶子

露宿風食六百里，明朝飲馬南江水，未見豐盈犀角兒，先逢玉雪王郎子，
（時道逢王郎於建昌方北行也）對床欲作連夜語，念汝還須戴星起，
夜來夢見小於菘，（還小名菟兒）猶是髧髦垂兩耳，憶過濟南春未動，
三子出迎殘雪裏，我時移守古河東，酒肉淋漓渾舍喜，而今憔悴一羸馬，
迎旅擔夫相汝爾，出城見我定驚嗟，身

健窮愁不須恥！我爲乃翁留十日，掣電一歡何足恃。惟當火急作新詩，一醉兩翁勝酒美。

端午游真如遲筵筵從子由在酒局

一與子由別，却數七端午。身隨綵絲繫，心與昌歎苦。今年疋馬來，佳節日夜數。兒童喜我至，典衣具雞黍。水餅既懷鄉，飯筒仍愍楚。謂言必一醉，快作西川語。甯知是官身，糟麵困薰煮。獨攜三子出，古剎訪禪祖。高談付梁羅，詩律到阿虎。歸來一調笑，慰此長齟齬。（梁羅遲筵小名。）

別子由二首（兼別遲）

知君念我欲別難，我今此別非他日。風裏楊花雖未定，雨中荷葉終不濕。三年磨我費百書，一見何止得雙璧。願君亦莫歎留滯，六十小劫風雨疾。

先君昔愛洛城居，我今亦過嵩山麓。水南卜宅吾豈敢，試向伊川買脩竹。又聞緜山好泉眼，傍市穿林瀉冰玉。遙想茆軒照水開，兩翁相對清如鶴。

兩翁歸隱非難事，惟要傳家好兒子。憶昔汝翁如汝長，筆頭一落三千字。世人聞此皆大笑，慎勿生兒兩翁似；不知樗櫟薦明堂，何以鹽車壓千里？

初別子由至奉新作

雙鵲先我來，飛上東軒背。書隨好夢到，人與佳節會。一歡難把玩，回首了無在。却渡來時溪，斷橋號淺瀨。茫茫暑天闊，藹藹孤城背。青山旣羸中，落日淒涼外。感衰豈吾意，離合非所礙。何以解我憂，粗了一事大。

同年程筠德林求先墳二詩

思成堂

宰樹連山谷，祠堂照路隅。養松無觸鹿，助祭有馴烏。歸夢先寒食，兒啼到白須。遙知鄰里化，醉叟道爭扶。

歸真亭

舊笑桓司馬，今師鄭大夫；不知徂歲月，空覺老楸梧！祭禮傳家法，阡名載版圖；會看千字誄，木抄見龜趺。

過建昌李野夫公幹故居

彭蠡東北源，廬阜西南麓，何人脩水上，種此一雙玉？思之不可見，破宅餘脩竹；四鄰戒莫犯，十畝森似束。我來仲夏初，解纜呈新綠；幽鳥向我鳴，野人留我宿。喪回不忍去，微月桂喬木。遙想他年歸，解組巾一幅。對床老兄弟，夜雨鳴竹屋。臥聽鄰寺鐘，書窗耿殘燭。

初入廬山二首

青山若無素，偃蹇不相親；要識廬山面，他年是故人。（山南山面也）

自昔懷清賞，神游杳藹間；如今不是夢，真箇在廬山。

巖芒青竹杖，自挂百錢游；可怪深山裏，人人識故侯。

圓通禪院先君舊游也。四月二十四日晚至宿焉。明日忌日也。乃手寫寶積獻

蓋頌佛一偈以贈。長老僊公僊拈筆笑曰：「昨夜夢寶蓋飛下著處，輒出火豈

此祥乎？」乃作是詩。院有蜀僧宣逮事謝長老，識先君云。

石耳峰頭路接天，梵音堂下月臨泉；此生初飲廬山水，他日徒參雪竇禪。袖裏寶書猶未出，夢中飛蓋已先

傳；何人更識嵇中散？野鶴昂藏未是仙。

子由在筠作東軒記，或戲之爲東軒長老。其婿曹煥往筠，余作一絕句送曹，以

戲子由。曹過廬山，出以示圓通。慎長老慎欣然，亦作一絕送客出門歸入室，跌

坐化去。子由聞之，乃作二絕。一以答子一，以答慎。明年余過圓通，始得其詩，乃

追次慎韻

君到高安幾日回，一時得藪舊塵埃；贈君一籠牢收取，盛取東軒長老來。（余送曹詩）
東軒長老未相逢，已具黃州一信通；何必揚眉資目擊，須知千里事同風。（慎老和余韻）
東軒只似虛空樣，何處人家籠解盛？縱使盛來無處著，雪堂自有老師兄。（子由答子詩）
擔頭挑得黃州籠，行過圓通一笑開；却到山前人已寂，亦無一物可擔回。（子由答慎詩）
大士何曾有生死，小儒低處覓窮通；偶留一映千山上，散作人間萬竅風。（余和慎詩）

余過溫泉壁上有詩云「直待衆生總無垢，我方清冷混常流」問人云「長老可遵作」遵已退居圓通亦作一絕

石籠有口口無根，自在流泉誰吐吞；若信衆生本無垢，此泉何處覓寒溫？

世傳徐凝瀑布詩云「一條界破青山色」至爲塵陋，又僞作樂天詩稱美此

句有賽不得之語，樂天雖涉淺易，然豈至是哉！乃戲作一絕

帝遣銀河一派垂，古來惟有謫仙詞；飛流濺沫知多少，不與徐凝洗惡詩。

書李公擇白石山房

偶尋流水上崔嵬，五老蒼顏一笑開；若見謫仙煩寄語：「匡山頭白早歸來！」

贈東林壁長老

溪聲便是廣長舌，山色豈非清淨身；夜來入萬四千偈，他日如何舉似人？

題西林壁

橫看成嶺側成峰，遠近高低無一同；不識廬山真面目，只緣身在此山中！

廬山二勝（并敘）

余游廬山南北，得十五六，其勝殆不可勝紀。而懶不作詩，獨擇其尤者作二首。

開先漱玉亭

高巖下赤日，深谷來悲風。擘開青山峽，飛出兩白龍。亂沫散霜雪，古潭搖清空。餘流滑無聲，快寫雙石罅。我來不忍去，月出飛橋東。蕩蕩白銀闕，沉沉水精宮。願隨琴高生，脚踏赤鯁公。手持白芙蕖，跳下清冷中。

栖賢二峽橋

吾聞太山石，積日視綫溜。况此百雷窺，萬世與石鬪。深行九地底，驗出三峽右。長輪不盡溪，欲滿無底竇。跳波翻潛魚，震響落飛瀆。清寒入山骨，草木盡堅瘦。空濛煙靄間，傾洞金石奏。彎彎飛橋出，激激半月殼。玉淵神龍近，雨雹亂晴晝。垂鉞得清甘，可噉不可漱。

陶驥子駿佚老堂二首

文舉與元禮，尚得稱世舊。淵明吾所師，夫子乃其後。挂冠不待年，亦豈爲五斗。我歌歸來引，（余增損淵明歸去來以就聲律，謂之歸來引。）千載信尚友，相逢黃卷中。何似一盃酒，君醉我且歸。明朝許來否，我從廬山來。目送孤飛雲，路逢陸道士。知是千歲人，試問當時友。虎溪已埃塵，似聞佚老堂。知是幾世孫，能爲五字詩。仍載漉酒中人呼小靜節，自號葛天民。

和李太白（并敘）

李太白有潯陽紫極宮感秋詩，紫極宮，今天慶觀也。道士胡洞微以石本示予，蓋其師卓玘之所刻，玘有道術，節義過人，今亡矣。太白詩云：「四十九年非，一往不可復。」今予亦四十九，感之，次其韻。玉芝一名瓊田草，洞微種之七八年矣。云更數年可食，許以遺余，故并記之。

何處聞秋聲？
脩脩北窗竹，
回籬萬古心，
攬之不盈掬。
靜坐觀衆妙，
浩然媚幽獨。
白雲南山來，
就我蒼下宿。
懶從唐生沃，
差訪季主卜。
四十九年非，
一往不可復。
野情轉蕭散，
世道有翻覆。
陶令歸去來，
田家酒應熟。

寄臥虛寂堂，
月明浸疎竹。
冷然洗我心，
欲飲不可掬。
流光發永歎，
自昔非子獨。
行年四十九，
還此北窗宿。
緬憐卓道人，
白首寓醫卜。
謫仙固遠矣，
此士亦難復。
世道如弈棋，
變化不容覆。
惟應玉芝老，
待得蟠桃熟。

次韻道潛留別

爲聞廬岳多真隱，
故就高人斷宿攀。
已喜禪心無別語，
尙嫌剃髮有詩班。
異同更莫疑三語，
物我終當付八還。
到後與君開北戶，
舉頭三十六青山。

卷十四 詩七十九首

歧亭五首（并敘）

元豐三年正月，余始謫黃州，至歧亭北二十五里，山上有白馬青蓋來迎者，則余故人陳慥、季常也。爲留五日，賦詩一篇而去。明年正月，復往見之，季常使人勞余於中途，余久不殺，恐季常之爲余殺也，則以前韻作詩，爲殺戒，以遺季常。季常自爾不復殺，而歧亭之人多化之，有不食肉者，其後數往見之，往必作詩，詩必以前韻。凡余在黃州四年，三往見季常，而季常七來見余，蓋相從百餘日也。七年四月，余量移汝州，自江淮徂雒，送者皆止慈湖，而季常獨至九江，乃復用前韻，通爲五篇以贈之。

昨日雲陰重，
東風融雪汁。
遠林草木暗，
近舍煙火濕。
下有隱君子，
嘯歌方自得。
知我犯寒來，
呼酒意頗急。
拊掌動鄰里，
遠村捉鵝鴨。
房櫳鏘器聲，
蔬果照巾屨。
久聞萋蒿美，
初見新芽赤。
洗盞酌鵝黃，
磨刀削熊白。
須臾我徑醉，
坐睡落巾幘。
醒時夜向闌，
唧唧銅餅泣。
黃州豈云遠，
但恐朋友缺。
我當安所主，
君亦無此客。
朝來靜庵中，
惟見

蜂巒集。

我哀籃中蛤，閉口護殘汁；又哀網中魚，開口吐微濕。剗腸彼交病，過分我何得？相逢未寒溫，相勸此最急。不見盧懷慎，烝壺似烝鴨。坐客皆忍笑，鬢然發其鬣。不見王武子，每食刀機赤。琉璃載烝豚，中有人乳白。盧公信寒陋，衰髮得滿憤；武子雖豪華，未死神已泣。先生萬金壁，護此一蟻缺；一年如一夢，百歲真過客。君無廢此篇，嚴詩編杜集。

君家蜂作窠，歲歲添漆汁；我身牛穿鼻，卷舌聊自濕。二年三過君，此行真得得；愛君似劇孟，叩門知緩急。家有紅頰兒，能唱綠頭鳴；行當隔簾見，花霧輕幕幕。爲我取黃封，親拆官泥赤；仍須煩素手，自點葉家白。樂哉無一事，十年不著憤；閉門弄添丁，哇笑雜呱泣。西方正苦戰，誰補將帥缺？披圖見入陣，合散更（平聲）主客。不須親戎行，坐論教君集。

酸酒如齏湯，甜酒如蜜汁；三年黃州城，飲酒但飲濕。我如更揀擇，一醉豈易得？幾思壓茅柴，禁網日夜急。西鄰推糞盎，醉倒猪與鴨。君家大如掌，破屋無遮幕。何從得此酒，冷面妬君赤；定應好事人，千石供李白。爲君三日醉，蓬髮不暇憤；夜深欲逾垣，臥想春糞泣。君奴亦笑我，鬢齒行秃缺；三年已四至，歲歲閱惡客。人生幾兩屐，莫厭頻來集。

枯松強鑽膏，槁竹欲瀝汁；兩窮相值遇，相哀莫相濕。不知我與君，交遊竟何得？心法幸相語，頭然未爲急。願爲穿雲鶻，莫作將鷄鴨；我行及初夏，煮酒映疏簾。故鄉在何許？西望千山赤；茲遊定安歸，東泛萬頃白。一歡羣復再，起舞花墮憤；將行出苦語，不用兒女泣。吾非固多矣，君豈無一缺？名念別時言，閉戶謝衆客。空堂淨掃地，虛白道所集。

空腸得酒芒角出，肝肺槎牙生竹石；森然欲作不可同，吐向君家雪色壁。平生好詩仍好畫，書牆浣壁長遭罵；不嗔不罵喜有餘，世間誰復如君者？一雙銅劍秋水光，兩首新詩爭劍鏗。劍在床頭詩在手，不知誰作蛟龍吼。

龍尾硯歌（并引）

余舊作鳳唳石硯，銘其略云：「蘇子一見名鳳唳，坐令龍尾羞牛後。」已而求硯於歙，歙人云：「子自有鳳唳，何以此爲？」蓋不能平也。奉議郎方君彥德有龍尾大硯，奇真，謂余若能作詩少解前語者，當奉餉。乃作此詩。

黃琮白琥天不惜，願恐貪夫死懷璧；君看龍尾豈石材，玉德金聲寓於石。與天作石來幾時？與人作硯初不辭。詩成鮑謝石何與，筆落鍾王硯不知。錦茵玉匣俱塵垢，擣練支床亦何有？况嗔蘇子鳳唳銘，戲語相嘲作牛後。碧天照水風吹雲，明窗大几清無塵。我生天地一閑物，蘇子亦是支離人。龜言細語都不擇，春蚓秋蛇隨意畫。願從蘇子老東坡，仁者不用生分別。

張近幾仲有龍尾子石硯以銅劍易之

我家銅劍如赤蛇，君家石硯蒼璧槽而窪。君持我劍向何許？大明宮裏玉佩鳴衝牙。我得君硯亦安用？雪堂窗下爾雅箋蟲蝦。二物與人初不異，飄落高下隨風花。削縑玉具皆外物，視草草玄無等差。君不見秦趙城易壁，指圖睨柱相矜誇。又不見二生妾換馬，驕鳴啜泣思其家。不如無情兩相與，永以爲好譬之桃李與瓊華。

張作詩送硯反劍乃和其詩卒以劍歸之

贈君長鈇君當歌，每食無魚歎委蛇。一朝得見暴公子，櫛具欲與冠爭峨。豈比杜陵貧病叟，終日長纒隨短屨。斬蛟刺虎老無力，帶牛佩犢吏所訶。故將換硯豈無意，恐君瑯琊傷天和。作詩反劍亦何謂？知君欲以詩相磨。報章苦恨無好語，試向君硯求餘波。詩成劍往硯應笑，那將屋漏供懸河。

去歲九月二十七日在貴州生子名邁小名幹兒頽然穎異至今年七月二十
八日病亡於金陵作二詩哭之

吾年四十九，羈旅失幼子。幼子真吾兒，眉角生已似。未期觀所好，踴躍逐書史。搖頭却梨粟，似識非分取。吾
老常鮮歡，賴此一笑喜。忽然遭奪去，惡業我累爾！衣薪那免俗，變滅須臾耳。歸來懷抱空，老淚如瀉水。

我淚猶可拭，日遠當日忘。毋哭不可聞，欲與汝俱亡！故衣尚懸架，漲乳已流床。感此欲忘生，一臥終日僵。中
年忝聞道，夢幻講已詳。儲藥如丘山，臨病更求方。仍將恩愛刃，割此衰老腸。知迷欲自反，一慟送餘傷！

葉漣致遠見和二詩復次其韻（漣顛倒元韻）

平生無一女，誰復歎爾耳。滯留生此兒，足慰周南史。那知非真實，造物聊戲爾！煩惱初無根，恩愛爲種子。煩
公爲假說，反復相指似。欲除苦海浪，先乾愛河水。弁置一寸鱗，悠然笑侯喜。爲公寫餘習，餅壘一時取。

聞公少已悟，拄杖久倚牀。笑我老而癡，負鼓欲求亡。庶幾東門子，柱史安敢望。嗜毒戲猛獸，慮患先不詳。囊
破蛇已走，尙未省齧傷。妙哉兩篇詩，洗我千結腸。黯黯不作蠶，未老輒自僵。承謝湯火厄，冷然超無方。

次荆公韻四絕

青李扶疎禽自來，清真逸少手親栽；深紅淺紫從爭發，雪白鵝黃也鬪開。
斫竹穿花破綠苔，小詩端爲覓撻栽；細看造物初無物，春到江南花自開。
騎驢渺渺入荒陂，想見先生未病時；勸我試求三畝宅，從公已覺十年遲。
甲第非真有，閑花亦偶栽；聊爲清淨供，却對道人開。（公病後捨宅作寺）

張廐民挽詞

東晉巾車令，西京執戟郎；甘心向山水，結髮事文章。故自輕千戶，何曾羨一囊？天高鬼神惡，骨朽姓名芳。庚

嶺銘旌暗，秦淮舊宅荒；吾詩不用刻，妙語有黃香。（黃魯直作哀詞）

次韻葉致遠見贈

欲求五畝奇樵蘇，所至遲留似賈胡；信命不須歌去汝，逢人未免歎猶吾！人皆勸我杯中物，我獨憐君屋上烏；一技文章何足道，要言磨却是文殊。

次韻杭人裴維甫

餘杭門外葉飛秋，尚記居人挽去舟；一別臨平山上塔，五年雲夢澤南州。淒涼楚些緣吾發，邂逅秦淮爲子留；寄謝西湖舊風月，故應時許夢中遊。

次韻段縫見贈

季子東周負郭田，須知力穡是家傳；細思種薤五十本，大勝取禾三百廬。若得與君連北巷，故應終老忘西川；短衣疋馬非吾事，只擬關門不問天。

題孫思遜真

先生一去五百載，猶在峨眉西崦中；自爲天仙足官府，不應尸解坐蠹蟲。

戲作鮑魚一絕

粉紅石首仍無骨，雪白河豚不藥人；寄語天公與河伯，何妨乞與水精鱗。

同王勝之游蔣山

到郡席不暖，居民空惘然！好山無十里，遺恨恐他年。欲款南朝寺，同登北郭舡；朱門收畫戟，紺宇出青蓮。（荆公宅已爲寺）夾路蒼髯古，迎人翠麓偏；龍腰蟠故國，鳥爪寄會巖。竹杪飛華屋，松根泣細泉；峰多巧障日，江遠欲浮天。略約橫秋水，浮屠插暮煙；歸來踏人影，雲細月娟娟。

至真州再和二首

老手王摩詰，窮文孟浩然。論詩曾伴直，話舊已忘年。北上難陪驥，東行且趁舡。離亭花映肉，醉眼鶯窺蓮。柁轉三山沒，風回五兩徧。荒祠過瓜步，古鬢墮松巔。聞道清香閣，新荔白玉泉。莫教門掩夜，坐待月流天。小院檀槽闌，空庭樺燭煙。公詩便堪唱，爲付小嬋娟。

公顏如雪柏，千載故依然。笑我無根柳，空中不待年。背留歸闕旆，坐待逆風舡。特許門傳箭，那知箭起蓮。相逢月上後，小語坐西偏。流落千帆側，追思百尺巔。躬耕懷谷口，水石羨平泉。茅屋歸元亮，霓裳醉樂天。行聞宣室召，歸近御爐煙。未用歌池上，隨宜教李娟。

次韻答寶覺

芒屨竹杖布行纏，遮莫千山更萬山。從來無脚不解滑，誰信石頭行路難？

眉子石硯歌（與胡蘭）

君不見成都畫手開十眉，橫雲却月爭新奇。游人指點小壑處，中有漁陽胡馬嘶。又不見王孫青瑣橫雙碧，腸斷浮空遠山色。書生性命何足論，坐費千金買消渴。爾來喪亂愁天公，謫向君家書硯中。小窗虛幌相嫵媚，令君曉夢生春紅。毗耶居士談空處，結習已空花不住。試教天女爲磨鉛，千偈瀾翻無一語。

以玉帶施元長老，以納裙相報，次韻

病骨難堪玉帶圍，鈍根仍落箭鋒機。欲教乞食歌姬院，故與雲山舊納衣。此帶聞人如傳舍，流傳到我亦客哉。錦袍錯落真相稱，乞與佯狂老萬回。

次韻滕元發許中途索少遊

二公詩格老彌新，醉後狂吟許野人。坐着青丘吞澤芥，自慙黃潦薦溪蘋。兩邦旌纛光相照，十畝鋤犂手自

親，何似秦郎妙天下，明年獻頌請東巡。

送金山鄉僧歸蜀開堂

撞鐘浮玉山，迎我三千指。衆中聞警竅，未語知鄉里。我非箇中人，何以默識子。振衣忽歸去，隻影千山裏。涪江與中冷，共此一味水。冰盤薦琥珀，何似糖霜美？

送沈逵赴廣南

嗟我與君皆丙子，四十九年窮不死。君隨幕府戰西羌，夜渡冰河斫雲壘。飛塵漲天箭洒甲，歸對妻孥真夢耳。我謫黃岡四五年，孤舟出沒煙波裏。故人不復通問訊，疾病飢寒疑死矣。相逢握手一大笑，白髮蒼顏略相似。我方北渡脫重江，君復南行輕萬里。功名如幻何足計，學道有涯真可喜。峴嶺丹砂已付君，汝陽羸豔吾何取。君歸赴我雞黍約，買田築室從今始。

豆粥

君不見呼沱流澌車折軸，公孫倉皇奉豆粥。濕薪破薪自燎衣，飢寒頓解劉文叔。又不見金谷敲冰草木春，帳下烹煎皆美人。萍齏豆粥不傳法，咄嗟而辦石季倫。干戈未解身如寄，聲色相纏心已醉。身心顛倒自不知，更識人間有真味。豈如江頭千頃雪色蘆，茆簷出沒晨煙孤。地確春杭光似玉，沙餅煮豆軟如酥。我老此身無着處，賣書來問東家住。臥聽鷄鳴粥熟時，蓬頭曳履君家去。

秦少游夢發殯而葬之者云是劉發之柩是歲發首薦秦以詩賀之劉涇亦作

因次其韻

君看三代士執雉，本以殺身為小補。居官死職戰死綏，夢尸得官真古語。五行勝已斯爲官，官如草木吾如土。仕而未祿猶賓客，待以純臣蓋非古。魏焉曰獻稱寡君，豈比公卿相爾汝。世衰道微士失已，得喪悲懼友其故。

草袍蘆簞相嫵媚，飲食嬉遊事羣聚。曲江舂舂月燈毬，是謂舞殯而歌墓。看花走馬到東野，餘子紛紛何足數？二生年少兩豪逸，詩酒不知軒冕苦。故令將仕夢發棺，勸子勿爲官所腐。塗車芻靈皆假設，著眼細看君勿誤。時來聊復一飛鳴，進隱不須煩伍舉。

金山夢中作

江東賈客木絲裘，會散金山月滿樓。夜半潮來風又熟，臥吹簫管到揚州。

次韻周禮惠石鏡

銅腥鐵澀不宜泉，愛此蒼然深且寬。蟹眼翻波湯已作，龍頭拒火柄猶寒。薑新鹽少茶初熟，水漬雲烝薛未乾。自古函牛多折足，要知無脚是輕安。

次韻荊穎叔

月明驚鷓未安枝，一棹飄然影自隨。江上秋風無限浪，枕中春夢不多時。瓊林花草聞前語，罨畫溪山指後期。豈敢便爲雞黍約，玉堂金殿要論思。（蔣詩記及第時，瓊林宴坐中所言，且約同卜居陽羨。）

龜山辯才師

此生念念浮雲改，寄語長淮好在。故人宴坐虹梁南，新河巧出龜山背。木魚呼客振林莽，鐵鳳橫空飛綵繪。忽驚堂宇變雄深，坐覺風雷生擊欸。羨師游戲浮漚間，笑我榮枯彈指內。嘗茶看畫亦不惡，問法求詩了無礙。千里孤帆又獨來，五年一夢誰相對。何當來世結香火，永與名山躬井磴。

贈潘谷

潘郎曉踏河陽春，明珠白壁驚市人。那知望拜馬蹄下，胸中一斛泥與塵。何似墨潘穿破褐，琅琅翠餅敲玄笏。布衫漆黑手如龜，未嘗冰壺貯秋月。世人重耳輕目前，區區張李爭熾妍。一朝入海尋李白，空看人間畫墨仙。

徐大正閑軒

冰蠶不知寒，火鼠不知暑，知閑見閑地，已覺非閑侶。君看東坡翁，懶散誰比數？形骸墮醉夢，生事委塵土。早眠不見燈，晚食或欺午。臥看氈取坐，視麥漂雨。語希舌頰強，行少腰脚僂。五年黃州城，不踏黃州鼓。人言我閑客，置此閑處，所問閑作何味？如眼不自親，頗訝徐孝廉。得閑能幾許？介子願奉使，翁歸備文武。應緣不耐閑，名字挂庭宇。我詩爲閑作，更得不閑語。君如汗血駒，轉盼略燕楚。莫嫌鑿輅重，終勝鹽車苦。

蒜山松林中可卜居余欲僦其地地屬金山故作此詩與金山元長老

魏王大瓠無人識，種成何翅實。五石不詞破，作兩大尊。只憂水淺江湖窄，我材濩落本無用。虛名驚世終何益？東方先生好自譽，孟賁子路并爲一。杜陵布衣老且愚，信口自比契與稷。莫年欲學柳下惠，嗜好酸鹹不相入。金山也是不羈人，早歲聞名晚相得。我醉而嬉欲仙去，旁人笑倒山謂實。問我此生何所歸，笑指浮休百年宅。蒜山幸有閑田地，招此無家一房客。

王中父哀詞（并敘）

仁宗朝以制策登科者十五人，軾忝冒時，尙有富彥國、張安道、錢子飛、吳長文、夏公酉、陳令舉、錢醇老、王中父、并軾與家弟轍九人存焉。其後十有五年，突中父於密州作詩吊之，則子飛、長文、令舉沒矣。又八年，軾自黃州量移汝海，與中父之子沆之相遇於京口，相持而泣，則十五人者獨三人存耳。蓋安道及軾與家弟而已。嗚呼！悲夫！乃復次前韻以遺沆之。時沆之亦以罪謫家于錢塘云。

生芻不獨比前人，東菴端能廢謝鯤。子達想無身後念，吾衰不復夢中論。已知毅豹爲均死，未識荆凡定孰存。堪笑東坡癡鈍老，區區猶記刻舟痕。

蘇景繁官舍小閣

使君不獨東南美，典刑長記先君子。戲嘲王叟短轅車，肯爲徐郎書紙尾。三年弭節江湖上，千首放懷風月裏。手開東閣坐虛明，目淨東溪照清泚。紫琴濁酒容一榻，落霞孤鶩供千里。大舫何時繫門柳，小詩屢欲書臆紙。文昌新構滿鸚鵡，都邑正喧收杞梓。相逢一醉豈有命，南來寂寞君歸矣！

高郵陳直躬處士畫鴈二首

野鴈見人時，未起意先改。君從何處看得此無人態，無乃橋木形，人禽兩自在。北風振枯葦，微雪落瓏瓏。慘淡雲水昏，晶熒沙礫碎。弋人悵何慕，一舉渺江海。

衆禽事紛爭，野鴈獨閑絮。徐行意自得，俯仰老有節。我衰寄江湖，老伴雜鵝鴨。作書問陳子，曉景書蒼鷄。依依聚圓沙，稍稍動斜月。先鳴獨鼓翅，吹亂蘆花雪。

和王旂二首（旂平父子）

異時長怪謫仙人，舌有風雷筆有神。聞道騎鯨遊汗漫，憶嘗捫蝨話悲辛。氣吞餘子無全目，詩到諸郎尙絕倫。白髮故交空掩卷，淚河東注問蒼旻。

嫋嫋春風送渡關，娟娟霜月照生還。遲留歲莫江淮上，來往君家伯仲間。未厭冰灘吼新洛，且看松雪媚南山。野梅官柳何時動，飛蓋長橋待子閑。

次韻張旼

新洛霜餘兩岸隆，塵埃舉袂識西風。臨淮自古多名士，樽酒相從樂寓公。半日偷閑歌嘯裏，百年待盡往來中。知君不向窮愁老，尙有清詩氣吐虹。

次韻王定國南遷回見寄

土量銅花蝕秋冰，要須悍石相礪砥。十年冰蘖戰膏梁，萬里煙波濯紈綺。歸來詩思轉清激，百文空彈數紉

鯉。逝將桂浦擷蘭蓀，不記槐堂收劍履；却思庾嶺今何在？更說彭城真夢耳！（來詩述彭城舊游）君知先竭是
甘井，我願得全如苦李；妄心不復九回腸，至道終當三洗髓。廣陵陽羨何足較？只有無何真我里；（余買田陽羨，
來詩以爲不如廣陵）樂全老子今禪伯，（張安道也，定國其壻）掣電機鋒不容擬。心通豈復問云何？印可聊
須答如是；相逢爲我話留滯，桃花春漲孤舟起。

贈梁道人

採藥壺公處處過，笑看金狄手摩挲；老人大父識君久，造物小兒如子何！寒盡山中無歷日，雨斜江上一漁
簑；神仙護短多官府，未厭人間醉踏歌。

題雍秀才畫草蟲八物

促織

月叢號耿耿，露葉泣溥溥；夜長不自暖，那憂公子寒。

蟬

蛻形濁汗中，羽翼便翾好；秋來問何闊，已抱寒莖槁。

蝦蟆

悍目知誰瞋，蟠腹空自脹；慎勿困蜈蚣，飢虵不汝放。

蟋蟀

供鍾起暗室，飄瓦落空庭；誰言轉丸手，能作殷牀聲。

天水牛

兩角徒自長，空飛不服箱；爲牛竟何事，利吻穴枯桑。

蝎虎

跂跂有足蛇，脉脉無角龍；爲虎君勿笑，食盡蠶尾蟲。

蝸牛

腥涎不滿殼，聊足以自濡；升高不知回，竟作黏壁枯。

鬼蝶

雙眉卷鐵絲，兩翅暈金碧；初來花爭妍，忽去鬼無迹。

泗州南山監倉蕭淵東軒二首

偶隨樵父採都梁，（南山名都梁山，山出都梁香故也。）竹屋松扉試乞漿；但見東軒堪隱几，不知公子是監倉。溪中亂石牆垣古，山下寒蔬七箸香；我是江南舊游客，挂冠知有老蕭郎。

北望飛塵苦畫羅，洗心聊復寄東齋；珍禽聲好猶思越，野橘香清未過淮；有信微泉來遠嶺，無心明月轉空堦；一官倉庾真堪老，坐看松根絡斷崖。

泗州除夜雪中黃師是送酥酒二首

莫雪紛紛投碎米，春流咽咽走黃沙；舊游似夢徒能說，逐客如僧豈有家；冷硯欲書先自凍，孤燈何事獨成花；使君半夜分酥酒，驚起妻孥一笑譁。

關右土酥黃似酒，揚州雲液却如酥；欲從元放覓拄杖，忽有麴生來座隅；對雪不堪令飽煖，隔缸應已厭歌呼；明朝積玉深三尺，高枕床頭尙一壺。

章錢二君見和復次韻答之

黃昏已作風翻絮，半夜猶驚月在沙；照汴玉峰明佛剎，隔淮雲海暗人家；來辭有信迎三白，磨匱無香散六

花。(詹匍梔子花也，與雪花皆六出。)欲喚阿咸來守歲，林鳥樞馬鬪喧譁。

分無纖手裁春勝，况有新詩點蜀酥。醉裏冰髭失纓絡，夢回布被起廉隅。君應旅睫寒生疊，我亦飢腸夜自呼。明日南山春色動，不知誰佩紫微壺。

正月一日雪中過淮謁客回作二首

十里清淮上，長堤轉雪龍。水崖落屐齒，風葉亂裘茸。萬頃穿銀海，千尋渡玉峰。從來脩月手，合在廣寒宮。攢眉有底恨，得句不妨清。霽霧開寒谷，飢鴉舞雪城。橋聲春市散，塔影暮淮平。不用殘燈火，船窗夜自明。

劉乙新作射亭 (乙新嘗知眉州)

蘭玉當年刺史家，雙鞬馳射笑穿花。而今白首閑驄馬，只有清樽照畫蛇。寂寂小軒蛛網遍，陰陰垂柳鴈行斜；手柔弓燥春風後，置酒看君中戟牙。

孫莘老寄墨四首

徂徠無老松，易水無良工。珍材取樂浪，妙手惟潘翁。(潘谷作墨，雜用高麗煤。)魚胞熟萬杵，犀角盤雙龍。墨成不敢用，進入蓬萊宮。蓬萊春晝永，三殿明房櫳。金箋洒飛白，瑞霧縈長虹。遙憐醉常侍，一笑開天容。

谿石琢馬肝，剡藤開玉版。噓噓雲霧出，奔奔龍虵縮。此中有何好，秀色紛滿眼。故人歸天祿，古漆窺畫簡。隄塵給尙方，老手擅編划。分餘幸見及，流落一歎歎。

我貧如飢鼠，長夜空齧醬。瓦池研竈煤，葦管書柿葉。近者唐夫子，遠致烏玉玦。(唐林夫寄張遇墨半丸。)先生又繼之，圭璧爛箱篋。清窗洗硯坐，虵蚓稍蟠結。便有好事人，敲門求醉帖。

吾窮本坐詩，久服朋友戒。五年江湖上，閉口洗殘債。今來復稍稍，快癢如爬疥。先生不譏訶，又復寄詩械。幽光發奇思，點黠出荒怪。詩成一自笑，故疾逢蝦蟹。

蘇東坡東坡集 卷十四

一一二

留題蘭皋亭

雪後東風未肯和，扣門遷客夜經過；不知舊竹生新筍，但見清伊換濁河。無復往來乘下澤，聊同笑語說東坡；明年我亦開三徑，寂寂兼無雀可羅。

和人見贈

只寫東坡不著名，此身已是一長亭；壯心無復春流起，衰髮從教病葉零。知有雪兒供筆硯，應嗤竈婦洗盆餅；回來索酒公應厭，京口新傳作客經。

和田仲宣見贈

頭白江南醉司馬，寬心時復喚殷兄；寒潮不應淮無信，客路相隨月有情。未許低頭拜東野，徒言共飲勝公榮；好詩惡韻那容和，刻燭應須便置航。

和王勝之三首

城上湖光暖欲波，美人唱我踏春歌；魯公賓客皆詩酒，誰是神仙張志和？
齋釀如繩漲綠波，公詩句句可弦歌；流觴曲水無多日，更作新詩繼永和。
要知太守憐孤客，不惜陽春和俚歌；坐睡樽前呼不應，爲公雕琢損天和。

記夢（并敘）

樂全先生夢人以詩三篇示之，字皆旁行，而不可識。旁有人道衣古貌，爲讀其中一篇云：「人事且常在，留質悟圓間。」凡四句，覺而忘其二，以告其客蘇軾，軾以私意廣之云。

圓間有物物間空，豈有圓空入井中？不信天形真箇樣，故應眼力自先窮。連環已解如神手，萬竅猶號未濟風；稽首問公公大笑，本來誰礙更求通。

卷十五 詩七十二首

寄勸算與蒲傳正

蘭溪美箭不成笛，離離玉筋排霜翥；千溝萬樓自生風，入手未開先慘慄。公家列屋閑蛾眉，珠簾不動花陰移；霧帳銀牀初破睡，牙籤玉局坐彈碁。東坡病叟長羈旅，凍臥飢吟似飢鼠；倚賴春風洗破衾，一夜雪寒披故絮。火冷燈青誰復知，孤舟兒女自憂吟。皇天何時反炎燠，愧此入尺黃琉璃。願公淨掃清香閣，臥聽風漪磴滿榻；習習還從兩腋生，請公乘此朝闔闔。

寄恠石石斛與魯元翰

山骨裁方斛，江珍拾淺灘。清池上几案，碎月落杯盤。老去懷三友，平生困一簞；堅姿聊自傲，秀色亦堪餐。好去髯卿舍，憑將道眼看。東坡最後供，霜雪照人寒。

漁父四首

漁父飲，誰家去魚蟹。一時分付酒，無多少。醉爲期，彼此不論錢數。
漁父醉，簑衣舞。醉裏却尋歸路，輕舟短棹任斜橫。醒後不知何處。
漁父醒，春江午。夢斷落花飛絮，酒醒還醉醉還醒。一笑人間今古。
漁父笑，輕鷗舉。瀟瀟一江風雨，江邊騎馬是官人。借我孤舟南渡。

李憲仲哀詞（并敘）

同年友李君諱惇，字憲仲，賢而有文，不幸早世，軾不及與之游也。而識其子廌有年矣。廌自陽翟見余於南京，泣曰：「吾祖母邊，母馬，前母張，與君之喪，皆未葬，貧不敢以飢寒爲戚。願四喪未舉，死不瞑目矣。」

適會故人梁先吉老，聞余當歸耕陽羨，以絹十四絲百兩爲贄。詞之不可，乃以遺薦曰：「此亦仁人之餽也！」既又作詩以告知君與薦者，庶幾皆有以助之。薦年二十五，其文燁然，氣節不凡，此豈終窮者哉？大夢行當覺，百年特未滿。遑哀已逝人，長眠寄孤館。念我同年生，意長日月短。鹽車囚麒麟，烈火廢圭瓊。後生有奇骨，出語已精悍。蕭然野鶴姿，誰復識中散。有生寓大塊，死者誰不窆。嗟君獨久客，不識黃土暖。推衣助孝子，一甌滋湯旱。誰能脫左驂，大事不可緩。

贈眼醫王生彥若

鍼頭如麥芒，氣出如車軸。間關絡脈中，性命寄毛粟。而况清淨眼，內景含天燭。琉璃貯沆瀣，輕脆不任觸。而子於其間，來往施鋒鏃。笑談紛自若，觀者頭爲縮。運鍼如運斤，去翳如拆屋。常疑子善幻，他技雜符祝。子言吾有道，此理君未矚。形骸一塵垢，貴賤兩草木。世人方重外，妄見瓦與玉。而我初不知，刺眼如刺肉。君看目與翳，是翳要非目。目翳苟二物，易分如麥菽。甯聞老農夫，去草更傷穀。鼻端有餘地，肝膽分楚蜀。吾於五輪間，蕩蕩見空曲。如行九軌道，並驅無擊轂。空花誰開落，明月自朏朏。請問樂全堂，忘年老尊宿。（彥若樂全先生門下醫也。）

與歐育等六人飲酒

忽驚春色二分空，且看樽前半丈紅。苦戰知君便白羽，倦遊憐我憶黃封。年來齒髮老未老，此去江淮東復東。記取六人相會處，引杯看劍坐生風。

觀杭州鈴轄歐育刀劍戰袍

青綾納衫暖襯甲，紅線勒巾光遶脅。禿襟小袖鵬鶻盤，大刀長劍龍蛇插。兩軍鼓噪屋瓦墜，紅塵白羽紛相戛。將軍思重此身輕，笑履鋒鏃如一指。書生只肯坐帷幄，談笑毫端弄生殺。叫呼擊鼓催上竿，猛士應憐小兒黠。試問黃河夜偷渡，掠面驚沙寒霎霎。何如大艦日高眠，一枕清風過茗雪。

王伯敬所藏趙昌畫四首

梅花

南行渡關山，沙水清練練；行人已愁絕，日暮集微霰。殷勤小梅花，鬢髯吳姬面；暗香隨我去，回首驚千片。至今開畫圖，老眼淒欲泣；幽懷不可寫，歸夢君家情。

黃葵

弱質困夏永，奇姿蘇曉涼；低昂黃金杯，照耀初日光。檀心自成暈，翠葉森有芒；古來寫生人，妙絕誰似昌？晨粧與午醉，真態含陰陽；君看此花枝，中有風露香。

芙蓉

清颺已拂林，積水漸收潦；谿邊野芙蓉，花水相媚好。坐看池蓮盡，獨伴霜菊槁；幽姿強一笑，莫景迫摧到。淒涼似貧女，嫁晚驚衰早；誰寫少年容，樵人劍南老。

山茶

蕭蕭南山松，黃葉墮勁風；誰鄰兒女花，散火冰雪中。能傳歲寒姿，古來惟丘翁；趙叟得其妙，一洗膠粉空。掌中調丹砂，染此鶴頂紅；何須誇落墨，獨掌江南工。

寄吳德仁兼簡陳季常

東坡先生無一錢，十年家火燒凡鈿；黃金可成河可塞，只有霜鬢無由玄。龍丘居士亦可憐，談空說有夜不眠；忽聞河東獅子吼，拄杖落手心茫然！誰似濮陽公子賢，飲酒食肉自得仙？平生寓物不留物，在家學得忘家禪。門前罷亞十頃田，清溪遶屋花連天；溪堂醉臥呼不醒，落花如雪春風顛。我遊蘭溪訪清泉，已辦布襪青行纏；稽山不是無賀老，我自興盡回酒船。恨君不識顏平原，恨我不識元魯山；銅駝陌上會相見，握手一笑三千年。

題王述少帖

顏張醉素兩禿翁，追逐世好稱書工。何曾夢見王與鍾，妄自粉飾欺盲聾。有如市倡抹青紅，妖歌嫵舞眩兒童。謝家夫人談豐容，蕭然自有林下風。天門蕩蕩驚跳龍，出林飛鳥一掃空。爲君草書續其終，待我他日不忽忽。

書林逋詩後

吳儂生長湖山曲，呼吸湖光飲山淥。不論世外隱君子，傭兒販婦皆冰玉。先生可事絕俗人，神清骨冷無由俗。我不識君曾夢見，瞳子瞭然光可燭。遺篇妙宇處處有，步繞西湖看不足。詩如東野不言寒，書似西臺差少肉。平生高節已難繼，將死微言猶可錄。自言不作封禪書，更看悲吟白頭曲。（逋臨終詩云：「茂陵異日求遺草，猶喜初無封禪書。」）我笑吳人不好事，好作祠堂傍脩竹。不然配食水仙王，一盞寒泉薦秋菊。

和仲伯達

歸山歲月苦無多，尚有丹砂奈老何。繡谷只應花自染，鏡潭長與月相磨。君方傍海看初日，我已橫江擊素波。人不我知斯我貴，不須雷雨起龍梭。

春日

鳴鳩乳燕寂無聲，日射西窗潑眼明。午醉醒來無一事，只將春睡賞春晴。

贈袁陟

是身如虛空，萬物皆我儲。胡爲強分別，百金買田廬。不見袁夫子，神馬載尻輿。游於無何有，一飯不顧餘。官湖爲我池，學舍爲我居。何以遺子孫，此身自蘧蒚。薰風暗楊柳，秋水淨芙蓉。應觀我知子，不怪子知魚。

蘇子容母陳夫人挽詞

蘇陳甥舅真冰玉，正始風流起頽俗。夫人高節稱其家，凜凜寒松映脩竹。雞鳴爲善日日新，八十三年如一

晨；豈惟家室宜壽母，實與朝廷生異人。忘軀徇國乃吾子，三仕何曾知愠喜？不煩擁笏強垂魚，我視去來皆夢耳！
誦詩相挽真區區，墓碑千字多遺餘。他年太史取家傳，知有班昭續漢書。

歸宜興留題竹西寺

十年歸夢寄西風，此去真爲田舍翁。剩覓蜀岡新井水，要攜鄉味遇江東。
道人勸飲雞蘇水，童子能煎鴛鴦湯。暫借藤床與瓦枕，莫教孤負竹風涼。
此生已覺都無事，今歲仍逢大有年。山寺歸來聞好語，野花啼鳥亦欣然。

與孟震同遊常州僧舍

年來轉覺此生浮，又作三吳浪漫遊。忽見東平孟君子，夢中相對說黃州。
湛湛清池五月寒，小山無數碧巒岫。種杉戢戢三千本，且作凌雲合抱看。
知君此去便歸耕，笑指孤舟一葉輕。待向三茆乞靈雨，半篙流水贈君行。

贈常州報恩長老

碧玉碗盛紅碼瑙，井花水養石菖蒲。也知法供無窮盡，試問禪師得飽無？
薦福老懷真巧便，淨慈兩本更尖新。憑師爲作鐵門限，準備人間請話人。

次韻答賈耘老

五年一夢南司州，飢寒疾病爲子憂。東來六月井無水，仰看古堰橫奔牛。平生管鮑我知子，今日陳蔡誰從丘？
昨夜航爭路泥水澁，牽挽直欲來瓜州。自言嗜酒得風痺，故鄉不敢居溫柔。空將汎愛救溝壑，衰病不復從前樂。
今年太守真臥龍，笑語炎天出冰雹。時低九尺蒼須髻，過我三閭小池閣。故人改觀爭來賀，小兒不信猶疑錯。爲君置酒飲且哦，草間秋蟲亦能歌。可憐老驥真老矣，無心更秣天山禾。

墨花（并敘）

世多以墨畫山水竹石人物者，未有以畫花者也。汴人尹白能之，爲賦一首。

造物本無物，忽然非所難。花心超墨暈，春色散毫端。縹渺形纒具，扶疎態自完。蓮風盡傾倒，杏雨半披殘。獨有狂居士，求爲黑牡丹。兼書平子賦，歸向雪堂看。

送竹几與謝秀才

平生長物擾天真，老去歸田只此身。留我同行木上坐，贈君無語竹夫人。但隨秋扇年年在，莫鬪瓊枝夜夜新。堪笑荒唐玉川子，莫年家口若爲親？

涇陰堂

白水滿時雙鷺下，綠槐高處一蟬吟。酒醒門外三竿日，臥看谿南十畝陰。

次韻許遵

蒜山渡口挽歸艫，朱雀橋邊看道裝。供帳已應煩百兩，擊鮮無久涸諸郎。問禪時到長干寺，載酒閑過綠野堂。此味只憂兒輩覺，逢人休道北窗涼。

贈章默（并敘）

章默居士，字志明，生公侯家，才性高爽，棄家求道，不蓄妻子，與世無累，而父母與兄之喪，貧不能舉。以是眷眷世間，不能無求於人。余深哀其志，既有以少助之。又取其言爲詩，以贈其行，庶幾有哀之者。

章子親未葬，餘生抱羸疾，朝吟噎鄰里，夜淚腐茵席。前年黑花生，今歲白髮出。身隨日月逝，恨與天地畢。願求不毛田，親築長夜室。難從王孫裸，未忍夏后聖。五陵多豪士，百萬付一擲。心知義財難，甘就貧友乞。不詞毛粟施，行自丘山積。此志苟朝遂，夕死真不戚。誓求無生理，不踐有爲迹。棄身屍隄林，烏烏任狼籍。

送穆越州

江海相忘十五年，羨君松柏蔚蒼顏；
四朝耆舊冰霜後，兩郡風流水石間。
舊政猶傳蜀父老，先聲已振越溪山；
樽前俱是蓬萊守，莫放高樓雪月閑。

贈葛葦

竹椽茆屋半摧傾，背向蜂窠寄此生？
長恐波頭卷室去，欲將舡尾載君行。
小詩試擬孟東野，大草閑臨張伯英；
消遣百年須底物，故應憐我不歸耕。

贈王叔

與君鬢別不須嗟，俯仰歸來鬢未華；
記取江南煙雨裏，青山斷處是君家。

南都妙峯亭

千尋挂雲闕，十頃含風灣；
開門弄清泚，照見雙銅銀。
池臺半禾黍，桃李餘榛菅。
無人肯回首，日暮車班班。
史君非世人心，與古佛閑時。
邀聲利客來，洗塵埃顏。
新亭在東阜，飛宇凌通闕。
古磬磨翠壁，霜林散煙鬢。
孤雲抱商丘，芳草連杏山。
俯仰盡法界，逍遙寄人寰。
亭亭妙高峰，了了蓬艾間。
五老歷彭蠡，三峰照潼關。
均為拳石小，配此一掬慳。
煩公為標指，免使慙躋攀。

神宗皇帝挽詞三首

文武固天縱，欽明又日新；
化民何止聖，妙物獨稱神。
政已三王上，言皆六籍醇；
巍巍本無象，刻畫愧孤臣。
未易名堯德，何須數舜功；
小心仍致孝，餘事及平戎。
典禮從周舊，官儀與漢隆；
誰知本無作，千古自承風。
接統真千歲，膺期止一章；
周南稍留滯，宣室送淒涼。
病馬空嘶櫪，枯葵已泫霜；
餘生臥江海，歸夢泣嵩邙。

金山妙高臺

我欲乘飛車，東訪赤松子。蓬萊不可到，弱水三萬里。不如金山去，清風半帆耳。中有妙高臺，雲峰自孤起。仰觀初無路，誰信平如砥。臺中老比丘，碧眼照窗几。巉巉玉爲骨，凜凜霜入齒。機鋒不可觸，千偈如翻水。何須尋德雲，卽此比丘是。長生未暇學，請學長不死。

贈杜介（并敘）

元豐八年七月二十五日，杜幾先自浙東還，與余相遇於金山，話天台之異，以詩贈之。

我夢遊天台，橫空石橋小。松風吹茵露，翠濕香嫋嫋。應真飛錫過，絕澗度雲鳥。舉意欲從之，倏然已松杪。微言粲珠玉，未說意先了。覺來如墮空，耿耿窗戶曉。羣生陷迷網，獨達從古少。杜叟子何人，長歎萬物表。妻孥空四壁，振策念輕矯。遂爲赤城遊，飛步凌縹渺。問禪不歸舍，屢爲瓠壺繞。何人識此志，佛眼自照燎。我夢君見之，卓爾非魔燒。仙葩發茗碗，藟刻分葵蓼。從今更不出，閉戶閑腰褱。時從佛頂巖，馳下雙蓮沼。

次韻孫莘老斗野亭寄子由在郡伯堰

落帆謝公楮，日脚東西平。孤亭得小憩，莫景含餘清。坐待斗與牛，錯落挂南薨。老僧如夙昔，一笑意已傾。新詩出故人，舊事疑前生。吾生七往來，送老海上城。逢人輒自哂，得魚不忍烹。似聞續溪老，復作東都行。小詩如秋菊，豔豔霜中明。過此感我言，長篇發春榮。

送楊傑（并敘）

無爲子嘗奉使登泰山絕頂，鷄一鳴，見日出。又嘗以事過華山，重九日飲酒蓮花峰上。今乃奉詔與高麗僧統遊錢塘，皆以王事而從方外之樂。善哉！未會有也！作是詩以送之。

天門夜上賓，出日萬里紅。波半天赤歸，來平地看跳丸。一點黃金鑄秋橋，太華峰頭作重九。天風吹灑黃花酒，浩然馳下腰帶鞵。醉舞崩崖一揮手，神遊八極萬緣虛。下視蚊雷隱汗渠，大千一息八十返。笑厲東海騎鯨魚。

三韓王子西求法，鑿齒彌天兩勅敵；過江風急浪如山，寄語舟人好看客！

次韻送徐大正

別時酒盞照燈花，知我歸期漸有涯；去歲渡江萍似斗，今年並海棗如瓜。多情明月邀君共，無價青山爲我賒；千首新詩一竿竹，不應空釣漢江槎。

揚康公有石狀如醉道士爲戲此詩

楚山固多猿，青者黠如壽；化爲狂道士，山谷恣騰蹂。誤入華陽洞，竊飲茆君酒；君命囚巖間，巖石爲械扭。松根絡其足，藤蔓縛其肘；蒼苔眯其目，叢棘哽其口。三年化爲石，堅瘦敵瓊玖；無復號雲聲，空餘舞杯手。樵夫見之笑，抱賣易升斗；楊公海中仙，世俗那得友。海邊逢姑射，一笑微俛首；胡不載之歸，用此頑且醜。求詩紀其異，本未得細剖；吾言豈妄云，得之亡是叟。

迺作淮口遇風詩戲用其韻

我詩如病驥，悲鳴向衰草；有兒真驥子，一噴羣馬倒。養氣勿吟哦，聲名忌太早；風濤借筆力，勢逐孤雲掃。何如陶家兒，逸舍覓梨棗；君看押強詔，已勝郊與島。

次韻徐積

殺鷄未肯邀季路，裹飯先須問子來；但見中年隱槐市，豈知平日賦蘭臺。海山入夢方東去，風雨留人得覽陪；若說蛾眉眼前是，故鄉何處不堪回。

元豐七年有詔京東淮南築高麗亭館密海二州騷然有逃亡者明年軾過之

歎其壯麗留一絕云

簷楹飛舞垣墻外，桑柘蕭條斤斧餘；盡賜昆耶作奴婢，不知償得此人無？

過密州次韻趙明叔喬禹功

先生依舊廣文貧，老守時遭醉尉嗔。汝輩何曾堪一笑，吾儕相對復三人。黃雞催曉淒涼曲，白髮驚秋見在身；一別膠西舊朋友，扁舟歸釣五湖春。

再過常山和昔年留別詩

僵屨山前叟，迎我如迎新。那知夢幻軀，念念非昔人。江湖久放浪，朝市誰相親？却尋泉源去，桃花逢避秦。

再過超然臺贈太守霍翔

昔飲零泉別常山，天寒歲在龍蛇間。山中兒童拍手笑，問我西去何當還？十年不赴竹馬約，扁舟獨與漁叢闕；重來父老喜我在，扶挈老幼相遮攀。當時襤褸皆七尺，而我安得留朱顏？問今太守爲誰歟？護羌充國鬢未斑。（翔自言在燕河作屯田有功。）躬持牛酒勞行役，無使杞菊嘲寒慳；超然置酒尋舊迹，尙有詩賦饒堅頑。孤雲落日在馬耳，照耀金碧開煙鬟。却淇自古北流水，跳波下瀨鳴玦環。願公談笑作石埭，坐使城郭生溪灣。

海市（并敘）

予聞登州海市舊矣，父老云：「常出於春夏，今歲晚不復見矣。」予到官五日而去，以不見爲恨，禱於海神廣德王之廟，明日見焉，乃作此詩。

東方雲海空復空，羣仙出沒空明中。蕩搖浮世生萬象，豈有具闕藏珠宮。心知所見皆幻影，敢以耳目煩神工；歲寒水冷天地閉，爲我起鰐魚龍。重樓翠阜出霜曉，異事驚倒百歲翁。人間所得容力取，世外無物誰爲雄？率然有請不我拒，信我入厄非天窮。潮陽太守南遷歸，喜見石廩堆祝融。自言正直動山鬼，豈知造物哀龍鍾。信眉一笑豈易得，神之報汝亦已豐。斜陽萬里孤鳥沒，但見碧海磨青銅。新詩綺語亦安用，相與變滅隨東風。

萬松誰種已縱縱，半嶺蒼雲映此邦；
露重珠纒蒙翠蓋，風來石齒碎寒江。
浮空兩竹橫南閣，倒影扶桑射北窗；
坐待夕烽傳海嶠，重城歸去踏逢逢。

過萊州雪後望三山

東海如碧環，西北卷登萊；
雲光與天色，直到三山回。
我行適冬仲，薄雪收浮埃；
黃昏風絮定，半夜扶桑開。
參差太華頂，出沒雲濤堆；
安期與羨門，乘龍安在哉？
茂陵秋風客，勸爾麾一杯；
帝鄉不可期，楚些招歸來。

遺直坊（并敘）

富鄭公之客李君諱常，登人也。故太守李公諱師中榜其闔曰「遺直」，而其子大方求詩於軾，爲賦一首。

使君不浪出，羔鴈親扣門；
先生但清坐，蕪水已多言。
當時邦人化，市無晨飲豚；
歲月曾幾何，客主皆九原。
魯經有餘歎，楚些無歸魂；
我作遺直詩，過者式其藩。

次韻趙令饒

東坡已報六年穰，惆悵紅塵白首郎；
枕上溪山猶可見，門前冠蓋已相望。
故人年少真瓊樹，落筆風生戰堵牆；
端向斐間尋吏部，老來專以醉爲鄉。

次韻王定國得穎倅二一首

仙風入骨已凌雲，秋水爲文不受塵；
一噫固應號地竊，餘波猶足掛天紳。
買牛但自捐三尺，射鼠何勞挽六鈞？
莫向百花潭上去，醉翁不見與誰春。

滔滔四海我知津，每愧先生植杖芸；
自少多言晚聞道，從今閉口不論文。
豔翻白獸樽中酒，歸煮青泥坊底芹；
要識老僧無盡處，床前牛蠡不曾聞。

次韻趙令鑠惠酒

神山無石髓，生世悲覽寓。坐待玉膏流，千載真旦暮。青州老從事，高上非所部。惠然肯見從，知我憎市醕。開餅自洗盞，肴核誰與具。門前聽剝啄，烹魚得尺素。

送范純粹守慶州

才大古難用，論高常近迂。君看趙魏老，乃爲膝大夫。浮雲無根蒂，黃潦能須臾。知經幾成敗，得見真賢愚。羽旄照城闕，談笑安邊隅。當年老使君，赤手降於菟。諸郎更何事，折筮鞭其雛。吾知鄧平叔，不鬪月支胡。

次韻王震

攜文過我治平間，霧豹當時始一班。聞道吹噓借餘論，故教流落得生還。清篇帶月來霜夜，妙語先春發病顏。詩酒暮年猶足用，竹林高會許時攀。

次韻王定國謝韓子華過飲

楚有孫叔敖，長城隱千里。哀哉練裙子，負薪躡破履。豈無故交親，逝去如覆水。不如老優孟，談笑託諧美。世家不可恃，如倚折足几。祥符有賢相，手握天下砥。懿敏亦名公，三貴德爵齒。蓋棺今幾日，公子誰料理。誰要卿料理，欲說且止。止宅相開府，公久爲蒼生起。如何垂老別，冰盤餽蒼耳。親嫌妨鸚鵡，相對發微訛。新詩如彈丸，脫手不移咎。我亦老賓客，苦語落絢綺。莫詞三上章，有道貧賤取。

惠崇春江曉景二首

竹外桃花三兩枝，春江水暖鴨先知。蒹葭滿地蘆芽短，正是河豚欲上時。
兩兩歸鴻欲破羣，依依還似北歸人。遙知朔漠多風雪，更待江南半月春。

次韻周邠

南遷欲舉力田科，三徑初成樂事多；豈意殘年踏朝市，有如疲馬長陵坡。羨君同甲心方壯，笑我無聊鬢已皤；何日西湖尋舊賞，淡煙疎雨暗漁蓑。

次韻胡完夫

青山別淚向爛斑，十載江湖困抱關；老去上書還北闕，朝來挂笏望西山。相從盃酒形骸外，笑說平生醉夢間；萬事會須咨伯始，白頭容我占清閑。

次韻錢穆父

老入明光踏舊班，染須那復唱陽關；故人飛上金鑾殿，遷客來從飯顆山。大筆推君西漢手，一言置我二劉間；便須置酒呼同舍，看賜飛龍出帝閑。

再次韻答完夫穆父（二公自言先世同在西掖）

掖垣老吏識郎君，並轡天街兩絕塵；汗血固應生有種，夜光那復困無因。豈知西省深嚴地，也著東坡病瘦身；免使謫仙明月下，狂歌對影只三人。

次韻答滿思復

自甘茅屋老三間，豈意彤廷綴兩班；紙落雲煙供醉後，詩成珠玉看朝還。誰言載酒山無賀，記取啼烏巷有顏；但恐跛羊隨赤驥，青雲飛步不容攀。

卷十六 詩八十八首

送戴蒙赴成都玉局觀將老焉

拾遺被酒行歌處，野梅官柳西郊路；聞道華陽版籍中，至今尚有城南杜。我欲歸尋萬里橋，水花風葉暮蕭蕭。

蕭芋魁徑尺誰能盡？
椹木三年已足燒。
百歲風狂定何有？
羨君今作峨眉叟。
縱未家生執戟郎，
也應世出埋輪守。
莫欺老病未歸身，
玉局他年第幾人？
會待子猷清興發，
還須雪夜去尋君。

送陳睦知潭州

華清縹渺浮高棟，
上有纈林藏石甕。
一杯此地初識君，
千巖夜上同飛鞚。
君時年少面如玉，
一飲百觚嫌未痛；
痛白鹿泉頭山月出，
寒光潑眼如流汞。
朝元閣上酒醒時，
臥聽風鑿鳴鐵鳳。
舊遊空在人何處？
二十三年真一夢！
我得生還雪鬢滿，
君亦老嫌金帶重。
有如社燕與秋鴻，
相逢未穩還相送。
洞庭青草渺無際，
天柱紫蓋森欲動。
湖南萬古一長嗟，
付與騷人發嘲弄。

用前韻答西掖諸公見和

雙猊蟠礎龍纏棟，
金井輓轡鳴曉甕。
小殿垂簾白玉鈎，
大宛立仗朱絲鞚。
風馭賓天雲雨隔，
孤臣忍淚肝腸痛。
羨君意氣風生坐，
落筆縱橫盤走汞。
上樽日日寫黃封，
賜茗時時開小鳳。
閉門憐我老太玄，
給札看君賦雲夢。
金奏不知江海眩，
木瓜屢費瑤瓊重。
豈惟蹇步困追攀，
已覺待史疲犇送。
春還宮柳腰支活，
雨入御溝鱗甲動。
借君妙語發春容，
願我風琴不成弄。

次韻王觀正言喜雪

聖人與天過，
有詔寬獄市。
好語夜喧街，
濕雲朝覆砌。
紛然退朝後，
色映宮槐媚。
欲夸鵲刻工，
故上朱藍袂。
我方執筆待，
未敢書上瑞。
君猶伏閣爭，
高論亦少慰。
霏霏止還作，
盎盎風與氣。
神龍久潛伏，
一怒勢必倍。
行當見三白，
拜舞謹萬歲。
歸來飲君家，
酣詠追既醉。

和蔣發運

夜雨翻千偈，
書來又一言。
此身真佛祖，
何處不義軒。
紅穩江吹坐，
樓空月入樽。
遙知思我處，
醉墨在頽垣。

送表弟程六知楚州

炯炯明珠照雙壁，當年三老蘇。程石里人下道避鳩杖，刺史迎門倒烏鳥。我時與子皆兒童，狂走從人覓梨栗；健如黃犢不可恃，隙過白駒那暇惜。醴泉寺古垂橘袖，石頭山高闌松櫟。諸孫相逢萬里外，一笑未解千憂積。子方得郡古山陽，老手風生謝刀筆。我正含毫紫微閣，病眼昏花困書檄。莫教印綬繫餘年，去掃墳墓當有日。功成頭白早歸來，共籍梨花作寒食。

和人假山

上黨攬天碧玉環，絕河千里抱商顏。試觀烟雨三峰外，都在靈仙一掌間。造物何如童子戲，寫真聊發使君閑。何嘗挈取西征去，畫作圍床六曲山。

送王伯敷守虢

華山東麓秦遺民，當時依山來避秦。至今風俗含古意，柔桑綠水招行人。行人掉臂不同首，爭入嶠函土囊口。惟有使君千里來，欲飲三堂無事酒。三堂本來一事無，日長睡起聞投壺。牀頭硯石開雲月，澗底松根斷雪腴。山棚盜散人安寢，勸買耕牛發陳廩。歸來只作水衡卿，我欲攜壺就君飲。

道者院池上作

下馬逢佳客，攜壺傍小池。清風亂荷葉，細雨出魚兒。井好能水齒，茶甘不上眉。歸塗更蕭瑟，真箇解催詩。

次韻子由送千之姪

江上松楠深復深，滿山風雨作龍吟。年來老幹都生菌，下有孫枝欲出林。白髮未成歸隱計，青衫儻有濟時心。閉門試草三千牘，仄席求人少似今。

書文與可墨竹（并敘）

亡友文與可，有四絕詩：一、楚詞二、草書三、畫四、與可嘗云：「世無知我者，惟子瞻一見，識吾妙處。」既沒七年，觀其遺迹，而作是詩。

筆與子皆逝，詩今誰爲新？空遺運斤質，却吊斷絃人！

次韻錢舍人病起

牀下龜寒且耐支，杯中蛇去未應衰。殿門明日逢王傅，擲具爭先看不疑。坐覺香煙攜袖少，獨愁花影上廊遲；何妨一笑千痾散，絕勝倉公飲上池。

次韻和王鞏

謫仙竄夜郎，子美耕東屯。造物豈不惜，要令工語言。王郎年少日，文如餅水翻；爭鋒雖剽甚，聞鼓或驚奔！天欲成就之，使觸羝羊藩。孤光照微陋，耿如月在盆。歸來千首詩，傾寫五石樽；却疑彭澤在，頗覺蘇州煩。君看鄒忌子，廉折配春溫；知音必無人，壞壁掛桐孫。

用王鞏韻送其姪震知蔡州

九門插天開，萬馬先朝屯；舉鞭紅塵中，相見不得言。夜走清虛宿，扣門驚鵲翻；君家汾陽家，永巷車雷奔。夕郎方不夕，列戟以自藩；相逢開月閣，畫簷低金盆。至今夢中語，猶舉燈前樽；阿戎脩玉牒，未憚筆削煩。君歸助獻納，坐繼岑與溫；我客二子間，不復尋諸孫。（子美詩云：「權門多噂囁，且復尋諸孫。」）

號國夫人夜遊圖

佳人自輕玉花驄，翩如驚燕踏飛龍；金鞭淨道寶釵落，何人先入明光宮？宮中羯鼓催花柳，玉奴絃索花奴手；坐中八姨真貴人，走馬來看不動塵。明眸皓齒誰復見，只有丹青餘淚痕；人間俯仰成今古，吳公臺下雷塘路；當時一笑潘麗華，不知門外韓擒虎。

用舊韻送魯元翰知洛州

我在東坡下，躬耕三畝園。君爲尚書郎，坐擁百吏繁。鳴蛙與鼓吹，等是俗物喧。永謝十年舊，老死三家村。惟君縑袍信，到我省羅門。緬懷故人意，欲使薄夫敦。新年對宣室，白首代堯言。相逢問前輩，所見多後昆。道館雖云樂，冷卿當復溫。還持刺史節，却駕朱輪軒。黃髮方用事，白須宜少存。嗣聖真生知，拯民如救燔。初囚羽備魄，盡返湘江魂。坐憂東郡決，老守思王尊。北流桑柘沒，故道塵埃翻。知君一寸心，可敵千步垣。流云自栖止，老幼忘崩奔。得閑閉閣坐，勿使道眼渾。聊乘應捨棧，直泝無生源。歸來成二老，夜榻當重論。

次韻朱光庭初夏

朝罷入人識，鄭崇直聲如在履聲中。臥聞疎響梧桐雨，獨詠微涼殿閣風。諫苑君方續承業，醉鄉我欲訪無功。陶然一枕誰呼覺，牛蟻新除病後聰。

次韻朱光庭喜雨

久苦趙盾日，欣逢傅說霖。坐知千里足，初覺兩河深。破屋常持傘，無薪欲爨琴。清詩似庭燎，雖美未忘箴。

奉敕祭西太一和韓川韻四首

聖主新除祕，侍臣來乞豐。年壽宮神君欲至，半夜靈風肅然。玉璽親題御筆，金童來待天香。禮罷祝融參乘，前驅已過衡湘。解劍獨行殘月，披衣困臥清風。夢蝶猶飛旅枕，粥魚已響枯桐。陂水初含曉綠，稻花半作秋香。早蓋却迎朝日，紅雲正遶宮牆。

西太一見王荆公舊詩偶次其韻二首

秋早川原淨麗，雨餘風日清酣。從此歸耕劍外，何人送我池南。

但有樽中若下，何須墓上征西？聞道為衣巷口，而今烟草萋迷。

次韻子由送陳侗知陝州

誰能如鐵牛，橫身負黃河。滔天不能沒，尺箠未易訶。世俗自無常，徐公故逶迤。別來不可說，事與浮雲多。當時無限人，毀譽南墨阿。虛聲了無實，夜蟲鳴機梭。相逢一笑外，奈此白髮何。天驥皆籬雲，長鳴飽芻禾。王庭旅百寶，大具隨弓戈。君獨一麾去，欲廢五袴歌。甘棠古樂國，白酒金叵羅。知君不久留，治行中新科。過客足嗔喜，東堂記分鵝。此外但坐歎，後生工揣摩。

送賈誦倅眉二首

當年入蜀歎空回，未見峨眉肯再來。童子遙知頌襦袴，使君先已洗樽罍。（李大夫，眉之賢守也。）鹿頭北望應逢鴈，入日東郊尚有梅。（入日出東郊，渡江游墓頭山，眉之故事也。）我老不堪歌樂職，後生試覓子淵才。老翁山下玉淵回，手植青松三萬栽。父老得書知我在，小軒臨水為君開。試看一一龍蛇活，更聽蕭蕭風雨哀！便與甘棠同不斲，蒼髯白甲待歸來。（先君葬於墓頭山之東二十餘里，地名老翁泉，君許為一往，感歎之深，故及。）

送程建用

先生本舌耕，文字浩千頃。空倉付公子，坐待發蒼穎。十年因新說，兒女爭捕影。鑿垣種蒿蕞，嘉穀誰復省。空餘南陔意，太息北堂冷。織屨隨方進，採薪教章逞。辛勤守一經，菽水賢五鼎。今年聞起廢，魯史復光景。公子亦改官，三就繁馬頸。歸來一笑粲，素髮颯垂領。會看金花詔，湯沐奉朝請。天公不吾欺，壽與龜鶴永。

次韻李脩孺留別二首

十年流落敢言歸，魚鳥江湖只自知。豈意青天掃雲霧，盡呼黃髮寄安危。風流吾子真前輩，人物他年記一

時；我欲折繡留此老，縵衣誰作好賢詩？
此生別袖幾回麾，夢裏黃州空自疑；何處青山不堪老，當年明月巧相隨。窮通等是思家意，衰病難堪送客悲；好去江魚煮江水，劍南歸路有姜詩。

次韻黃魯直赤目

誦詩得非子夏學，細史正作丘明書；天公戲人亦薄相，略遣幻醫生明珠。賴君年來屏鮮腴，百千燈光同一如。書成自寫蠅頭表，端就君王覓鏡湖。

和周正孺墜馬傷手

平生學道已神完，豈復兒童私自憐；醉墜何曾傷內守，色憂當爲念先傳。書空漸覺新詩健，把蟹行看樂事全；賣却老驄爲酒直，大呼鄉友作新年。

戲周正孺二絕

折臂三公未可知，會當千鎰訪權奇；勸君嚮酪猶閑事，腸斷聞中楊柳枝。
天廳新頌玉鼻驛，故人共弊亦常情；相如雖老猶能賦，換馬還應繼二生。

題文與可墨竹（并敘）

故人文與可爲道師王執中作墨竹，且謂執中勿使他人書字，待蘇子瞻來，令作詩其側。與可既沒八年，而軾始還朝，見之乃賦一首。

斯人定何人，游戲得自在；詩鳴草聖餘，兼入竹三昧。時時出木石，荒怪軼象外；舉世知珍之，賞會獨余最。知音古難合，奄忽不少待；誰云死生隔，相見如龔隗。

簡推官母李氏挽詞

南浦淒涼老逐臣，東坡還往盡幽人。杯盤慣作陶家客，弦誦常叨孟母隣。尚有升堂他日約，豈知負土一阡新。今年我欲江湖去，莫雨連山宰樹春。

玉堂栽花周正孺有詩次韻

故山桃李半荒榛，粗報君恩便乞身。竹簟暑風招我老，玉堂花蕊爲誰春。纖纖翠蔓詩催發，皎皎霜葩髮鬪新。只有來禽青李帖，他年留與學書人。

杜介送魚

新年已賜黃封酒，舊老仍分頰尾魚。陋巷關門負朝日，小園除雪得春蔬。病妻起斫銀絲鱠，稚子謹尋尺素書。醉眼矍矍覓歸路，松江烟雨晚疎疎。

送杜介歸揚州

再入都門萬事空，閉看清洛漾東風。當年幃幄幾人在，回首觚稜一夢中。採藥會須逢薊子，問禪何處識龐翁。歸來鄰里應迎笑，新長淮南舊桂叢。

秋詠石屏

霏霏點輕素，眇眇開重陰。風花亂紫翠，雪外有烟林。雪近勢方壯，林遠意殊深。會有無事人，支頤識此心。

和黃魯直燒香二首

四句燒香偈子，隨香遍滿東南。不是聞思所及，且令鼻觀先參。萬卷明窗小字，眼花只有爛斑。一炷煙消火冷，半生身老心閑。

再和二首（來詩言飲酒畫竹石草書）

置酒未逢休沐，便同越北燕南。且復歌呼相和，隔牆知是曹參。

丹青已自前世，竹石時窺一斑。五字當還靜節，數行誰似高閑。

武昌西山（并敘）

嘉祐中翰林學士承旨鄧公聖求爲武昌令，常遊寒溪西山，山中人至今能言之。軾請居黃岡，與武昌相望，亦常往來溪山間。元祐元年十一月二十九日，考試館職，與聖求會宿玉堂，偶話舊事，聖求嘗作元次山窅樽銘，刻之巖石，因爲此詩，請聖求同賦，當以遺邑人，使刻之銘側。

春江綠漲蒲萄醅，武昌官柳知誰栽？憶從樊口載春酒，步上西山尋野梅。西山一上十五里，風駕雨掖飛崔嵬；同遊困臥九曲嶺，寒衣獨到吳王臺。中原北望在何許？但見落日低黃埃。歸來解劍亭前路，蒼崖半入雲濤堆。浪翁醉處今尚在，石臼杯飲無樽罍。爾來古意誰復嗣？公有妙語留山隈。至今好事除草棘，常恐野火燒蒼苔。當時相望不可見，玉堂正對金鑿開。豈知白首同夜直，臥看椽燭高花摧。江邊曉夢忽驚斷，銅環玉鎖鳴春雷。山人帳空猿鶴怨，江湖水生鴻雁來。請公作詩寄父老，往和萬壑松風哀。

再用前韻

朱顏發過如春醅，胸中梨棗初未栽；丹砂未易掃白髮，赤松却欲參黃梅。寒溪本自遠公社，白蓮翠竹依崔嵬；當時石泉照金像，神光夜發如五臺。飲泉鑿面得真意，坐視萬物皆浮埃。欲收暮景返田里，遠沂江水窮離堆。還朝豈獨羞老病，自歎才盡傾空罍。諸公梁渠若夏屋，吞吐風月清隅隈。我如廢井久不食，古鑿缺落生陰苔。數詩往復相感發，汲新除舊寒光開。遙知二月春江闊，雲浪倒卷雲峰摧。石中無聲水亦靜，云何解轉空山雷？欲就諸公評此語，要識憂喜何從來。願求南宗一勺水，往與屈賈瀦餘哀。（韋應物詩云：「水性本云靜，石中固無聲，如何兩相激？」雷轉空山驚。）

送楊孟容

我家峨眉陰，與子同一邦；相望六十里，共飲玻璃江。江山不違人，遍滿千家窗；但苦窗中人，寸心不自降。子歸治小國，洪鐘噓微撞；我留侍玉坐，弱步敬豐扛。後生多高才，名與黃童雙；不肯入州府，故人餘老龐。慙勤與問訊，愛惜霜眉厖；何以待我歸，寒醅發春缸。

見子由與孔常父唱和詩，輒次其韻。余昔在館中，同舍出入輒相聚飲酒賦詩，近歲不復講，故終篇及之。庶幾諸公稍復其舊，亦太平盛事也。

君先魯東家，門戶照千古。文章固應爾，須鬣餘似虞。雖非蒙伊狀，尙有歷國苦。誦書口瀾翻，布穀雜杜宇。十年困奔走，櫛沐飽風雨。吾道其非耶？野處豈兕虎。瀾陵閑老將，柏直口尙乳。自君兄弟還，鼎立知有補。蓬山耆舊散，故事誰刪去？來迎馮朔傅，出餞會稽組。吾猶及前輩，詩酒戒冊府。願君唱此風，揚鱗斯杜舉。

趙令晏崔白大圖幅徑二丈

扶桑大鬣如瓊蓋，天女織綃雲漢上。往來不遺鳳喙梭，誰能鼓臂投三丈？丈人間刀尺不敢裁，丹青付與濠梁崔；風蒲半折寒鴈起，竹間的皪橫江梅。畫堂粉壁翻雲幕，十里江天無處着。好臥元龍百尺樓，笑看江水拍天流。

次韻張昌言給事省宿

馮顛久已歎殘雪，戎眼何曾眩落暉。朔野按行猶雀躍，東臺瞑坐覺烏飛。（道家有烏飛入兔宮之說。）漫誇年少容吾在，（樂天詩云：「猶有誇張少年處，笑呼張丈喚殷兄。」）若闢樽前舉世稀。待向崧陽求水竹，一犂煙雨伴公歸。

和二舍人省上（三月二十九日作，明日駕幸景靈宮）

紛紛榮瘁何能久，雲雨從來翻覆手。况如一夢墮枕中，却見三賢起江右。（曾子開、劉貢父、孔經父皆江西人。）嗟君妙質皆瑚璉，願我虛名但箕斗。明朝冠蓋蔚相望，共展翠輦朝宣光。武皇已老白雲鄉，正與羣帝驂龍

翔，獨留杞梓扶明堂。

送錢承制赴廣南路分都監

當年我作表忠碑，坐覺江山氣未衰。舞鳳尙從天目下，收駒時有渥洼姿。據床到處堪吹笛，橫槊何人解賦詩？知是丹霞破佛手，先聲應已懾羣夷。（廣西僧寺頃有佛動之異，錢君碎而投之江中。）

次韻曾子開從駕二一首

街槐綠闌雨初勻，瑞霧香風滿後塵。清廟幸同觀濟濟，豐年喜復接陳陳。雍容已鑿天庖賜，俯伏初嘗貢茗新。輦路歸來聞好語，共驚堯顙類高辛。

入仗魂驚愧草萊，一聲清蹕九門開。暉暉日傍金輿轉，習習風從玉宇來。流落生還真一芥，周章危立近三槐。（學士班近執政。）道傍儻有山中舊，問我收身早晚回。

再和

眼花錯莫鬢霜勻，病馬羸驢只自塵。奉引拾遺叨侍從，思歸少傅羨朱陳。衰年壯觀空驚目，嶮韻清詩苦鬪新。最後數篇君莫厭，擣殘椒桂有餘辛。

憶觀滄海過東萊，日照三山迤麗開。挂觀飛樓凌霧起，仙幢寶蓋拂天來。不聞宮漏催晨箭，但覺簷陰轉古槐。供奉清班非老處，會稽何日乞方回。（時方開會稽守。）

次韻劉貢父省上

密雲今日破郊西，疎雨脩脩未作泥。要及清閑同笑語，行看衰病費扶攜。花前白酒傾雲液，戶外青鸞響月題。不用臨風苦揮淚，君家自與作林齊。（貢父詩中有「不及與其兄原父同時」之歎。然其兄子仲馮今爲起居舍人。）

再和

當年曹守我膠西，共厭鋪糟與汨泥；自古赤丸成習俗，因公黃犢免提攜。生還各有青山興，病起猶能小字題；黃怪歌呼數相和，曾將獄市寄全齊。（貢父爲曹州盜賊皆奔秦境，蓋嘗有詩云：「從來晉盜稍奔秦。」）

送顧子敦奉使河朔

我友顧子敦，軀膽兩俊偉；便便十圍腹，不但貯書史。容君數百人，一笑萬事已；十年臥江海，了不見愠喜。磨刀向豬羊，醜酒會鄰里；歸來如一夢，豐頰愈茂美。平生批敕手，濃墨寫黃紙；會當勒燕然，廊廟登劍履。翻然向河朔，坐念東郡水；河來屹不去，如尊乃勇耳。

次韻子由送家退翁知懷安軍

吾州同年友，粲若琴上星；當時功名意，豈止拾紫青。事旣喜違願，天或不假齡；今如圖中鶴，俛仰在一庭。（吾州同年友十三人，今存者六人而已，故有琴上星圖中鶴之語。）西南王春早，廢沼黏枯萍；翩然一麾去，想見靈雨零。我無謫仙句，待詔沉香亭；空騎內廐馬，天仗隨雲駢。竟無絲毫補，眷焉誰汝令；永愧舊山叟，憑君寄丁寧。

諸公餞子敦，賦以病不往，復次前韻

君爲江南英，面作河朔偉；人間一好漢，誰似張長史。上書苦留君，言拙輒報已；置之勿復道，出處俱可喜。攀與共六尺，食肉飛萬里；誰言遠近殊，等是朝廷美。遙知送別處，醉墨爭淋紙；我以病杜門，商頌空振屐。後會知何日，一歡如覆水；善保千金軀，前言戲之耳。

和張昌言喜雨

二聖夢懃忘寢食，百神奔走會風雲；禁林夜直鳴江瀨，清洛朝回起縠紋。夢覺酒醒聞好句，帳空簾冷發餘薰；秋來定有豐年喜，剩作新詩準備君。

次韻劉貢父西省種竹

要知西掖承平事，記取劉郎種竹初。舊德終呼名字外，後生誰續笑談餘。（昔李公擇種竹館中，戲語同舍「後人指此竹必云李文正手植」貢父笑曰「文正不獨擊筆，亦知種竹耶」時有筆工李文正）成陰障日行當見，取筍供庖計已疎。白首林間望天上，平安時報故人書。（李衛公北都童子寺竹寺僧日報平安）

偶與客飲，孔常父見訪，方設席延請，忽上馬馳去已，而有詩戲用其前韻答之。揚雄他文不皆奇，獨稱觀餅居井眉。酒客法士兩小兒，陳遵張竦曾何知！主人有酒君獨辭，蟹螯何不左手持。豈復見吾橫氣機，遣人追君絕馳。盡力去花君自癡，醍醐與酒同一卮。請君更問文殊師。

次韻子由書李伯時所藏韓幹馬

潭潭古屋雲幕垂，省中文書如亂絲。忽見伯時畫天馬，朔風胡沙生落錐。天馬西來從西極，勢與落日爭分馳；龍靡豹股頭入尺，奮迅不受人間羈。元狩虎脊聊可友，開元玉花何足奇。伯時有道真吏隱，飲啄不羨山梁。丹青弄筆聊爾耳，意在萬里誰知之。幹惟畫肉不畫骨，而况失實空餘皮。煩君巧說腹中事，妙語欲遣黃泉知。君不見韓生自言無所學，廐馬萬匹皆吾師。

次韻劉貢父獨直省中

明窗畏日曉先曠，高柳鳴蜩午更喧。筆老新詩疑有物，心空客疾本無根。隔牆我亦眠風榻，上馬君先瑣月軒；共喜早歸三伏近，解衣盤礴亦君恩。

軾以去歲春夏侍立邇英，而秋冬之交，子由相繼入侍，次韻絕句四首，各述所懷。

瞳瞳日脚曉猶清，細細槐花暖自零。坐閱諸公半廊廟，時看黃色起天庭。（僕射呂公，門下韓公，左丞劉公，

蘇東坡東坡集 卷十六

一三八

皆有講席大用。

上尊初破早朝寒，茗盃仍沾講舌乾；陸楯諸郎空雨立，故應慙悔不儒冠。
兩鶴摧頹病不言，年來相繼亦乘軒；悞聞九奏聊飛舞，可得裴回爲啄吞。

微生偶脫風波地，晚歲猶存鐵石心；定似香山老居士，世緣終淺道根深。
（樂天自江州司馬除忠州刺史，旋以主客郎中知制誥，遂拜中書舍人，軾雖不敢自比，然謫居黃州，起知文登，召爲儀曹，遂忝侍從，出處老少，大略相似。庶幾復享此翁晚節閑適之樂焉。）

送宋朝散知彭州迎侍二親

東來誰迎使君車，知是丈人屋上烏；丈人今年二毛初，登樓上馬不用扶。
使君負弩爲前驅，蜀人不復談相如；老幼化服一事無，有鞭不施安用蒲。
春波如天漲平湖，鞵紅照坐香生膚；綦鞵上壽白玉壺，公堂登歌鳳將雛。
諸孫權笑爭挽須，蜀人畫作西湖圖。

郭熙畫秋山平遠（路公爲跋尾）

玉堂畫掩春日閑，中有郭熙畫春山；鳴鳩乳燕初睡起，白波青嶂非人間。
離離短幅開平遠，漠漠疎林寄秋晚；恰似江南送客時，中流回頭望雲巘。
伊川佚老鬢如霜，臥看秋山思洛陽；爲君紙尾作行草，炯如嵩洛浮秋光。
我從公遊如一日，不覺青山映黃髮；爲畫龍門入節灘，待向伊川買泉石。

次韻張昌言喜雨

千里黃流失故居，年來赤地到青徐；遙聞爭誦十行語，無異親巡六尺輿。
精貫天人一言足，雲興嶽瀆萬靈趨；愛君誰似元和老，賀雨詩成卽諫書。

書晁補之所藏與可畫竹二首

與可畫竹時，見竹不見人，豈獨不見人，嗒然遺其身。其身與竹化，無窮出清新。莊周世無有，誰知此疑神？若人今已無，此竹寧復有？那將春蚓筆，畫作風中柳。君看斷崖上，瘦節蛟蛇走。何時此霜竿，復入江湖手？晁子拙生事，舉家聞食粥。朝來又絕倒，諛墓得霜竹。可憐先生擊朝日照首，荷吾詩固云爾，可使食無肉。吾舊詩云：「可使食無肉，不可居無竹。」

戲用晁補之韻

昔我嘗陪醉翁醉，今君但吟詩老詩。清詩咀嚼那得飲，瘦竹瀟灑令人飢。試問鳳凰飢食竹，何如騫馬肥首着；知君忍飢空誦詩，口頰瀾翻如布穀。

書皇親畫扇

十年江海寄浮沈，夢遶江南黃葉林。誰謂風流貴公子，筆端還有五湖心。

書李世南所畫秋景

野木參差落漲痕，疎林欹倒出霜根。扁舟一棹歸何處？家在江南黃葉村。人間斤斧日創夷，誰見龍蛇百尺姿？不是溪山曾獨往，何人解作掛猿枝。

書鄜陵王主簿所畫折枝二首

論畫以形似，見與兒童鄰。賦詩必此詩，定非知詩人。詩畫本一律，天工與清新。邊鸞雀寫生，趙昌花傳神。何如此兩幅，疎澹含精勻。誰言一點紅，解寄無邊春。

瘦竹如幽人，幽花如處女。低昂枝上雀，搖蕩花間雨。雙翎決將起，衆葉紛自舉。可憐採花蜂，清蜜寄兩股。若入富天巧，春色入毫楮。懸知君能詩，寄聲求妙語。

昨見韓丞相言王定國今日玉堂獨坐有懷其人

書臥玉堂上，微風舉輕紈；銅餅下碧井，百尺鳴飛瀾。俛仰清夢餘，受此一掬寒；似予平生友，苦語涼肺肝。秀眉玉兩頰，矯矯如翔鸞；置之江淮交，清詩洗江湍。紅鱗對白酒，信美非所安！丞相功業成，還家酒盃寬。人間有此客，折簡呼不難；相將扣東閣，起舞盡餘歡。

和張耒高麗松扇

可憐堂堂十八公，老死不入明光宮；萬牛不來難自獻，裁作團團手中扇。屈身蒙垢君一洗，挂名君家詩集裏；猶勝漢宮悲婕妤，網蟲不見乘鸞子。

故李承之待制六丈挽詞

青青一寸松，中有梁棟姿；天驥墮地走，萬里端可期。世無阿房宮，可建五丈旗；又無穆天子，西征燕瑤池。材大古難用，老死亦其宜；丈夫恐不免，豈患莫已知？公如松與驥，少小稱偉奇；俯仰自廊廟，笑談無羌夷。清朝竟不用，白首仍憂時；願斬橫行將，請烹乾沒兒。言雖不見省，坐折姦雄窺；嗟我去公久，江湖生白髭。歸來耆舊盡，零落存者誰？比公穉中散，龍性不可羈；疑公李北海，慷慨多雄詞；淒涼五君詠，沉痛八哀詩。邪正久乃明，人今屬公思；九原不可傳，千古有餘怨！

次韻孔常父送張天覺河東提刑

送君應典鸞鷟裘，憑仗千鍾洗別愁；脫帽風流餘長史，（君喜草書而不工，故以此爲戲。）埋輪家世本留侯。（張綱子房七世孫也，捷爲武陽人，墓在今彭山，君豈其後耶？）子河駿馬方爭出，（麟府馬出子河，泌昭義疲兵亦少休。）唐稱昭義步兵，蓋澤潞弓箭手。定向秋山得嘉句，故關黃葉滿行轡。

送張天覺得山字

西登太行嶺，北望清涼山；晴空浮五髻，曉藹鄉口間。餘光入巖石，神草出茅管；何人相指似，稍稍落人寰。能

念墜指兒，虬鬚苗冰顏；祝君如此草，爲民已痛癢。我亦老且病，眼花腰脚頑；念當勤致此，莫作河東慳！

次韻王定國揚州倅

此身江海寄天遊，一落紅塵不易收；未許相如還蜀道，空教何遜在揚州。又驚白酒催黃菊，尙喜朱顏映黑頭；火急著書千古事，虞卿應未厭窮愁。

卷十七 詩八十八首

贈李道士（并敘）

駕部員外郎李君宗固，景祐中良吏也。守漢州，有道士尹可元，精練善畫，以遺火得罪當死。君緩其獄，令赦獲免，時可元年八十一，自誓且死，必爲李氏子以報。可元既死，二十餘年，而君子世昌之婦夢可元入其室，生子曰得柔，小名蜀孫，幼而善畫，既長，讀莊老，喜之，遂爲道士，賜號妙應，事母以孝，謹聞。其寫真蓋妙絕一時云。

世人只數曹將軍，誰知虎頭非癡人；腰間大羽何足道，頰上三毛自有神。平生狎侮諸公子，戲著幼輿巖石裏；故教世世作黃冠，布襪青鞋弄雲水。千年鼻祖守關門，一念還爲李耳孫。香火舊緣何日盡，丹青餘習至今存。五十之年初過二，衰顏記我今如此；他時要指集賢人，知是香山老居士。

次韻張舜民自御史出倅虢州留別

玉堂給札氣如雲，初喜湘纍復佩銀；樊口淒涼已陳迹，（昔與張同游武昌樊口，來詩中及之。）班心突兀見長身。（臺吏謂御史立處爲班心。）江湖前日真成夢，鄠杜他年恐卜鄰；此去若容陪坐嘯，故應客主盡詩人。

次韻米黻二一王書跋尾二首

三館曝書防蠹毀，得見來禽與青李；秋蚺春蚓久相雜，野鷺家雞定誰美？玉函金籀天上來，紫衣敕使親臨啓；紛紛過眼未易識，磊落挂壁空雲委。歸來妙意獨追求，坐想蓬山二十秋；怪君何處得此本，上有桓玄寒具油。巧偷豪奪古來有，一笑誰似癡虎頭？君不見長安永寧里，王家破垣誰復修？元章作書日千紙，平生自苦誰與美？畫地爲餅未必似，要令癡兒出饒水。錦囊玉軸來無趾，粲然奪真疑聖智，忍飢看書淚如洗，至今魯公餘乞米。

次韻宋肇惠澄心紙二首

詩老囊空一不留，百番曾作百金收；（永叔以澄心百幅遺聖俞，聖俞有詩。）知君也厭雕肝腎，分我江南數斛愁。

君家學陋相如，宜與諸儒論石渠；古紙無多更分我，自應給札奏新書。

郭熙秋山平遠二首

目盡孤鴻落照邊，遙知風雨不同川；此間有句無人見，送與襄陽孟浩然。木落騷人已怨秋，不堪平遠發詩愁；要看萬壑爭流處，他日終煩顧虎頭。

送歐陽辯監潭州酒

汗血駕鼓車，何從致千里紛紛糟麴間，欲試賢公子。君家江南英，濯足滄浪水；竭渡舊黃河，漲沙埋馬耳。由來付造物，倚伏何窮已；當念楚子文，三仕無愠喜。

九月十五日，邇英講論語終篇，賜執政講讀史官燕于東宮，又遣中使就賜御

書詩各一首，臣軾得紫薇花絕句，其詞云：「絲綸閣下文書靜，鐘鼓樓中刻漏長。獨坐黃昏誰是伴，紫薇花對紫薇郎。」翌日各以表謝，又進詩一篇，臣軾詩

繡裳畫袞雲垂地，不作成王翦桐戲；日高黃纒下西清，風動槐龍舞交翠。（邇英閣前有雙槐，樛枝屬地如龍形。）壁中蠹簡今千年，漆書蝌蚪光射天；諸儒不復憂吻燥，東宮賜酒如流泉。酒酣復拜千金賜，一紙驚鸞回鳳字；蒼顏白髮使生光，袖有驪珠三十四。（臣所賜詩，并題目及臣姓名，凡三十四字。）歸來車馬已喧闐，爭看銀鈎墨色鮮。人間一日傳萬口，喜見雲章第一篇。（上前此未嘗以御書賜羣臣。）玉堂畫掩文書靜，鈴索不搖鐘漏永；莫言弄筆數行書，須信時平由主聖。犬羊散盡沙漠空，捷烽夜到甘泉宮；似聞指麾築上郡，已覺談笑無西戎。（時熙河新獲鬼章，是日涇原復奏夏賊數十萬人皆遁去。）文思天子師文母，終閉玉關辭馬武；小臣願對紫薇花，試草尺書招贊普。（謹按唐制翰林學士帶知制誥，許綴中書舍人班。今臣以知制誥待罪禁林，故得以紫薇爲故事。）

和王晉卿（并敘）

駙馬都尉王誥晉卿功臣全彬之後也。元豐二年，予得罪貶黃岡，而晉卿亦坐累遠謫，不相聞者七年。予既召用，晉卿亦還朝，相見殿門外，感歎之餘，作詩相屬，託物悲慨，詭窮而不怨，泰而不驕，佳其貴公子有志如此，故次其韻。

先生飲東坡，獨舞無所屬；當時挹明月，對影三人足。醉眠草棘間，蟲虺莫子毒；醒來送歸鴈，一寄千里目。悵爲懷公子，旅食久不玉；欲書如餐字，遠託西飛鶴。謂言相濡沫，未足救溝瀆；吾生如寄耳，何者爲禍福？不如兩相忘，昨夢那可逐；上書得自便，歸老湖山曲。躬耕二頃田，自種十年木；豈知垂老眼，却對金蓮燭。公子亦生還，仍分刺史竹；賢愚有定分，尊俎守尸祝。文章何足云，執技等醫卜；朝廷方西顧，羌虜驕未伏。遙知重陽酒，白羽落黃菊；羨君真將家，浮面氣可掬。（袁天綱語竇軌：「君語則赤氣浮面，爲將勿多殺人。」）何當請長纓，一戰河湟復。

謝王澤州寄長松兼簡張天覺二首

莫道長松浪得名，能教覆額兩眉青；
便將徑寸同千尺，知有奇功似伏苓。

憑君說與埋輪使，速寄長松作解嘲；
（送張天覺詩有「埋輪及河東陘」之語。）無復青黏和漆葉，枉將
鍾乳敵仙茅。

次韻劉貢父所和韓康公憶持國二首

夢覺真同鹿覆蕉，相君脫屣自參寥；
顏紅底事髮先白，室邇何妨人自遙。
狂似次公應未怪，醉推東閣不須
招；
援毫欲作衣冠表，盛事終當繼入蕭；
（唐蕭氏有瑀，及造入宰相。）

閉戶端居念獨深，小軒朱檻憶同臨；
燎須誰識英公意，（英公爲其姊作粥燎須，曰：「吾與姊皆老矣，能幾
進粥？」）黃髮聊知子建心；
（子建與楚王彪別詩云：「王其愛玉體，共享黃髮期。」）已託西風傳絕唱，且邀
明月伴孤斟；
他年內集應呼我，下客先判（平）醉墮簪。

次韻劉貢父叔姪屬駕

玉堂孤坐不勝清，長羨枚鄒接長卿；
只許隔牆聞置酒，時因議事得聯名；
機雲似我多遺俗，廣受如君不治
生；
共託屬車塵土後，鈞天一餉夢中榮。

次韻韓康公置酒見留

庭下黃花一醉同，重來雪燼已穹窿；
不應屢費譏安石，但使毋多酌次公；
鍾乳金釵人似玉，鴟絃鐵撥坐生
風；
少卿尚有車茵在，頗覺寬容勝弱翁。

次韻王都尉偶得耳疾

君知六鑿皆爲贅，我有一言能決疣；
病客巧聞牀下蟻，癡人強覩棘端猴；
聰明不在根塵裏，藥餌空爲婢僕

憂；但試周郎看，否曲音小誤已回頭。

送喬全寄賀君六首（并敘）

舊聞靖長官，賀水部，皆唐末五代人，得道不死。章聖皇帝東封，有謁於道左者，其謁云：「晉水部員外郎賀元。」再拜而去。上不知也。已而閱謁，見之大驚。物色求之，不可得。天聖初，又使其弟子喻澄者詣闕，進佛道像，直數千萬。張公安道與澄遊，具得其事。又有喬全者，少得大風疾，幾死，賀使學道，今年八十益壯。盛人無復見賀者，而全數見之。元祐二年十二月，全來京師，十許日，予留之，不可。曰：「賀以上元期我於蒙山。」又曰：「吾師嘗遊密州，識君於常山道上，意若喜君者。」作是詩以送之，且作五絕句以寄賀。

君年二十美且都，初得惡疾墮眉須。紅顏白髮驚妻孥，覽鏡自嫌欲棄軀。結茅窮山啖松腴，路逢逃秦博士盧。方瞳照野清而臞，再拜未起煩一呼。覺知此身了非吾，炯然蓮花出泥塗。隨師東遊渡濰邦，（濰邦密州二水名。）山頭見我兩輪朱。豈知仙人混屠沽，爾來八十胸垂胡。上山如飛瞋人扶，東歸有約不敢渝。新年當參耆仙儒，秋風西來下雙鳧。得棗如瓜分我無？

生長兵間早脫身，晚爲元祐太平人。不驚渤海桑田變，來看龜蒙漏澤春。

曾謁東封玉輅塵，幅巾短褐亦逡巡。行宮夜奏空名姓，悵望雲霞縹渺人。

垂老區區豈爲身，微言一發重千鈞。始知不見高皇帝，正是商山四老人。

舊聞父老晉郎官，已作飛騰變化看。聞道東蒙有居處，願供薪水看燒丹。

千古風流賀季真，最憐嗜酒謫仙人。狂吟醉舞知無益，粟飯藜羹問養神。

送家安國教授歸成都

別君二十載，坐失兩鬢青。吾道雖艱難，斯文終典刑。屢作退飛鷁，羞看乾死螢。一落戎馬間，五見霜葉零。夜

談空說劍，春夢猶橫經；新科復舊貫，童子方乞靈。須煩凌雲手，去作入蜀星。蒼苔高殿室，古柏文翁庭。初聞編簡香，始覺鋒鏑腥。岷峨有雛鳳，梧竹養脩翎。嗚呼應懈律，飛舞集虞廷。吾儕便歸老，亦足慰餘齡。

和子由除夜元日省宿致齋二首

江淮流落豈關天？禁省相望亦偶然。等是新年未相見，此身應坐不歸田。白髮蒼顏五十三，家人強遣試春衫。朝回兩袖天香滿，頭上銀幡笑阿咸。當年踏月走東風，坐看春闈鎖醉翁。白髮門生幾人在，却將新句調兒童。

次韻答張天覺二首

車輕馬穩轡御堅，但有蚊蟲喜撲緣。截斷口前君莫怪，人間差樂勝巢仙。馭風騎氣我何勞，且要長松作土毛。亦如訶佛丹霞老，却向清涼禮白毫。

次韻黃魯直畫馬試院中作

少年鞍馬勤遠行，臥聞蕭蕭草風雨。聲見此忽思短策橫，十年髀肉磨欲透。那更陪君作詩瘦，不如扈魅歸飯豆。門前欲嘶御史廳，詔恩三日休老翁。羨君懷中雙橘紅，（黃有老母。）

余與李薦方叔相知久矣，領貢舉事而李不得第，愧甚，作詩送之。

與君相從非一日，筆勢翩翩疑可識。平時謾說古戰場，過眼終迷日五色。我慙不出君大笑，行止皆天子何貴。青袍白紵五千人，知子無怨亦無德。買羊沽酒謝玉川，爲我醉倒春風前。歸家但草凌雲賦，我相夫子非癡仙。

和王晉卿送梅花（次韻）

東坡先生未歸時，自種來禽與青李。五年不踏江頭路，夢逐東風泛蘋芷。江梅山杏爲誰容，獨笑依依臨野水。此間風物君未識，荒浪翻天雪相激。明年我復在江湖，知君對花三嘆息。

和宋肇遊西池次韻

漢皇蒸餼不開邊，尚教千艘下瀨舡。貪看鸞釵飛鬪艦，不知鼉鼓舞鈞天。故山西望三千里，往事回思二十年。自笑區區足官府，不如公子散神仙。

書艾宜畫四首

竹鶴

此君何處不相宜，况有能言老令威。誰識長身古君子，猶將縵布綠深衣。

黃精鹿

太華西南第幾峰，落花流水自重重。幽人只採黃精去，不見春山鹿養茸。

杏花白鵲

天工篆刻為誰妍？袍藥游蜂自作團。把酒惜春都是夢，不如閑客此閑看。

蓮龜

半脫蓮房露壓欹，綠荷深處有游龜。只應翡翠蘭苔上，獨見玄夫曝日時。

僕領貢舉未出錢穆父雪中作詩見及三月二十日同游金明池始見其詩次

韻為答

雪知我出已全消，花待君來未敢飄。行避門生時小飲，忽逢騎吏有嘉招。魚龍絕技來千里，斑白遺民數四朝。知有黃公酒壚在，蒼顏華髮自相遙。

次韻子由五月一日同轉對

跪奉新書笏在腰，談王正欲伴耕樵。晉陽豈為一門事？（唐高祖謂溫大推兄弟云：「我起義晉陽，止為卿

一門耳。」宣政聊同五月朝。〔正元中詔曰：「自今後五月一日御宣政殿，與文武百僚相見。」〕憂患半生聯出處，歸休上策早招要；後生可畏吾衰矣，刀筆從來錯料堯。

韓康公挽詞二首

故國非喬木，興王有世臣。嗟子後死者，猶及老成人。德業經文武，風流表縉紳；空餘行樂地，處處泣遺民。再世忠清德，三朝翼贊勳。功成不歸國，就訪敢忘君。舊學嚴詩律，餘威靖塞氛。何當繼韓弈，故吏總能文。西第開東閣，初筵點後塵。笙歌邀白髮，燈火樂青春。扶路三更罷，回頭一夢新。賦詩猶墨濕，把卷獨沾巾。

柏石圖詩（并敘）

陳公弼家藏柏石圖，其子慥李常傳寶之，東坡居士作詩以爲之銘。

柏生兩石間，天命本如此。雖云生之艱，與石相終始。韓子俯仰人，但愛平地美；土膏雜糞壤，成壤幾何耳？君看比槎牙，豈有可移理？蒼龍轉玉骨，黑虎抱金柅。畫師亦可人，使我毛髮起。當年落筆意，正欲譏韓子。

慶源宣義王丈以累舉得官爲洪雅主簿雅州戶掾遇吏民如家人人安樂之既謝事居眉之青神瑞草橋故懷自得有書來求紅帶旣以遺之且作詩爲戲請黃魯直學士秦少游賢良各爲賦一首爲老人光華

青衫半作霜葉枯，遇民如兒吏如奴；吏民莫作官長看，我是識字耕田夫。妻啼兒號刺史怒，時有野人來挽須；拂衣自注下下考，芋魁飯豆吾豈無。歸來瑞草橋邊路，獨游還佩平生壺。慈母巖前自喚渡，青衣江上人爭扶。今年蠶市數州集，中有遺民懷袴襦；邑中之黔相指似，白髯紅帶老不癯。我欲西歸卜鄰舍，隔牆拊掌容歌呼；不學山王乘駟馬，回頭空指黃公壚。

次許冲元韻送成都高士敦鈐轄

移中老監本虛名，懶作燕山萬里行。
（余與高君奉使，契丹辭免不行。）
坐看飛鴻迎使節，歸來駿馬換傾城。
高才本不緣動閩，餘力還思治蜀兵。
西望雪山烽火盡，不妨樽酒寄平生。

次前韻送程六表弟

君家兄弟真連璧，門下朱輪家萬石。
竹使猶分刺史符，尙方行賜尙書鳥。
前年持節發倉庫，到處費刀收粟。
歸來閉口不論功，却是渡江誰復惜？
君才不用如澗松，我老得全猶社櫟。
青衫莫厭百僚底，白首上有千薪積。
憶昔江湖一釣舟，無數雲山供點筆。
未應便障西風扇，只恐先移北山檄。
憑君寄謝江南叟，念我空見長安日。
浮江泝蜀有成言，江水在此吾不食。

和王晉卿題李伯時畫馬

督郵有良馬，不爲君所奇。
願收紙上影，駿骨何由歸？
一朝見營策，蟻封驚肉飛。
豈惟馬不遇，人已半生癡。

送錢穆父出守越州絕句二首

簿書常苦百憂集，樽酒今應一笑開。
京兆從教思廣漢，會稽聊喜得方回。
若耶溪水雲門寺，賀監荷花空自開。
我恨今猶在泥滓，勸君莫棹酒舡回。

戲書李伯時畫御馬好頭赤

山西戰馬飢無肉，夜嚼長槽如嚼竹。
蹏間三丈是徐行，不信天名有坑谷。
豈如廐馬好頭赤，立仗歸來臥斜日。
莫教優孟卜葬地，厚衣薪爇入銅歷。

送程七表弟知泗州

江湖不在眼，塵土坐滿顏。
繫舟清洛尾，初見淮南山。
淮山相媚好，曉鏡開煙鬟。
持此娛使君，一笑簿領間。
使君如天馬，朝燕莫荆蠻。
時無王良手，空老十二閑。
聊當出毫末，化服狡與頑。
勿謂無人知，古佛臨濤灣。
赤子視萬

類，流萍聞人竇；但使可此人，餘事真茆菅。

送曹輔赴閩漕

曹子本儒俠，筆勢翻濤瀾。往來戎馬間，邊風裂儒冠。詩成橫槊裏，楮墨何曾乾？一旦事遠遊，紅塵隔巖灘。平生羊炙口，並海搜鹹酸。一從荔枝飲，豈念首蓓榮？我亦江海人，市朝非所安。常恐青霞志，坐隨白髮闌。淵明賦歸去，談笑便解官。今我何爲者？索身良獨難！憑君問清淮，秋水今幾竿？我舟何時發，霜露日已寒。

次韻王郎子立風雨有感

百年一俯仰，寒暑相主客。稍增淩昌氣，已覺團扇厄。不須計榮辱，此喪彼有獲；我琴終不敗，無搜故無釋。後生不自牧，呻吟空挾策。擷苗不待長，賣菜苦求益。此郎獨靜退，門外無行迹。但恐陶淵明，每爲飢所迫。淒風弄衣結，小雪穿門席。願君付一笑，造物亦戲劇。朝來賦雲夢，筆落風雨疾。爲君裁春衫，高會開桂籍。

次韻黃魯直嘲小德小德魯直子其母微故其詩云一解著潛夫論不妨無外家一

進饌客爭起，小兒那可涯？莫欺東方星，三五自橫斜。名駒已汗血，老蚌空泥沙。但使伯仁長，還與絡秀家。

書林次中所得李伯時歸去來陽關一圖後二首

不見何戡唱渭城，舊人空數米嘉榮。龍眠獨識慙處，畫出陽關意外聲。

兩本新圖寶墨香，樽前獨唱小秦王。爲君翻作歸來引，不學陽關空斷腸。

送蹇道士歸廬山

物之有知蓋恃息，孰居無事使出入；心無天遊室不空，六鑿相攘婦爭席。法師逃入廬山，山中無人自往還；還往者一空還者失，此身正在無還間。縣縣不絕微風裏，內外丹成一彈指。人間俯仰三千秋，騎鶴歸來與子游。

臥病逾月請郡不許復直玉堂十一月一日鑾院是日苦寒詔賜官燭法酒書
呈同院

微霰疎疎點玉堂，詞頭夜下攬衣忙；分光御燭星辰爛，拜賜官壺雨露香。醉眼有花書字大，老人無睡漏聲長；何時却逐桑榆暖，社酒寒燈樂未央。

送周朝議守漢州

茶爲西南病，氓俗記二李（杞與稷也）；何人折其鋒，矯矯六君子（思道與姪正孺張永徽吳醇翁呂元鈞宋文輔也）；君家尤出力，流落初坐此；謂當收桑榆，華髮看劍履；胡爲犯風雪，歲晚行未已；念歸誠得計，願自爲謀耳。吾聞江漢間，瘡痍有未起，莫輕驅遂老，君王付尺箠，召還當有詔，挽袖謝鄰里，猶堪作水衡，供張園林美。

木山（井敬）

吾先君子嘗著木山三峰，且爲之記與詩，詩人梅二丈聖俞，見而賦之。今三十年矣，而猶子千乘，又得五峰，益奇，因次聖俞韻，使并刻之其側。

聖俞詩

空山枯楠大蔽牛，霹靂夜落魚鳧洲；魚鳧水射幾千秋，蠹肌爛隨沙蕩流。惟存堅骨蛟龍瘦，形侔三山中雄首首；左右兩峰相挾翼，尊奉君長無慢尤。蘇夫子見之驚且喜，買於谿叟憑貂裘；因嗟大不爲梁棟，又歎殘不爲薪爇。雨侵蘚澀得石瘦，宜與夫子歸隱丘。

次韻

木生不願回萬牛，願終天年仆沙洲；時來幸逢河伯秋，掀然見怪推不流。蓬婆雪領巧雕謾，蟄蟲行蟻爲豪首；阿咸大膽忽持去，河伯好事不汝尤。城中古沼浸坤軸，一林瘦竹吾菴裘；二頃良田不難買，三年橙木行可櫛。

會將白髮對蒼蠟，魯人不厭東家丘。

送千乘千能兩姪還鄉

治生不求富，讀書不求官。譬如飲不醉，陶然有餘歡。君看龐德公，白首終泥蟠。豈無子孫念？願獨遺以安。鹿門上冢回，牀下拜龍鸞。躬耕竟不起，耆舊節獨完。念汝少多難，冰雪落綺紈。五子如一人，奉養真色難。烹雞獨餽母，自饗苜蓿槃。口腹恐累人，寧我食無肝。西來四千里，敝袍不言寒。秀眉似我兄，亦復心閑寬。忽然捨我去，歲晚留餘酸。我豈軒冕人，青雲意先闌。汝歸蒔松菊，環以青琅玕。禮陰三年成，可以挂我冠。清江入城郭，小園生微瀾。相從結茆舍，曝背談金鑾。

送周正孺知東川

得郡書生榮，還家昔人重。而况東西川，千騎許上冢。里門下車入，父老自驚聳。端如何武賢，不事長卿寵。清時養材傑，杞梓方培植。未應遺合抱，取用及把拱。如君尙出塵，願我宜耕壟。告歸謝先手，求去悔不勇。豈云慕廉退，實自知衰冗。爲君掃棠陰，畫像或相踵。（蜀中太守無不畫像者）

題李伯時畫趙景仁琴鶴圖二首

清獻先生無一錢，故應琴鶴是家傳。誰知默鼓無絃曲，時向珠宮舞幻仙。
醜石寒松未易親，聊將短曲調長人。乘軒故自非明眼，終日妖嬈舞麋薪。

次前韻再送周正孺

東川得望郎，坐與西爭重。高風傾石室，舊學鄙文冢。蜀人安使君，所至野不聳。竹馬迎細侯，大錢送劉寵。遙知谿路老，穉相扶擁。看畫古叢祠，百怪朝幽拱。牛頭與兜率，雲木蔚堆壟。醉鄉追舊游，筆陣賈餘勇。聊將詩酒樂，一掃簿書冗。西風吹好句，珠玉本無踵。（劉蛻文冢銘在梓州）

書王定國所藏煙江疊嶂圖（王晉卿畫）

江上愁心千疊山，浮空積翠如雲煙。山耶雲耶遠莫知，煙空雲散山依然。但見兩崖蒼蒼暗絕谷，中有百道飛來泉；縈林絡石隱復見，下赴谷口爲奔川。川平山開林麓斷，小橋野店依山前。行人稍度喬木外，漁舟一葉江吞天。使君何從得此本，點綴毫末分清妍。不知人間何處有此境，徑欲往置二頃田。君不見武昌樊口幽絕處，東坡先生留五年。春風搖江天漠漠，暮雲捲兩山娟娟。丹楓翻鴉伴水宿，長松落雪驚醉眠。桃花流水在人世，武陵豈必皆神仙。江山清空我塵土，雖有去路尋無緣。還君此畫三歎息，山中故人應有招我歸來篇。

次韻王定國會飲清虛堂

何遜揚州又幾年，官梅詩興故依然。何人可復問季孟，與子不妨中聖賢。卜築君方淮上郡，歸心我已劍南川。此身正似蠶將老，更盡春光一再眠。

與龍節侍宴前一日微雪與子由同訪王定國小飲清虛堂定國出數詩皆佳而五言尤奇子由又言昔與孫巨源同過定國感念存沒悲歎久之夜歸稍醒各賦一篇明日朝中以示定國也

天風浙浙飛玉沙，昭恩歸沐休早衙。遙知清虛堂裏雪，正是簷蔔林中花。出門自笑無所詣，呼酒持勸惟君家。踏冰凌兢戰疲馬，扣門剝啄驚寒鴉。羨君五字入詩律，欲與六出爭天葩。頭風已倩撒手愈，背癢恰得仙爪爬。銀餅瀉油浮蟻酒，紫盤鋪翠盤龍茶。幅巾起作鴝鵒舞，疊鼓誰摻漁陽撾。九衢燈火雜夢寐，十年聚散空咨嗟。明朝握手殿門外，共看銀闕噉晨霞。

王晉卿所藏著色山二一首

縹渺營丘水墨仙，浮空出沒沒有無間。爾來一變風流盡，誰見將軍著色山？

學曠何人似退之意行無路欲從誰宿雲解駁晨光漏獨見山紅澗碧時。

次韻黃魯直效進士作歲寒知松柏詩

龍蟄雖高臥雞鳴不廢時炎冷徒自變茂悅兩相知已負棟梁質肯爲兒女姿那憂霜鴛鴦未喜日遲遲難與夏蟲語永無秋實悲誰知此植物亦解秉天彝

王晉卿作煙江疊嶂圖僕賦詩十四韻晉卿和之語特奇麗因復次韻不獨紀其詩畫之美亦爲道其出處契闊之故而終之以不忘在莒之戒亦朋友忠愛之義也

山中舉頭望日邊長安不見空雲煙歸來長安望山上時移事改應潛然管絃去盡賓客散惟有馬埒編金泉渥洼故自千里足要飽風雪輕山川屈居華屋嚼棗脯十年俯仰龍旂前却因病瘦出奇骨鹽車之厄寧非天風流文采磨不盡水墨自與詩爭妍畫山何必山中入田歌自古非知田鄭虔三絕君有二筆勢挽回三百年欲將巖谷亂窈窕眉峰脩嫵誇連娟人間何有春一夢此身將老蠶三眠山中幽絕不可久要作平地家居仙能令水石長生眼非君好我當誰緣願君終不忘在莒樂時更賦囚山篇（柳子厚有囚山賦）

夜直玉堂攜李之儀端叔詩百餘首讀至夜半書其後

玉堂清冷不成眠伴直難呼孟浩然暫借好詩消永夜每逢佳處輒參禪愁侵硯滴初含凍喜入燈花欲闌妍寄語君家小兒子他時此句一時編

景仁和賜酒燭詩復次韻謝之（時公方進新樂）

笙磬分均上下堂（舊說堂上之樂皆受笙均堂下之樂皆受磬均）游魚舞獸自奔忙朱絃初識孤桐韻（舊樂金石聲高而絲聲微今樂金石與絲聲皆著）玉琯猶聞秬黍香（舊法以尺生律今以黍定律以律生

尺。萬事今方啓伯始，一斑我亦愧真長。此生會見三雍就，無復寥寥歎未央。

次韻劉貢父春日賜幡勝

寬詔隨春出內朝，二軍喜氣挾孤貂。鏤銀錯落翻斜月，翦綵繽紛舞慶霄。臘雪強飛纔到地，（前日微雪。）曉風偷轉不驚條。脫冠徑醉應歸臥，便腹從人笑老韶。（是日暮次賜酒。）

再和

與君流落偶還朝，過眼紛紛七葉韶。莫笑華顛飄彩勝，幾人黃壤隔青霄。行吟未許窮騷雅，坐嘯猶能出教條。記取明年江上郡，五更春枕夢春韶。

葉公秉王仲至見和次韻答之

衫締方暑亦堪朝，歲晚淒風憶阜貂。共喜鸛鷺歸禁籞，心知日月在重霄。君如老驥初遭絡，我似枯桑不受條。強鏹霜須簪彩勝，蒼顏得酒尚能韶。

再和

衰遲何幸得同朝，溫勁如君合珥貂。誰惜異材蒙徑寸，自慙枯枿借凌霄。光風泛泛初浮水，紅糝離離欲綴條。後日一樽何處共，奉常端冕作咸韶。

次韻王晉卿惠花栽栽所寓張退傅第中一首

坐來念念失前人，共向空中寓一塵。若問此花誰是主，天教閑客管青春。

次韻王晉卿上元侍燕端門

月上九門開，星河繞露臺。君方枕中夢，我亦化人來。光動仙毬綫，香餘步輦回。相從穿萬馬，衰病若爲陪。

王鄭州挽詞（克臣）

羨君華髮起琳宮，右輔初還鼓角雄；千里農桑歌子產，一時冠蓋慕蕭嵩。那知聚散春根外，便有悲歡過隙中！
中京北同僚幾人在，猶思對案筆生風。（子爲開封幕，與子難同廳。）

書王定國所藏王晉卿畫著色山二首

白髮四老人，何曾在商顏。煩君紙上影，照我胸中山。山中亦何有？木老土石頑；正賴天日光，澗谷紛爛斑。我心空無物，斯文定何間。君看古井水，萬象自往還。君歸嶺北初逢雪，我亦江南五見春。寄語風流王武子，三人俱是識山人。

送呂昌明知嘉州

不羨三刀夢蜀都，聊將八詠繼東吳；臥看古佛凌雲閣，勅賜詩人明月湖。得句會應緣竹鶴，思歸寧復爲鱸。鱸橫空好在脩眉色，頭白猶堪乞左符。

次韻黃魯直寄題郭明父府推潁州西齋二首

樹頭啄木常疑客，客去而嗔定不然。脫鞵已應生井沫，解衣聊復起庖煙。平生詩酒真相好，此去文書恐獨賢。早晚西湖映華髮，小舟翻動水中天。

寂寞東京月旦州，德星無復綴珠旒；莫嗟平輿空神物，尙有西齋接勝流。春夢屢尋湖十頃，家書新報橘千頭；雪堂亦有思歸曲，爲謝平生馬少游。（輿音預。）

